



週年默想



天主降生一千九百十三年

江南主教姚准

中華民國二年 上海土山灣印

週年默想目錄

卷七 七月

初一日 遼愈池旁久痿

見三册一張

初二日 聖母往見聖婦依撒伯爾

見三册四張

初三日 聖母逾格殊恩

見三册七張

初四日 耶穌命漁得魚

見三册九張

初五日 主徒摘食麥穗

見三册十二張

初六日 簡選十二宗徒

見三册十五張

初七日 耶穌山中聖訓

見三册十七張

初八日 神貧真福之首

見三册二十張

初九日

真福中段四端

見三冊二十三張

初十日

真福後段三端

見三冊二十六張

十一日

繼述宗徒之品詣

見三冊二十九張

十二日

謹慎全守教令

見三冊三十二張

十三日

事主宜有熱心

見三冊三十四張

十四日

人居窘難宜何如

見三冊三十七張

十五日

戒慎志意之虛浮

見三冊四十張

十六日

天主經第一第二祈求

見三冊四十三張

十七日

天主經第三四五祈求

見三冊四十五張

十八日

天主經第六七祈求

見三冊四十八張

十九日 積蓄資財之訓

見三册五十一張

二十日 山中聖訓之餘箴

見三册五十四張

二十一日 耶穌下嶺淨癩

見三册五十七張

二十二日 療百夫長之病僕

見三册五十九張

二十三日 信德之要之尊

見三册六十二張

二十四日 命孀婦子復活

見三册六十五張

二十五日 若翰遣徒詢主

見三册六十七張

二十六日 吾主聖蹟之效不同

見三册七十張

二十七日 瑪大肋納泣罪

見三册七十三張

二十八日 污魔復返舊舍

見三册七十六張

二十九日 論順主者之於親族

見三冊七十九張

三十日 播種之喻

見三冊八十二張

三十一日 聖依納爵瞻禮

見三冊八十四張

謹度首瞻禮六七月

見三冊八十八張

卷八 八月

初一日 熱心求天主光榮

見三冊九十一張

初二日 訓迪後生之務

見三冊九十四張

初三日 美種與莠稗之喻

見三冊九十七張

初四日 聖多明我瞻禮

見三冊一百張

初五日 芥種麴酵重寶之喻

見三冊一百零三張

初六日 美珠水族家主諭

見三册一百零六張

初七日 鄉人異待吾主

見三册一百零九張

初八日 遣十二徒敷教

見三册一百十二張

初九日 吾主勗勉宗徒

見三册一百十五張

初十日 傳教人之居心

見三册一百十八張

十一日 又前題

見三册一百二十一張

十二日 五餅二魚之異

見三册一百二十三張

十三日 餅魚異跡之夜

見三册一百二十六張

十四日 聖母升天前日

見三册一百二十九張

十五日 聖母升天瞻禮

見三册一百三十二張

十六日 天主寵愛之母

見三冊一百三十五張

十七日 耶穌步海詣徒

見三冊一百三十八張

十八日 主臨熱內撒爾

見三冊一百四十張

十九日 主論天降活糧

見三冊一百四十三張

二十日 法利塞嫉耶穌

見三冊一百四十六張

二十一日 愈加納搗亞之女

見三冊一百四十九張

二十二日 吾人靈魂之價值

見三冊一百五十二張

二十三日 耶穌撫愈聾瘖

見三冊一百五十五張

二十四日 七餅飭四千人

見三冊一百五十七張

二十五日 聖母聖心

見三冊一百六十張

二十六日 主赴達努達

見三册一百六十三張

二十七日 救伯撒依達之瞽人

見三册一百六十六張

二十八日 聖伯多祿認主

見三册一百六十八張

二十九日 耶穌預言受難

見三册一百七十一張

三十日 謙遜克己三級

見三册一百七十四張

三十一日 耶穌山上顯容

見三册一百七十七張

卷九 九月

初一日 下山有人懇主驅魔

見三册一百八十一張

初二日 耶穌驅魔治癩

見三册一百八十四張

初三日 主復預言受難

見三册一百八十七張

初四日 耶穌納丁稅銀

見三冊一百九十張

初五日 門人途中爭長

見三冊一百九十三張

初六日 耶穌戒人招尤

見三冊一百九十五張

初七日 責善宥過之訓

見三冊一百九十八張

初八日 聖母聖誕瞻禮

見三冊二百零一張

初九日 王責臣負之喻

見三冊二百零四張

初十日 耶穌途中事跡

見三冊二百零六張

十一日 療淨癩者十人

見三冊二百零九張

十二日 告解先後事宜

見三冊二百十二張

十三日 主詣日路撒稜

見三冊二百十五張

十四日

耶穌公堂訓衆

見三册二百十八張

十五日

耶穌寬赦罪婦

見三册二百二十一張

十六日

主爲世光之義

見三册二百二十四張

十七日

耶穌在堂續訓

見三册二百二十六張

十八日

胎警得明之異蹟

見三册二百二十九張

十九日

胎警得明之訓

見三册二百三十二張

二十日

主遣七十二徒

見三册二百三十五張

二十一日

七十二徒反命

見三册二百三十八張

二十二日

耶穌仁善之呼喚

見三册二百四十一張

二十三日

學士佯問主訓

見三册二百四十四張

二十四日 撒瑪利大諾之比喻 見三冊二百四十七張

二十五日 申明前喻之寓意 見三冊二百四十九張

二十六日 昆弟和愛之緣由 見三冊二百五十二張

二十七日 昆弟宜和愛 見三冊二百五十五張

二十八日 姊妹延主得訓 見三冊二百五十八張

二十九日 戒人貪吝之喻 見三冊二百六十一張

三十日 預防猝死之義 見三冊二百六十四張

正誤 第三册

六十四張第五行第十九字紛 宜改紛

八十一張第五行額我畧下加一謂字

八十六張第七行第二十五字霄 宜改宵

一百零一張第十行第三字苔 宜改答

一百十二張第五行第十九字盲 宜改育

一百十八張第五行而入得之神 宜改入德之神

一百二十二張第七行第十一十二字見行 宜改道行

一百七十七張第四行第六字分 宜改分

一百八十三張第五行第二字介 宜改芥

二百零八張第七行第六七二字黨惡宜改惡黨

二百四十八張第七行第五字汎宜改汎

二百六十一張第七行第十七字翁宜改翁

二百六十三張第五行第九十二字人富宜改富人

二百六十五張第二行第四字間宜改間

卷七 七月

月省之思 題目與正月同 卷一末

首瞻禮六 謹度首瞻禮六 見本卷末

耶穌傳教之二年

初一日 療愈池旁久痿

定像 想見吾主謂一負病三十八年之人曰起肩榻以行。

特求 求主賜我明識主心倚賴主仁仰法主德。

第一端 耶穌憐痿 如德亞瞻禮日耶穌自加法爾納翁上日路撒稜斯瞻

禮爲耶穌傳教時第二次巴斯卦論者稱爲吾主傳教二年之始。聖史載都城有洗牲池一池畔環廊五諸痿痺患病者坐臥其間俟池水動動後先入

池者得愈。耶穌見一人染病三十有八年。若望五篇吾主爲瞻禮之主，無往瞻禮之本分。今仍往者，蓋訓人於教令會規，或堂院中善習，雖有時似能自便，不守無妨，然守之更顯爾願就範圍，可動旁人之觀感。吾主既至，日路撒稜，卽往觀疾病諸人，且於最窘困者，愈爲留意。此又訓人當憐念至苦者，以布慈憫之德。今我於所屬之人，其尤爲留意者，果皆屬艱難堪惜者乎？抑惟爲才能可取者乎？或僅係私心所好者乎？自問之餘，尙其知所感憤，而戒慎於將來。

第二端 耶穌愈痿 耶穌見其人偃臥，歷時已久，憫之曰：爾欲愈乎？其人意吾主責以久延彼地，對曰：無人俟水動，挈予入池。迨予往，人先予下。耶穌謂之曰：起，可肩榻以行。其人立愈，遂肩榻去。同上此痿人所以得主眷顧，而蒙

主特恩者，實爲其艱難疾病之至也。今我一身形病雖多，靈病雖久，亦不可灰心敗意。當向吾主聖傷聖血水，聖心生活井泉，求其施救，亦勿謂無人挈引。須知神工座上有人，神師位內有人，苟能聽其教誡指示，可得療愈神疴也。謝主賜我師長訓迪之恩，就正神師，虛心受教，忠心行之。

第三端 耶穌訓痿 痿者初不識何人愈已。蓋耶穌自衆間迴出，後遇痿者於殿，謂之曰：爾病今痊，勿再獲罪，免遇後災尤甚。同上是人旣幸病愈，往殿謝恩，得識吾主，聆其新訓，承其新寵。予靈多病，亦須慎勿再蹶痿。欲避其機，欲免其禍，可時往主前，頌謝主德。庶能識主益明，承訓愈多，增益神力愈強也。今日爲聖若翰瞻禮第八日，念其誕生於世，導人認主，誨人痛告，均沾吾主救贖洪恩，宜懇其轉求天主，賜我避罪趨善，保守心身。 祝言

初二日 聖母往見聖婦依撒伯爾。

定像 想見聖母進匝加理亞家，晉謁依撒伯爾。

特求 求主賜我聖寵，使謁見親朋時，有聖母之心。

第一端 往見之緣 聖母得天主成降生之奧於其身，未幾急起興程，登山到如達府，入匝加理亞室，拜依撒伯爾，同居三月。路加二篇自聖母至依撒伯爾處，山路崎嶇，約有四日之程。然聖母所以往見者，據聖師之解，一、謂順主寵光之默牖。二、謂既知表姊得主奇恩，卽往賀，以敦親誼。三、謂行愛德，扶助依撒伯爾於艱虞時，速其子若翰，蒙赦原罪，丕承聖寵。今之修德者，亦有往來進謁之機，而不免靈魂之害者，何哉。或因往來煩多，或因心志虛浮，以

故凡爾與親朋交際，宜不出順命友誼愛德諸範圍。庶行止可有益於人，亦無損於己。求主賜我聖寵，能悟前賢多默。更比引古人之言曰：我每自人叢中回，必較往時愈不成人。師主編一卷二十章定志自外歸舍後，恒行深省之功。

第二端 往見之益 聖母之入匝加理亞室也。內靈之福，心神之樂，與之偕入。依撒伯爾得聖神滿盈，識天主降生奇奧，若翰得赦原罪，承主聖寵，全開穎悟，在母胎中不勝歡躍。其父瘖啞九月，得伸舌而預言來事，不讚主恩，親隣皆與其歡，咸來慶賀。依撒伯爾巨聲感激曰：辱蒙吾主聖母降臨入室，斯大幸何繇至予。同上誠以聖子欲尊榮聖母，廣施其恩於虔奉聖母之人，及聖母所愛之靈。而人欲得天主恩佑，非由聖母不可。爾欲聖母眷顧，望聖母

寵恩宜虔誠事奉，崇其敬禮。問爾至今何如。求聖母賜爾孝愛之心，言語行事，不失褒崇聖母之意。

第三端 往見之德 吾人之功，每增於德行之修。聖母往見聖婦，所著聖德實多。信德也，聽命也，熱心也，苦刻也，端肅也，慷慨也，救靈神火也，而尤耀者，謙遜與愛德。蓋身爲天主之母，竟躬謁依撒伯爾，一若聖婦之尊榮福德，有過於己者。且偕居三月，侍奉盡誠。故依撒伯爾頌揚其德曰：女中爾爲讚美。而聖母卽歸榮於主曰：全能者大展厥德於我，錫以異恩。我靈感頌吾主一篇聖歌中，深含聖母德蘊。我苟慎思而矜式之，庶有以慰聖母慈心，且邀聖母懷顧也。 祝言

初三日 聖母逾格殊恩

定像 想見聖母聽依撒伯爾讚頌時、感謝天主。

特求 求主賜我寵光、能明聖母所受天主殊恩、倍深愛敬。

第一端 降生前之殊恩 自未有天地、天主預選聖母爲己母、得無二之尊。據聖多瑪斯云、天主賜人聖寵、必準其地位。可知聖母受主殊恩、遠超衆聖矣。然其所受者、昔聖師謂有十二、適符聖若望所見十二景星之數。默照經十二篇一、無染原罪、今聖教會定爲信德之端。一千八百五十四年本瞻禮日、教皇比阿第九位欽定、二、始胎時滿受聖寵、心靈純粹。三、穎悟卽開、以用主寵。四、早識童貞珍美、三歲獻堂時、矢願終身永守。我當偕天朝神聖及聖母惠愛之靈、虔賀聖母殊恩殊福。求其保我心身清潔。修道者更求賜能效。

法聖母，永守所矢之願，日進修程。

第二端 降生時之殊恩 一、既有懷孕之慶，仍不失其童貞，而天主聖母與

卒世童貞之榮，咸聚會於一身。二、吾主在淨胎九月，全爲服屬。緣聖母而活，亦活在聖母，而與聖母若合爲一。三、九月間天主降生之聖身愈長，聖母心靈內之寵錫亦愈增。四、天主賜惠我人，皆由聖母。聖母爲聖寵之門戶，聖教會稱聖母爲天主寵愛之母，聖寵之母者，實以此故。思念及此，能不益我熱心，隨時趨赴聖母乎。我於功德，少見精進，於事業，鮮能順適者，恐於倚恃聖母，有所欠缺耳。吁，聖母，我之慈母，賜我愛爾。聖伯多祿格辣物語須於日中，常思何以增我敬愛聖母之情。

第三端 降生後之殊恩 一、免厄娃所受天主之詛，曰產子於艱苦。創世經

三篇此恩亦由無原罪而得。既免產子諸苦，而產前產後常爲童貞。二、緣大有功於吾主降生救世之事業。故有輔行救贖之稱。三、聖母謝世時，毫無常人之愁苦，其靈魂出離肉身，實因愛情烈燄而飛騰。四、肉身先時復活，天神簇擁，偕靈魂同登天國，肢體滿享無窮真福。今爾欲得聖母殊恩之餘惠，權在爾手。惟效法聖母熱於神火，引亡羊歸棧，輔助吾主救世之功，勉爲耶穌肖弟。如是，將與聖母愷樂於天也。歡欣踴躍之餘，慶賀聖母榮福，頌謝聖母恩德。并懇轉求賜我寵佑。

祝言

初四日 耶穌命漁得魚

定像 想見吾主坐伯多祿舟，訓岸上民衆。

特求 求主賜我勤聆主訓，謹聽主命。

第一端 衆人聽講 衆人慕義如飢渴，自四方而來，擁逼耶穌，望聆聖訓，聚於熱內撒肋湖濱。吾主有心饜飫之，彰其仁知。以如堵如雲之衆，除近侍者，難能悉聆。於是下西滿艇，命少離岸，坐而諭衆。路加五篇西滿之舟，聖教會之像也。我今在其舟內，欲聆主訓，已大易於當時岸上之人。書籍之多，聽講之便，幾在在皆是。然我心渴慕道義，果如時人之殷勤耶？恐我於誦閱聖書，聽講道理時，每留心於文理之淺深，口才之高下，而於道理旨趣，毫不心領神會。自慚自勉之下，定志改於將來。

第二端 西滿聽命 講罷，謂西滿曰：舉網湖心布漁。西滿曰：師，竟夜徒勞，無魚入網，藉命更布。同上聖伯多祿平生捕魚爲業，其有魚無魚之情形，辨之。

已熟。然一聞主語，不固執己見，聽命如瞽。可知其言竟夜，徒勞者，非欲主收回成命，亦非爲昨既徒勞，今因主命而姑試之也。蓋一有是心，其聽命行事，必不能契合主心。故聖徒言藉爾命，因爾名，更行張網，可望不如昨夜之無益。此誠倚主之誠切，聽命之敏速也。余靈試問爾於聽命時，果能如此忠懇，如此敏捷乎？求主賜我知聽命之德爲可貴，加意勤修。日內按公規動作，慎毋濡滯。

第三端 諸徒驚異 鱗鱗入網，網幾裂。招比舟伴並力，兩舟充物，幾沉。徒等觀異，驚愕甚。同上觀吾主之神能，及伯多祿聽命之奇效，則吾人孰不當歡欣事主，而惟命是從乎？卽或不能如宗徒之立奏膚功，然樸誠聽順，終爲主心悅樂，而神效亦必不空虛。時徒等見主能達於海底，瞬息間，可致潛伏之

魚連貫而至，且驚且異，不知何言。惟伯多祿謙勇過人，跪主前曰：當遠我，勿近我，我乃大罪人，不敢辱留吾主於我舟。然伯多祿及諸徒等，雖自知爲罪人，不敢與主對越。究因識主美善，愛不忍離。此所以三年追隨，未嘗他往也。祈伯多祿及諸徒等同我向至尊至善之耶穌，求加恩佑。 祝言

初五日 主徒摘食麥穗

定像 想見吾主駁法利塞謗語，保護諸徒。

特求 求主賜我仁直柔惠之心。

第一端 誹謗主徒 巴斯卦瞻禮畢，耶穌偕徒自日路撒稜返加理勒亞門。徒摘麥穗，搓挪而食。法利塞責之曰：曷行瞻禮日所不宜行。路加六篇門徒

搓穗而食。按古經申命經二十三篇原係律所不禁。法利塞肆其呵責者。欲顯己罷工謹恪。借遵規敬主之名。以洩其妬忌私忿。則其心之詐偽可知矣。然此等弊病。今人尤易沾染。卽好修者。亦時或不免。見人德業純粹。超過於己。卽分外留心。吹毛求疵。矚其行。察其言。偶獲有隱微小過。或無辜之遊適。無礙之作爲。遂加誹訕。妄行貶責。嗚呼。若是者。非徒無成美樂善之心。且陷於忿恨狹隘。詐僞諸病。求主賜我存心仁厚。以悅主心。

第二端 吾主糾駁 主曰。爾未讀經所紀乎。撒責。在主殿勤勞作事。以供祭獻。不守瞻禮無罪。又曰。瞻禮建爲人。非人爲瞻禮。緣人子亦爲瞻禮。主可行寬免。瑪竇十二篇。瑪爾谷二篇。主之駁斥法利塞。如此者。誠以謗毀可引人於謬。苟不速行辨白。以明徒等無過。將見讒人高張。大爲教道人心之害也。

夫人一身被人誣毀，隱忍固嘉。至有關於天主光榮、聖教真理、及他人利益之事，不得不以正言剖析。否則柔懦無能，一任真道抑詘，實理塵障，此與詆誹之咎無異。經曰：有緘默之時，有言語之時。蓋言人宜有超卓之見識，毋徒護己聲名，亶亶不倦。而於褒崇正道，訥訥無辭也。如是，則邪說息，而正教之理明矣。求主熱我神火，賜我明達超見之恩，正心誠意，黜妄崇真。

第三端 主責時人 吾主欲示己洞人心蘊，知法利塞，所以指摘其徒者，並非尊重教規，實由中心妬忌。故謂之曰：經云吾尙仁恕，不尙祭獻。爾若明厥義，必不妄擬無辜。瑪竇十二篇觀此，可知我欲免主懲責，一須戒言行間，毋從私欲，必躬踐實德，以免色莊之誚。二須戒惟守外面規矩，不知體貼意義，以致外僞內闇。三須戒見人行事，偶若有過，卽肆行詆毀，不存忠恕之心。今

我捫心自問、於此三者、能全不干犯乎。有、則深心力改。求主赦我前非、賜我厚道待人、撝謙自牧。 祝言

初六日 簡選十二宗徒

定像 想見耶穌呼十二徒名。

特求 求主賜我聖寵、俾恒心忠應主召。

第一端 選十二徒 吾主於從徒中、特選十二宗徒、作聖教柱石之臣、序聖教爵秩之班、以繼述其事業於千秋萬世。按聖瑪爾谷三篇與聖路加六篇載主呼諸徒登山、隨其所欲、選十二名、曰宗徒。夫隨從吾主者、實繁有徒、然所選宗徒、止有十二。則其位尊、其數奇矣。蓋主降生前二千餘年、古聖雅各

伯十二子，爲如德亞十二宗，早已預徵其異。今諸徒得與斯選，謂非吾主特恩，意外殊榮乎。今我於億兆人中，幸得主特選，蒙主洪恩，尙其感主聖召，思主所以選我之意，更思我何以副主此選，而發熱願忠於主召之情。時效保祿宗徒曰：我之爲我，悉賴主恩。致哥林多人前書十五篇

第二端 選徒禮儀 路加聖史言耶穌前夕，登山祈禱，徹夜求主。六篇吾主選十二宗徒，何以如斯鄭重，幽藏祈禱，特行預備之工。據聖師盎博羅削解曰：主之爲此，正所以立人師表。示人凡遇重大事務，未行之先，須預行祈禱，求主寵光。且示人欲善行祈禱，宜隔絕紛囂，潛居僻處。苟力能從心，寧以幽靜清夜，行諸默禱神工。思念於此，知己有所或修或改，求主賜我聰敏上智，得於處事間，恒遵主旨。定志艱難之際，專心誦禱，祈主指引。

第三端 選徒蘊意 吾主選十二宗徒，竟選茹達在內。主豈不知其日後有負賣之事乎。抑無實意召其爲徒乎。據解經者曰：主選茹達，實欲彼爲宗徒。奈彼存心不善，自負主恩，故終隕於永獄耳。然主雖知其負心，而仍選之者，有深意焉。一、示人天主寵恩，雖超奇卓異，而受之者善用與否，悉憑人自主。二、勵人境地雖善，品位雖聖，須常戰戰兢兢，修繕己靈。三、訓人不宜因人論事，毋以一徒負賣吾主，而謂諸徒乃負賣吾主之黨也。善乎保祿宗徒曰：萬事皆裨益於敬愛主者。他徒之忠恪，引人倚賴主佑，黽勉前行。茹達之自陷，訓人深自謙勉，不敢矜恃。 祝言

初七日 耶穌山中聖訓

定像 想見吾主坐徒中，訓人修成至道。

特求 求主賜我聖寵，能味斯道，且能使人共嘗其味。

第一端 主訓原由 耶穌選十二宗徒，意欲遣之敷教，且欲藉其功，及其繼位者之勞，傳聖道於天下後世。故先加以訓誨。然時有如德亞及底樂西多之人，來聆訓者雲集。於是吾主登山宣諭，欲衆人與聞其福音，使知異日宗徒傳教萬方，實皆主所親授，并未參以己意。可知聖教會所傳之道，授自宗徒。人能聞斯道，由斯路，入斯門，必可赴常生之域。今爾既幸入此門矣，且有進於常人矣，果能行事恒符主訓乎。且能不忘主訓，進德修業，以底於有成乎。自省之下，當切願益明主訓，篤信力行。尤宜時憶主言曰，當爲全人，如在天爾父爲全美。

第二端 神貧之福 人生於世，孰不貪享福樂。然福樂有真假之分，不可不辨。任欲者，耽於逸樂，趨時者，驚於繁華，而真福之本源，反爲假福所淆混。故主曰：神貧者，乃真福，非謂貧者卽膺福履。蓋言心志甘於貧，神意樂乎貧，脫去世俗牽纏，專務靈魂德業，生前得聖寵歡愉，死後享天堂榮福也。第主所謂之神貧有三等：一、身值貧困，知安心聽命，翕合主旨；二、身雖處富，而心能甘貧，不戀世物；三、棄世樂貧，捐離諸物，以隨從窮乏之耶穌。凡專務精修者，皆是。主嘗曰：凡棄家，謝父母兄弟，捨田宅爲我名，將蒙百倍，而享常生。瑪竇十九篇可知，世人以富爲福，與吾主所謂之福，固有天淵之判矣。蓋吾主所謂之福，真福也。求主賜我明識神貧之旨，能謹守絕財細微諸規，常以神貧爲我靈魂至寶。

第三端 殷富之殃 吾主以神貧垂訓後，深恐人遺忘其義，爰申儆之曰：禍哉爾殷富者，因爾已得安樂。路加六篇吾主此言，非謂人不可殷富。惟謂嗜利者，只圖目前暫樂，不顧身後永安，功德空虛，罪惡充盈。一朝去世，決不能免永禍，而享永福。故吾主曾謂富者入天國，難於駝穿針孔。路加十八篇則人生世上，亦何苦富於暫時之肉身，而不富於永遠之靈魂哉。今我既有棄世離塵之想，是主以殊恩待我，我能不歡欣稱謝，思所以醒彼迷於貨財者，而稍報主恩於萬一耶。亟宜熱我救靈之火，向母胎絕財之耶穌，求賜常愛神貧之德。 祝言

初八日 神貧乃真福八端之首

定像 想見吾主訓衆曰，神貧者乃真福。

特求 求主賜我珍愛神貧之德，而篤行之。

第一端 甘貧之貴 觀吾主之行，聽吾主之言，可知吾主何如珍重神貧，而神貧之尊貴又何如。保祿宗徒曰：彼爲吾人而爲貧乏。致哥林多人後書八篇自誕生馬槽中，至釘死十字架，無一日不著其甘貧。故於山中宣訓時，卽以此德首先發論。後每以甘貧賞報，感動宗徒之心。聖教初興時，諸信人及後諸修會始祖，亦皆深悟主意，力捐所有，以神貧爲修成基址。凡屬修士，捐離世有，立願居貧，惟望倍益己功，加修己德，法前聖儀型，遵吾主訓誨。可知在此修途者，當時時珍重神貧，安心樂道，不恥裋褐不完，不憂冠履不周，且乘機助人，俾知戀世利之量小，求天福之品高也。

第二端 神貧之實 修道者之神貧，貴乎實在功行。在世一無所有，所有者皆爲長上管業。故修道及立願絕財者，非長上允准，無能與，無能取，無能交易售貸。卽爲長上者，亦僅爲公產之司事。凡資財貨物，不得任意處置，以違規令。今我於神貧一節，能巨細毫無愆忒乎。於規矩毫無干犯乎。人之常情，易受三仇迷誘，每自小眚漸陷大咎。故有志於德者，不但求神貧要務，且修甘貧全德。雖有求不允，器用匱乏，亦不生憂戚。且以貧窮爲本分，以吾主貧困爲矜式。凡衣食動用諸物，常如受人周濟，常存感德之懷。更思己妄用主恩，尤若不應得人恩惠者然。求主賜我得甘貧之心，勉修此德。

第三端 神貧之益 神貧之足以益人者，一、去諸得天產之阻，無世物之糾纏。蓋主曰，富人入天國，難於駝穿針孔。見上二、世緣旣脫，德業易精，而天堂

榮福，自能得之易易。主亦曰，將得天上國也。瑪竇十九篇三，符主至訓，置身修成之路。主曰，爾欲爲完人，往售諸有，施貧乏，可來從予。同上既能步趨主後，而專心愛主，自可造臻全德。經曰，愛德爲教令之純全。致羅瑪書十三篇，其心安神樂，尤其益之次焉者耳。念及於斯，凡修途之艱辛，神貧之苦楚，有不冰消瓦解乎。今向耶穌神貧之表率，求賜神貧之切願。 祝言

初九日 眞福中段四端

定像 想見吾主曰，良善、和睦、涕泣、嗜義者，乃眞福。

特求 求主賜我聖寵，慕此四端眞福。

第一端 良善和睦二端 良善者乃眞福，爲其將獲安土。和睦者乃眞福，爲

其將稱天主子。瑪竇五篇吾主所謂之良善者，卽謂人能溫良處世，抑制忿怒暴戾偏情，時著忍耐謙和美德，而克除性情之躁急也。所謂安土，據聖奧斯定解，爲得衆人珍愛，安享土田物產。聖伯爾納鐸解，爲能治己心田，自抑諸情，異於暴愎者之逞情縱性。聖熱羅尼莫及他聖師解，爲得天上產業，而適永樂之土。可知凡在修途者，皆宜守此良善之訓。恭敬事上，慈善待下，卽有橫逆之加，艱屯之遇，亦須犯而不校，坦然自處。若夫吾主所謂之和睦，卽言凡人隨地隨時，當交相敬愛，以一堂一院之中，苟不和平待衆，樂與人同，不特顯違吾主聖訓，有悖前聖德表，易犯驕傲忿怒等罪，而心神撓亂，何得爲天主子，而坦蕩終日乎。今我返躬自省，於良善和睦二端，未必一無違犯。非厲色以拒人，卽矯情以異衆，尙其求耶穌和平之君王，依撒義亞九篇賜

我力行此二端之德，以期於己無愆，於人無怨。

第二端 涕泣嗜義二端 涕泣者乃真福，爲其將受寬慰。嗜義如飢渴者乃真福，爲其將得飽飫。同上今之好歡樂者，圖口腹者，罔知痛哭己罪，而嗜好義德。吾主所以於此垂訓，誠欲人不忘斯世爲涕泣之谷也。故誠心悔過者宜涕泣。悲羣靈不識真主，將隕於地獄者，亦宜涕泣。然則吾主所謂之真福何如。一、生前能受寬慰，常得主寵甘飴。二、死後能受安慰，永享天堂福樂。聖奧斯定曰：苦像前流淚一刻，其快慰甚於梨園數月之遊。誠哉是言。吾主所謂嗜義者，卽言熱心修德，日求精進之人。其心志日潔，德行日純，愈克私欲，愈合主心，然常懷虛若谷，恐不符主訓。蓋日益勉爲完人，學在天聖父之純全。同上若而人者，其求道修德，一若飢者之求食，渴者之求飲，則神靈之樂

可滿。聖寵之潤可滋。至道之味可饜。何患乎不得飽飫之真福哉。吾願專務世幻。以嬉笑爲樂。以及修德不勤。而半途中止者。常以此二端。自悔自勉。行見可受主慰。而蒙主寵錫也。今向耶穌諸德之表。求賜渴慕諸德。 祝言

初十日 真福後段三端

定像 想見吾主曰。哀矜者。心淨者。爲義而被窘難者。乃真福。

特求 求主賜我聖寵。能在此真福者數中。

第一端 真福八端之第六 哀矜者乃真福。爲其將蒙哀矜。同上哀矜分二
等。一、見人身遭困苦。卽按己力量。輔助彼身。使之稍有所濟。主於審判日。將以疾痛苦患者自代曰。予飢渴。爾飲食我。凡爾所施予昆弟小者之一。卽施

於我。瑪竇二十五篇可知人能行此哀矜，必深契主心矣。一、見人迷於邪僻，闇於義理，疲於敬主，繕靈，卽力行開導。遇心神憂苦者，安慰之，精神不振者，婉誘之。如此，則引人於道德之中，扶危持弱，亦大有功於主前。蓋二者，一係形哀矜，一係神哀矜，而神哀矜之功，尤爲超卓。凡有訓誨之責者，更須行之不倦，以期無負主訓。主曰：爾宜悲惻，體聖父哀憐之心。路加六篇求主賜我能體主心，勉行博施之功。

第二端 真福八端之第七 心淨者乃真福，爲其將得見天主。同上人爲物欲所蔽，神目旣盲，其所見者，無非世俗虛幻，彼非不欲見天主也。第心不淨，斯遠於主，而不得見耳。夫心淨之等級亦多，一、無重罪於主前。二、不陷故意之小罪。三、脫卸私欲偏情。四、洗滌莫可覺察，阻入天國之微疵。五、心靈純淨。

心目惟注視天主，心志惟歸向天主是。所謂得見天主者，見於今世，得叨主之寵光。見於將來，得享主之榮福。其福樂之淺深，悉按其心淨等級之高下。可知人於蕩滌之工愈力，卽心愈淨。心愈淨，卽親主愈近，見主愈明矣。偕達未聖王祈主曰：求主重化我心潔清，而重化誠直之神於我五內。使我靜歛心思，謹守五官，進於心淨之德。

第三端 真福之第八端 爲義而被窘難者乃真福，爲其已得天上國。同上被窘難而曰爲義，卽言信友能虔誠守誠，修士能謹慎守規，心存事主，力圖榮主，爲保護教理，拯救人靈，以致身罹艱棘，備受苦辛。則其人見義勇爲，雖未卽登天國，而已有分於天國矣。若身不能循規合禮，反怪同儕之輕藐，嘗毀以爲加我窘難者，曷足算哉。試思斯窘難也，果因爾之爲義，有以招之乎。

抑爾之不義，有以招之乎。今宜急改爾素行之非，以求見義明，而就義勇。向爲義致命之耶穌，求賜甘受窘難。 祝言

十一日 繼述宗徒之品詣

定像 想見吾主安坐山原，宗徒環繞。

特求 求主賜我宗徒之德詣。

第一端 地上之鹽 爾爲地上之鹽。同上鹽之爲物，能調和五味。使無味者有味，且可存物不腐。吾主謂宗徒爲鹽者，蓋欲彼調護人靈，使能有味於道義，免於罪惡之臭污也。今爾旣在修途，亦卽吾主所謂之鹽。然而於所屬之人，如館舍之子弟，家中之大小，及於所交諸友，往來酬酢間，果能熱神火，盡

知慧，使未肯敬主者，或怠於救靈者，幡然改悔，如鹽之化平淡爲美味乎。夫此事雖由聖寵，然令人知罪惡之臭穢，道味之甘馨，亦往往賴人調劑。求主賜我恩佑，或言或行，能如鹽之和味，以潤澤羣靈。

第二端 世上之光 吾主旣謂宗徒爲地上之鹽，又訓其宜爲世上之光。蓋斯世人民信奉邪說，不知正教，譬如居幽谷而藏暗室，其自處於昏黑也久矣。故吾主謂宗徒宜以真光照世，導人信崇惟一主，使人重覩天日。保祿宗徒曰：爾知我或在公地，或於燕居，銜悲以訓爾衆人，墮淚以勸爾各人，晝夜無停息。宗徒行實二十篇可知熱心修道者，宜隨地隨時，乘機參以法言異語，感動人心，增人愛主之情。誠以修德之靈，誦經默禱，內心旣滿天主寵光，遂油然溢於脣舌。所以與之交遊者，亦時得心靈照耀，不禁增慕德之心。

也。返問我身，自愧未逮。且屢省我於談論之間，有無缺失。

第三端 山上之城 主曰：山嶺之城不可隱，故爾光宜明於人前，俾得見爾

美功，光榮在天爾父。瑪竇五篇吾主斯言，明訓吾人或動或止，須常有懿行

令德，昭彰衆目，動人觀感。勿徒於言語之間，化導人修靈進善，以顯主榮也。

蓋勸人以言，不若勸人以行之愈爲可憑，其效愈神，其功愈固。今爾在家出

外，所有品行，爲爾長上者，旣不能指爾而謂人曰：可仿斯人而行。爾又不能

如保祿。宗徒謂人曰：爾可法予。如予法耶穌基利斯督。致哥林多人前書十

一篇，則亦安可徒托空談，而得爲他人矜式耶。聖濟彼良曰：吾儕不特務發

嘉言，更宜務修嘉行。尙其時以此言自勉，使人觀感我之善行，同歸於善。向

先行後言，諸德之表之耶穌。求賜能以善表化人。 祝言

十二日 謹慎全守教令

定像 想見吾主在山宣講，衆人靜聽。

特求 求主賜我珍愛規矩，而細心慎守。

第一端 守規之全 主曰，勿憶予來廢教法，予實語爾，天地未毀，斯教斯言，

一字一畫，將無空也。瑪竇十九篇吾主於斯明示己意，欲人敏慎於會內常

規，院中法令。誠以修道之士，所以別於世俗之人者，因其心誠愛主，脫卸自主之權。而凡起居出入，皆範圍於規矩中也。若不恪勤慎守，則欺人以自欺。恐於天主及教會前，亦難辭咎矣。當燭照爾心，細察爾行。爾於默想省察，忠敬若何。拜主誦經，勤懇若何。以及默靜端重諸規，謹守若何。求主仁慈，赦宥

爾罪。定志以後，倍矢忠勤。

第二端 循規之險 凡犯至微之誠，如是誨人，在天國爲微末。同上慎思此言，不第可知循規之益，抑且能明循規之損。多默更比曰：修士度生，出於範圍之外者，受大隕越。凡不避小過者，必漸陷於更大之惡。師主編一卷二十

五章爾若未免此病，當推究其源，以思塞絕。誠以此病之根，每由於內修之間斷，神業之怠荒。於是心志空虛，欲求人世之交，以自慰，往往借榮主爲辭，託愛人爲說，遂使神靈馳騖，將平素所守之規程，輕若弁髦，不以爲過。若是者，不但於己有害，且害及他人，因示人以不善之表也。既如是焉，則爾於同儕中，見有不甚循規蹈矩者，能勿再三警戒之哉。且求天主助爾奮志，善守公規。

第三端 守規之益 如凡躬行並教誨巨細誠命者，在天爲大。瑪竇五篇吾主之所謂大者，蓋言凡人熱心事主，切意修靈，大顯其忠勤剛毅之德。故居天國，有甚大之榮耀。且彼能以嘉言懿行，感化外人好善，輔助同人進德，亦可大慰吾主之心。今我思念於此，自當振心定志，卽至微至細之規範，亦無不一一恪守，以符主訓。求主加我神力神勇，始終無倦。聖若翰、伯爾各滿、一生慎守修規，卒成大德，克臻聖域。聖若瑟畢世潛修，不行異跡，惟盡分中之事，遂至聖德之光，普被宇宙。祝言

十三日 事主宜有熱心

定像 想見保祿宗徒訓人曰：爾宜熱心事主。致羅瑪人書十二篇

特求 求主賜我明識熱心之德，而能勉力修之。

第一端 熱心之德 敏速誠懇，恪行敬主之事，謂之熱心。按聖多瑪斯以熱心爲欽崇天主之一分，或又以爲愛主之一支。故熱心之行，雖不囿於忠慎守規之內，而熱心之德，卽著於謹肅守規之中。是以熱心之士，往往於會規教令，如見天主聖意，時時恪守，不敢稍違。多默更比曰：吾儕之熱心進德，本須日長，今苟得存幾分舊日之熱心，已視爲大事矣。師主編一卷十一章可知人無熱愛神火，其靈劣弱，不能勇登道岸，亦殊可憫矣。今我撫躬細察，恐初進時之情形，較諸今日，未免勤怠相反。宜自奮自責，復我善志，勿失熱心。

第二端 熱心之福 西國有歌曰：福哉善士，熱心長存，自天錫賚，殊寵殊恩。蓋人有熱心之德，其福樂殊足令人羨慕。一、靈魂潔淨，心志安和，有與天主

締交之樂。二、心專愛摯、凡事體劬勞、修途苦楚、及諸遏欲之工、悉變甘飴之味。三、主鑒其誠、行事多蒙寵眷。四、長上有所歡慰、同人有所矜式。五、德業日新月盛、漸積漸多、可望操守至終、以享永福。今我細觀此熱心之福、能享有其一乎。非因我始有熱心、日久冷淡、而心神焦涸乎。求主聖心之火、焚炙我心。定志以熱心修士、爲我表率、奮志力行。

第三端 淡心之禍 多默更比曰、汝若始行寬縱、將卽不善矣。修士之怠忽冷淡者、覺苦上加苦、觸處受窘。蓋旣無內慰、亦阻得外慰。修士度生出於範圍之外者、受大隕越也。師主編一卷二十五章觀此、則惰士淡心之禍、旣可懼而亦可憐矣。蓋人心旣淡、則靈雖多垢、無心磨刮、自然求平不得、求慰無從。任修途之職、不知道味之滋。外雖服勞、內鮮實德。而其有始無終、辜主恩

召之危，尤足令人驚惕焉。思及於此，務宜改我淡心情志，就正神師，隨其指引。更宜切求天主，增我愛火，助我熱心。庶不空虛我志，以致功廢半途也。向耶穌聖心，求賜聖愛之火，灼熱我心。 祝言

十四日 人居窘難宜何如

定像 想見吾主曰：愛爾仇人，加恩於憎爾者。祈爲窘難爾者。瑪竇五篇

特求 求主賜我聖寵，使能領受主言，師法主表。

第一端 艱難之理 吾主立言行事，概與當時法利塞之詐偽，彼此相反。於是人皆仇恨，疊加誣害。今我欲爲吾主從徒，以效法吾主爲事。我之言行，多與俗尙不同，何惑乎世之憎厭我也。主曰：僕弗克先厥主，世人旣已迫予，異

日必亦迫汝。來日汝曹爲予必遭多逆，人將絕爾，而不許入殿。付爾於議會，鞭爾於公堂。兄付弟，父付子於死。爾爲予名，憎惡於人。若望十五十六篇瑪竇十篇可知我凡受人窘難，不但宜憂戚縈懷，反宜憶主遺言，振我心志。主曰：爾爲予被咒辱罵，殘害誣妄，乃真福者。受苦時可喜悅，蓋在天爾報優隆。瑪竇五篇我能肖似主行，偕同主苦，豈非樂事，大可增我身後永福。以此自勉，庶幾隨時樂受艱難。

第二端 居艱之訓 主曰：宜愛爾仇，加恩於憎爾者，祈爲窘難爾，詆誣爾者。瑪竇五篇聆吾主如此超奇之訓，亦可知當如何待我之仇矣。聖日羅尼莫曰：聖斯德望行之於先，步其芳踪者行之於後。是以致命者，當石擊刀鋸劍刺時，多有爲吏役求主者。保祿宗徒亦曰：人罵我，我祝頌之。人辱我，我爲之。

祈求。致哥林多人前書四篇聖教會明知吾主聖意，導人如何爲仇。祈主曰：求賜馴伏聖教諸仇，主俯聽我等。求主抑其威強，伏其倨傲。得如騷祿保祿宗徒之本名之墮馬失明，旣而認識主能，求救往罪，真心悔改，獲救己靈。我能如是行之，亦可謂忠於主訓，而有裨於仇矣。宜慎我言語，寧顯憫憐之意，無存報復之心。

第三端 居艱之表 聖奧斯定曰：吾主授人愛仇至訓，許人忍苦之厚報，若爲未足。又躬示人至德之表，受萬苦千辛，卒至身懸十字架上，猶爲己仇祈求。曰：父寬宥彼，彼實弗識所爲。路加二十三篇吾主爲天主子，實爲真天主。乃被彼日前受惠之人，冤害慘殺。而主竟待之以若此之仁良忠愛。可知吾人宜如何忍受世艱，而思奮勉於以德報怨之功，視苦如飴之學。向懸於苦

架、求父赦仇之耶穌、懇賜常懷主訓、常師主表。 祝言

十五日 戒慎志意之虛浮

定像 想見吾主謂徒曰、慎爾爲善、勿故昭人目、故欲人知。瑪竇六篇

特求 求主賜我明辨行事間、昭人目與悅樂主心之別、而行所宜行。

第一端 行事故昭人目 吾主既訓人愛仇處難、又戒人求慕虛榮、曰、慎爾爲善、勿故昭人目、故欲人知。否則無報於在天爾父。瑪竇六篇是以吾人行事之時、當端吾志向、使能求悅主心、而得有功。若惟圖人世虛榮、不但不得爲功、且招天主之怒。蓋人性自染原罪之後、求榮倨傲之偏、深入骨髓。故於起居動靜間、恒隱沾名之念、而漠無覺察。然此類之病、神師每比以美果之

蟲、嘉木之蠹、損人功德實多。所以聖賢時深惕勵、期符主訓。今我優游自適、不知戒慎。能無憂德業多傷、修途少進哉。求主明我神目、使能見我行事之蠹、而剔去之。日中每復我事主之誠心。

第二段 行事求悅主心 爾目爲爾身之明、爾目瞭、則全身朗。同上吾主此言、蓋訓人肉身行事、必賴日司之明。靈魂動作、亦賴意向之歸。若意念貞純、心目惟注天主。庶幾事無虛作、可悅主心。故奉教者與修道者、常以天主爲居心行事之向。念念誠求、如與天主爲一、而以天主之心爲心。亦見其志意之高卓、修業之饒富也。主曰、天主鑒於心地之隱、致爾細微之事、庸常之行、以誠意之故、亦獲其功、亦膺其報。問我於斯、行之何如。欲得心靈明淨、非謹於省身防慾不爲功。尙其時時勉勵、向主曰、主、我心之主、我願日死於我、惟

活於爾。

第三端 惟求悅樂主心 人能以天主爲思言行爲之歸，固得志高功盛。然人能時時契主，天主外毫無冀願，無偏於自愛，無心於主賞，惟爲天主尊美，而虔誠事奉之。則若人之德詣，更爲何如。吾雖未能盡全此道，然不難求修此道。苟能修之於世，可望異日成之於天。保祿宗徒曰：一切尊敬光榮，依歸於惟一天主。致弟莫德前書一篇是則行事間，時宜復新我善志。倘逢佳時，順境，有倨傲虛榮之感，可效聖伯爾納鐸。謂誘惑者曰：我未嘗爲爾始其工，我亦不爲爾終其事。向在山訓衆之耶穌，求賜於諸事，惟圖悅樂主心。 祝言

十六日 天主經第一第二祈求

定像 想見耶穌教誨衆人，徒等靜心傾聽。

特求 求主賜我明悉天主經義。

第一端 天主經之引言 吾主既貶法利塞之虛偽，喜於衆前顯行祈禱。又與人祈禱規則曰：汝祈禱，勿若偽善人，亦勿若異教人。彼言語煩多，以爲冗長，可得所求。汝求當如是曰：在天我等父者，我等願爾名見聖，爾國臨格，爾旨承行於地，如於天焉。我等望爾，今日與我，我日用糧，而免我債，如我亦免負我債者，又不我許陷於誘惑，乃救我於凶惡。亞孟。瑪竇六篇天主經爲經中最貴，最愜主心，最益吾人，我已知之。然能盡誠以善誦之乎。今欲善誦之，可逐句思之。曰：在天我等父者，蓋主首教人誦經時，宜收斂己心，舉志於天。

與天主相語。繼則訓人既稱天主爲父。自宜深恃怙之情。後示人心懷愛德。宜與人同德同心。彼此祈主。故不曰在天我父。而曰我等父也。謝耶穌教誨之恩。求救我無心誦念之非。思何以遵主聖訓。

第二端 天主經第一求 我等願爾名見聖。天主之名。卽天主及其諸美諸善之稱。求主名見聖者。卽求天主顯榮普世。人皆信識事奉之也。在此一求。提醒吾人受造之終向。在世之首務。宜欽崇榮顯天主。聖主名於己身。及於世人。且我力本柔弱。無能爲此。求主賜佑之意。亦蘊於其中。故求榮聖主名者。初未嘗忽於己身之急也。問我榮聖主名之功何在。聖伯多祿曰。以爾良心純潔。尊聖天主於爾心。前書三篇我能以心靈之淨。聖主名於身乎。經又曰。人見爾美功。光榮在天爾父。瑪竇五篇我能端品詣。飭躬修。語言行動。感

人於善、聖主名於人乎。求俾普世讚主聖名、自茲迄無窮世。聖咏一百十二篇

第三端 天主經第二求 爾國臨格。誦此一句、一、求天主聖寵之國、願天主降臨我心、如人君臨御國都、治我靈魂、每事引導、不致錯誤。二、求主天堂之國、願死後升天、得見天主、享無窮福。三、求主廣傳聖教之國、賜聖教大行、普世人民共履天堂正路。俾心思念慮、動靜言行、咸受制於天主。用我才學、盡我力量、隨機乘便、引勸他人。庶有一日如聖經所謂、無一不歸聖教、而見天國臨格焉。 祝言

十七日 天主經第三四五祈求

定像 想見耶穌訓人誦禱。

特求 求主賜我善行祈禱之恩。

第一端 天主經第三求 爾旨承行於地，如於天焉。吾主於此，訓所求之事，愈爲純美，愈增主榮。蓋願全遵主誠，全行主旨，如在天神聖，與主聖意，毫無離間。且欲臻斯德詣，知己力不足，願主賜佑。斯意斯求，實極美極善。修道者承行主旨之責，較平常信友，尤嚴尤重。然苟誠心力求，其事亦殊覺易易。居常，明識主旨在修規之內。遇變，體量主旨在長命之中。仰賴主寵之扶掖，勉效益友之善表。庶幾契合主心，順承主旨，宛若駕輕就熟，不覺爲難。則雖身居世間，而心已遊天上矣。謝主恩寵，求諸聖人輔助我全行主旨，務於守規聽命之時，恒有敏速剛毅愛慕之情。

第二端 天主經第四求 吾主既訓人求爲天主光榮，又教人爲己而求。曰：我等望爾，今日與我，我日用糧。用糧者，卽內外所需，肉身度命之資，飲食衣服，并靈魂立功之助，寵愛恩佑等是。日用糧者，示人不論貧富，每需天主賚錫也。今日與我者，訓人求主，每日所急需，勿過慮乎未來也。回溯我受生之後，更念我入德以來，年復一年，日日在天大父，與我無數恩惠。而我竟不思感恩報德，惟逞饕嗜私情，不亦大負主心哉。當讚主仁。求主赦宥。飲食時，留神向主，謹誦前後之經。

第三端 天主經第五求 而免我債，如我亦免負我債者。誦此一語，求在天我等之父，赦我罪惡，免我罪罰。吾主耶穌固許吾人將得天主恩宥，然亦命吾先宜恕宥他人。曰：倘爾宥人之過，在天爾父亦宥汝罪。汝不宥人，爾父亦

不汝宥。瑪竇六篇故既訓人求主曰、爾免我債。又曰、如我亦免負我債者也。我日誦此經、日求主赦、而仍恐獲益無多者、何哉。因昧於責己、明於責人、不能強恕而行、邀至仁之主之眷顧。則自貽伊戚、無怪天主亦不免我債也。今於在天大父前、痛泣已非、用心抑制己情、不恚人無禮於我、不懟人有犯於我、庶幾幸承施救之恩。 祝言

十八日天主經第六七祈求

定像 想己身在諸徒中、聆主教誨。

特求 求主賜我誠心受教、行事謹遵主訓。

第一端 天主經第六求 又不我許陷於誘惑。吾人在世、或從邪魔、或從世

俗，或從肉身私欲，隨時隨地，常多誘感之端。故吾主不教人求主，盡免誘感，惟訓人懇切求主，免猛烈之誘感。並求主賜能識破誘感之詭計，及時將四末悠永之理，以鎮制我心。又求賜於被誘時，能不忘祈禱，遠避罪機。更求賜豐裕之寵佑，使不但能不陷於誘感，且能於誘感中，獲取神益。如保祿宗徒曰：忠信者天主，不許魔感勝爾之力，惟欲爾自誘獲益。致哥林多人前書十篇。然我之求於主者，免陷誘感。而主所欲於我者，不自信自恃，不投誘感之機，不冒陷落之險。且欲我於誘感時，急行祈禱。倘誘感一時不退，卽以之訴於神師，從其指引。問我於此，畢竟何如。須虔禱主恩，一如上文釋義所云，誘感時，不忘謹行主訓。

第二端 天主經第七求 乃救我於凶惡。在此一求，言簡而義富。蓋謂人宜

求主救已於肉身之凶惡，如疾病飢寒，兵戈荒疫，迅雨暴風，天災時變，水火盜賊，艱難冤誣等是。且救已於靈魂之凶惡，如干犯重罪，失落聖寵，及負重罪而死，受主公嚴審判，罰於永苦地獄等是。試問我誦此句經時，求主救我於靈魂之凶惡，能真切虔誠，如求主救我於肉身之凶惡乎。倘主欲我稍受世艱，能安心含忍，而無挫志怨怒之情乎。多少信人，未免此病。須求主救我於凶惡，更求主賜我於凶惡中，轉得幸福，而不失凶惡中所含之益。將吾靈魂肉身，生前死後，望於天主，悉在主經之七求，伏惟俯允焉。我當如何熱心虔誦之哉。

第三端 天主經之結句 亞孟。此總結上文之意，雖止二字，簡約異常，然能包含人心真實願望之懷。如曰，我願如是，我真真實實所願如是也。設同衆

念經時，一人高聲朗誦，其餘默默無聲，至末乃同念亞孟，亦與朗誦全念者同。以其皆有願望如是之真心實意也。故文僅二字，亦宜謹慎恪誠，不可草率誦過。瑪寶宗徒得受此吾主絕妙之經，而傳至今日，宜求主徒轉達，賜我既能知其奧義，更能獲其實益，而至終善誦此經。 祝言

十九日 積蓄資財之訓

定像 想見吾主坐宗徒中，訓誨衆人。

特求 求主賜我得積蓄靈魂資財之法。

第一端 恒存主寵 主曰，勿藏汝賄，勿窖諸地，在地縮敗蠹齧，賊穿穴竊。瑪寶六篇 死爲盜賊之最强者，死期忽至，將人生平所蓄千倉萬箱，劫掠一空。

俾人空手赴主臺前。而世之溺於財貨者，每日我何能於不多時間，可發大財，可享大名。於是榮華富貴之心，晝夜薰蒸，不遑起處。凡屬信人，不可如是。惟當從吾主之訓，藏窖於天，無縮無蠹，無賊之處。而務於不數年中，多積功德，以爲升天享福之資。然其訣不過有三：一、恒存主寵。二、心懷善志。三、安心含苦。按聖教信德之理，倘人身有大罪，而無聖寵，不論行何善功，皆爲天主所不取。若義人之功，賴主寵而行，悉能獲主酬報。一日之內，一月之間，不知積幾何珍寶於天。修道者既幸得此法，能不大動其感激之心哉。

第二端 心懷善志 吾人自晨至暮，凡飲食寤寐，誦讀服勞，往來酬酢，閑暇

散心，行事雖多，善惡不可預決。然志意果能聖善，斯在主前，乃得有功。保祿宗徒謂哥林多信人曰：爾曹或飲或食，或行他事，皆宜爲天主光榮。前書十

篇爲天主光榮，方可悅樂主心，立功主前。如是，人非癡愚，孰不欲用此便法，增己神魂財貨哉。故在早課時，務以心身百司言行，獻於天主。求賜正之淑之，引之治之。日中時念誦句，重新善志。惟願主名之榮，以修崇功峻業，以免外務分心。斯道斯法，至要至便。今我果何如乎。自深愧悔，定志謹慎行之。

第三端 安心含苦 昔聖師訓人，欲於不數年中，速成靈魂大富，多積資財於天。宜上思榮主，下思淑人，無時停息。且宜多受艱難，多負苦架，心安神樂，惟知服從主命。蓋困頓艱憂，十字苦架，實爲靈魂金銀之礦。我欲採掘，不需資本，不必遠行，隨地皆是，隨時可取。故每遇苦患臨身，遭逢不順，與其咨嗟嘆息，因外苦而生內苦，不如甘心忍受，聽主聖命，補己罪過。將吾所受之苦，合於耶穌之苦，盡獻於主。則更有榮於主，有益於身。今日爲聖味，增爵瞻禮。

想其因已愛德，多獲天上寶藏。慶賀之，祈求之。 祝言

二十日 山中聖訓之餘箴

定像 想見耶穌山原講道，衆人翹首以聽。

特求 求主賜我聖寵，俾諸凡行爲，悉符主訓。

第一端 戒人妄議 主曰：勿擬、擬、審斷也。乃不受擬。爾擬何若，爾受擬亦何

若。以某尺量度，以某尺量受度。爾兄細木在曉，爾明覩。鉅梁橫爾目，曷否。瑪

竇。七篇吾主於此，訓我無輕易擬人。因諸凡疑議，類多虛妄，且易干罪戾。誠

以我之疑議他人，概憑人之外貌，或測人之內心。殊不知人之外貌，固不足

憑，而人之內心，更不可測。惟天主始能明悉也。且我疑議他人，多出於妬忌

自愛諸私、見人細微過失、輒加訾毀、而自身大惡、反不知覺。以故我若有時欲藐視人、指摘人、當思吾主聖訓、以遏抑私情。曰、人之作爲、我目視爲不善、恐主前實爲功德、未可知也。且我修身改過、是所當務。人之言行、與我何與。倘我果能此道、不亦存仁寡過之一法乎。自訟前非、求主憫宥、而定志慎於將來。

第二端 戒行寬路 汝宜由窄門入。門之寬者、路之廣者、導於淪喪、行之者衆。引詣常生、門何窄、路何狹、胡獲之者稀。同上細味此數語、與以上諸訓、似不連屬。誠以吾主知後人或將妄釋經中奧旨、插以世俗之意。故以此申儆之、戒人毋誤會其教道也。修德者、原謂已入窄門、已由狹路。然於狹路之中、亦能寬縱、而行之有不等者。如熱心之士、忠於規格、守死善道、無廢初學時

之儀型。而淡心之輩，則作事因循，多隨俗尚，與俗士無甚異。自問我身居於何品。求主啟我明，迪我愚，引我於真路，恒存新進之心，時恐失於步履。

第三端 戒僞君子 慎防僞冒先知者人，渠就爾，外披羊皮，內爲殘狠。視其實，知其人。同上吾主於此，訓人不特宜避異端，及爲惡之人。卽同儕中，或不遵規制者，亦宜戒慎隄防。蓋沃壤膏腴，亦生莠稗，豈在修途者，盡人皆足爲我模範哉。且或有人正因學廣年高，更易貽誤同儕。主曰，視其實，知其人。故見有循規越矩，舉止輕浮，諛言訕語，傲僻忤人之輩，可憐惜之，而爲之祈求。慎勿奉爲師法，致有累於躬修。古有云，擇其善者而從之，其不善者而改之，亦庶幾乎不差矣。求護守天神扶翼。 祝言

二十一日 耶穌下嶺淨癩

定像 想見一癩者跪伏主前，祈主醫治。

特求 求主賜我有斯癩者祈求時所有之情。

第一端 癩者祈主 耶穌宣講後，欲以靈異之蹟，證已教道之真。其首顯之奇，乃淨一癩者。斯人雖向爲衆所厭惡，而其見吾主儀容，殊深倚望。乃趨赴主前，跪伏曰：主，若肯，輒克淨予。瑪竇八篇在此癩者之祈求，我可取法者有三：一、心謙而敬。跪主足下，認爲天主使者，拜爲天主子。二、信德活潑。知吾主能淨其癩，惟在心之一願。三、倚怙主仁，抑伏己心，以承主旨。今我諸凡祈求，果能有如此心情，亦將悅樂於主，易獲恩赦矣。謂主曰：主，若肯，輒克淨予。淨予於罪惡之癩，淨予於心靈之污。定志時勤心淨之修。

第二端 癩者痊愈 耶穌憐憫之，伸手撫之，曰：肯淨矣。厥癩應命遽淨。同上
吾主於講教煩勞之際，肯應此癩者之求，不嫌污穢，不厭煩勞，而怡然聽其
言，允其請。仁厚如是，不但時人觀主行爲，而良多觀感。卽我今日思主雅度，
亦覺不少師資。試問我於困苦之人，彼或有求於我，或求之不在其時，或言
貌偶有失節，而我果能藹然可親，以慈祥待之乎？抑輒形憤慍之狀，以偃蹇
遇之乎？且或故延時刻，以怠緩加之乎？若是，則我與吾主之模範，實多懸隔。
甚愧爲吾主之從徒。定志以後，務當紛冗之時，勉存和善溫良之度。

第三端 癩者感德 吾主纔出一語，而癩者竟於瞬息間，滿身潔淨。其感悅
之心，可想矣。耶穌阻其勿洩，惟命往司教前。且獻禮遵梅瑟命，以證於伊人，
使彼見此奇蹟，而仍不肯信者，罪無可辭。是人出，緣感激情深，隨處傳揚其

事。瑪竇。八篇。瑪爾谷。一篇。我於此有當知者。一。吾主聖意。力務迴避榮譽。惟願歸榮於天主。二。凡人受主恩德。宜效此癩者之知恩感愛。稱頌主仁。廣傳主惠。使人認識主。而愛慕事奉之。省我往日所行。能如是乎。向耶穌求潔我心。祝言

二十二日 療百夫長之病僕

定像 想見耶穌應接百夫長時。溫良慈善。

特求 求主賜我明識耶穌。熱愛耶穌。

第一端 百夫長之愛與望 吾主淨癩異跡。既動人聽聞。又啟人心目。時在城軍營中。有羅瑪。百夫長。得寵光之照。知耶穌爲造物真主。因一僕臥病將

危遣如德亞耆老，代求吾主療治。伊等詣耶穌，懇曰：斯人尙宜受斯恩德，緣愛吾民，爲吾會建造一堂。路加七篇此教外武弁，其所以殷勤憂戚者，不爲己之親朋子女，而爲一僕役，則其心之仁愛可知。既能不惜資財，代費醫藥，而罔克見效之下，甫聞主名，又能不顧僚友之訕笑，卽亟求吾主拯救。其愛真誠，其望懇切矣。况如德亞人之於羅瑪，未必中心誠服。今身爲羅瑪官弁，乃肯爲捐資建殿，抑何施恩之公，而意氣之豪也。夫教外一武士，其行詣猶能若是，何今之奉教者，修德者，往往於昆季之間，不能盡仁恕之道。能不抱慚無地耶。求主賜我愛德，行事間，不但醇厚待人，而且溫良御下。

第二端 百夫長之謙與信 耶穌入加法爾納翁，百夫長恭迎道左，謂耶穌

曰：主，予一僕臥於家，病痿苦劇。耶穌曰：予往治。百夫長對曰：辱主俯臨我宇，

曷以當之。伏惟特降一命。我家人疾病。必全愈矣。予有主將。而屬之。乃於我所統卒。命此去則去。命彼來則來。命僕爲是。罔敢弗爲。瑪寶八篇猶云。主爾爲萬物之主。不必履我寒舍。惟發一言。我僕即可痊愈。則其得主寵光。明識吾主全能至善。其謙遜之深。信德之固。倚主之誠。悉顯現於言語之間。我於誦禱時。信望倚賴之情。不見鼓動者。豈不知主能之大。主仁之深。而不思懇切求之乎。求賜我益明主美。領聖體前。每思主謂我曰。予往治。

第三端 百夫長得主褒獎 百夫長心懷懿德。言蘊真情。主心大悅。經紀耶穌聽之。愕訝。語從者曰。予誠語汝。國內未見信德若茲者。乃語百夫長曰。爾往。依爾信。予允爾求。厥僕卽愈。同上百夫長僕病旣得立愈。而本身又得主稱揚。其褒榮直傳至天地終窮。今聖教會司鐸與信友領聖體前。念卑污罪

人一節、常以其語主之言、心維口誦、以表信望謙恃之情。此其德之見報於主者多矣。今日爲聖女瑪達肋納瞻禮、求其轉求天主、倍益我信望諸德。

祝言

二十三日 信德之要、信德之尊

定像 想見吾主謂百夫長曰、依爾信、予允爾求。

特求 求主增我信德、愈得滋育諸德之功。

第一端 信德之要 信德爲天主之神恩、萬德之根本。人有信德、能知天主至尊無對、本性無窮美善、又能明識己身生前死後之意旨。保祿宗徒曰、無此信德、人萬不能悅於天主。致厄白勒人書十一篇萬不能立超性功德。天

主欲速人功德之修，卽於領洗時加以聖寵，並賜以信德神恩。然此恩究係天主所賦，不緣人功而得。故保祿宗徒又曰：爾等以聖寵，以信德而獲救。然此非屬爾功，乃天主之恩。致厄弗所人書二篇信德既爲諸德之根本，諸德因此而發，則信德愈大，諸德必因之而愈盛。是我當務增益信德也，明矣。益之之法，一宜虔祈。如宗徒向主曰：願增我信德。路加十七篇二，宜運用。屢發信德之情，萬事皆以信德爲本。如保祿宗徒曰：義人活於信德。致厄白勒人書十篇。至其運用之工，宜思天主時時在監爲尤急。若能以此主監之理，透徹我心。行見祈禱愈能虔切，行事愈易有功。遇順境，則溫恭謙讓。居艱困，則剛毅忠貞。卽於細微事務，亦能誠志慎行，常得立超性之功。求主增我信心，賜我常不忘主在監。務於起居動靜，每以此念縈懷。

第二端 信德之尊 人有信德，不但得爲耶穌弟友，尊於世間之人。卽其心目志願，亦尊於流俗遠甚。誠以有信德者，其心常務永遠真福，誠求不朽於天。視富貴如浮雲，等榮華如朝露。其目願見天主無限美善，歆慕天堂無窮榮福。是其心與目，皆因信德而俱尊矣。若其意願，則心不動於勢利，志不搖於物欲，堅強不屈，果敢有恒。雖刀鋸桎梏，碎骨紛身，皆不足奪其敬主救靈之意。念及於此，吾人孰不願增信德，以裨益躬修耶。保祿宗徒曰：自察爾身，果爲據於信德乎。致哥林多人後書十三篇爾旣信靈魂之業，當先於萬事，且信天主無微不照，又信人無祈禱之功，及澄心滌慮之德，終不得成善士。然則爾之功行，何不與信德符合耶。自謙自訟，求主憐憫。獻己善志，懇主恩佑。

祝言

二十四日 命孀婦子復活

定像 想見一孀婦子亡悲慟主命復活以慰之。

特求 求主賜我識聖心至仁至慈益深怙恃之情。

第一端 耶穌途遇出殯 吾主淨癩療病聲聞藉藉今又顯一異跡輝光愈

增。卽於大衆前命一死者復活。經紀耶穌至納應城門徒暨衆偕行。正臨城

闔。適遇出殯死者係一孀婦子都人大會送葬。路加七篇觀此扶柩出城哀

哭情形。可知人於世間求福望子孫之成立者皆爲空幻矣。是婦於子歸之

時。本期偕老。奈倡隨未久頓失所天。哀哉傷已。然幸有孤子。倘能中道不殞。

庶幾肯堂肯構。他年重整門庭。克有含飴弄孫之樂。乃花未開而遽謝。木未

榮而先彫。多年撫養之勞，期望之切，悉付流水。子然嫠婦，形影相憐，嗚呼慘矣。第人世間事，何特此婦爲然。我能早返迷途，知以無定世榮，易無窮天福，豈不甚幸，喜慶實深。更須戰戰兢兢，日圖實德之進修。

第二端 耶穌命死者復活 先耶穌行者衆，近城門，見出殯諸人，遂皆寂靜無聲，注目於母送子葬。夫嫠婦哀傷孤子之亡，最足令人動心。故耶穌當此情景，不禁惻然曰：母啼，乃近撫柩，昇者止。主朗聲曰：穉子，命汝活起。死者應命起，乃坐乃言。主携付厥母。同上此婦與主素不相識，又未求主施救，主乃慈憫至於斯極。若我不識主心，不怙主仁，豈非恨事。我嘗謂欲復我曩日熱心，欲勸人回心改過，非聖跡不可爲。然亦何妨於吾主前，求斯聖寵之奇跡哉。既見吾主救人肉身之苦，乃不求其周我靈魂之急，毋乃侮辱主心乎。聖

師論主復活此子。爲其徒等將來喚醒靈魂之像。且吾主命子復活。實爲其母。故我倘有所求。時賴聖母轉達。將見所求者。必愈有可恃也。

第三端 耶穌被人稱頌 人見吾主仁善權能。爲古來所未有。皆駭愕稱羨。天主曰。先知大聖降世哉。天主眷顧其民哉。同上本性超性之中。天主之德能仁愛。顯行奇跡。寵惠吾人者。無數。我今不宜徒然旁觀稱異。須效時人之頌揚主德。感念主恩。且宜以我驚奇圖報之情。乘機勸勉他人。愈盡我感愛之分。問我至今。行之何如。求聖母轉達。助我身靈諸困。 祝言

二十五日 若翰遣徒詢主

定像 想見聖若翰被厄落德羈囚於獄。

特求 求主賜我識聖人堅恒含忍諸德。而知仰法。

第一端 若翰遣使 經紀若翰居囹圄。聞基利斯督異行。使二徒往詢曰。爾其當來人。抑尙待他人來。瑪竇十一篇若翰斯問。其疑耶穌爲救世者乎。曰。非也。其知主最深最切。斷不稍有疑貳。或爲身羈牢獄。隱憾吾主之不救乎。曰。亦非也。蓋爲義而被窘難者。乃真福。若翰知之甚明。其所以遣徒者。欲使徒得見吾主。能識吾主。而歸附之也。夫若翰志切主榮。功高德懋。身拘縲縶。事與心違。雖吾主置若罔聞。而若翰依舊恒心含忍。堅固信德。不損神火之熱。不減本分之功。我也過多功寡。稍逢艱棘。絲毫不適。卽覺志敗心灰。或出怨言。或發愠色。凡愛主愛人之事。缺而不行。不亦大可鄙哉。深心愧悔。定志於艱困中。持心慷慨。

第二端 主答使者 若翰使者來問。耶穌不答以言，乃在其目前顯多靈異，一如依撒義亞先知所紀。三十五篇後又示以先知之言已驗，已卽爲基利斯督。因語之曰：歸告若翰，以攸聞攸見。瑪竇十一篇觀於吾主所行，可知欲人知我爲天主之子，聖人之徒，語人以言，不若示人以行。夫天主至潔至清，至仁至聖，而先聖先師，德望崇隆，躬修純粹，我奉其名，遊其門，而不法其懿行，亦將焉用我乎？且我欲成敷教淑人之業，若能先行後言，行見我言之效，愈速而愈神，可不勉哉？務修堅實之德，不忘保祿宗徒之言曰：天國不在言而在德。

第三端 主讚若翰 若翰使者返。耶穌舉若翰語衆曰：汝等適彼曠野，出視何物，其風搖之葦乎？衣柔衣者乎？出視何物，其先知乎？我確云，彼尤大勝先

知者。路加七篇世人褒獎。惟在外觀。故雖有所稱揚。大抵難免阿諛虛僞。惟得天主稱賞。則榮耀始覺非凡。然欲求天主稱賞。亦惟效若翰之令德。堅我善心。克除私欲。可耳。夫我之所行。誠如吾主所云風搖之葦。操持靡定。情欲叢生。倘於此而不遜志謙心。急求改轍。可乎。今日爲聖長雅各伯瞻禮。念其先爲若翰門徒。後爲吾主宗徒。求其助我效法若翰之德。爲耶穌之徒。 祝

言

二十六日 吾主聖跡之效不同

定像 想見多人環侍耶穌。或譽或毀。

特求 求主賜我聖寵。時深謙遜之心。

第一端 吾主聖跡，光照誠直之人。吾主在若翰二徒前，多行靈異。後又顯一奇蹟，時有獻負魔人，既瞽且啞。耶穌愈之，使能見能言。衆愕曰：斯人詎非達未子救世者主。瑪竇十二篇人靈負有重罪，與此病人無異。一屬魔權下。若竟負罪而死，身靈永爲魔有。二、心目瞽盲。不知罪醜，不明罪罰，不憂罪害。生前死後，實受無盡災禍。三、亦爲瘖啞。瘖於誦經祈禱，瘖於請教師長。時或瘖於真全告解。夫世人負罪，而靈若死者，多矣。我亦嘗遭此患，今蒙救治，是乃主之寵恩，主之仁惠，我能不稱揚感謝之乎。勉避瘖魔之害，告解訴心之時，留心誠直。

第二端 吾主聖跡，硬驕傲者之心。吾主愈病驅魔之跡，昭彰衆目。平心而論，自難掩其全能。獨法利塞與明經士，驕妬迷心，一如濃烟障目，雖得朗日

之光亦難明視。曰：斯人驅魔，惟倚諸魔魁，白爾責布耶。蘇斥其謬曰：婆殫若互迕，其國曷克立。同上人心痼於私欲，往往訾善而毀真，妄證之戒，吾當時時自省，勿致躬蹈此弊，而爲吾主訶責。若夫吾主之闢誣正謬，語言爽徹，意氣和平，尤爲吾儕所當效法。故有時辨誣明義，不致世人逞其狂言，不令斯民惑於謗語，可婉辭和氣，辨白其非。如是，則爲愛主愛人，亦可免暴戾忿怒之譏矣。求主免我驕傲嫉妬之患，常思加意隄防。

第三端 吾主陟謙遜者黜驕傲者 主曰：予揚聖父天地真主，蓋啟斯指其教道於世之小者。瑪竇十一篇吾主此言陟舉樸實忠誠，謙心受教之細民，所以勉勵世之微賤者也。繼謂誣己之法，利塞等人曰：蝮蛇種，爾爲惡，曷能言善。十二篇吾主此言，嚴責若人之驕詐。終曰：禍哉哥羅撒，因禍哉伯撒依。

大○皆○加○理○勒○亞○城○名○於○汝○攸○行○奇○異○若○行○於○底○樂○暨○西○多○外○教○城○名○彼○已○披
麻○蒙○灰○而○悔○改○加○法○爾○納○翁○汝○詎○舉○於○天○汝○將○黜○於○獄○蓋○於○汝○攸○行○奇○異○行
於○索○多○抹○古○城○名○因○淫○惡○之○故○被○火○焚○燬○恐○存○至○今○日○故○謂○汝○審○判○日○索○多
抹○地○更○見○寬○恕○於○爾○瑪○竇○十○一○篇○吾○主○此○言○嚴○戒○斯○城○之○辜○恩○怙○惡○我○承○主
寵○殊○多○欲○免○其○屏○黜○須○痛○絕○法○利○塞○之○驕○詐○無○論○有○何○年○壽○有○何○才○學○終○不
變○赤○子○之○樸○淳○祝○言

二十七日 瑪達勒納泣罪

定像 想見瑪達勒納當衆人席前垂淚耶穌足下。

特求 求主賜我如瑪達勒納悔罪之誠愛主之切。

第一端 瑪達勒納赴主 經紀有法利塞延耶穌於家，耶穌入坐。城中一婦向染不潔，聞耶穌坐席法利塞處，攜香液玉瓶，趨主座後。路加七篇此婦不但買入人家，而且在設筵之地，大衆人前，銜悲悔罪，以常情而論，似覺難以爲情。然因靈魂受聖寵之光，心熱愛主之誠，甘願在衆人前，自證回心悔改。故乘機前往，如恐失之也。須知天主仁智，每賜我立功爲善之機，又賜我補過蓋愆之便。我亦當果勇前行，隨主寵恩誘掖，勿愛情面難堪，勿慮旁人譏議，以致躊躇莫進焉。求主寵照先我，輔翼前進，既定善志，勿再猶豫，惟圖剛毅力行。

第二端 瑪達勒納痛悔 俯首垂淚，卽以淚滌耶穌足，握髮拭之，口脣親之，香膏沃之。同上瑪達勒納此行，觀其情形，察其心志，誠爲真全痛悔。蓋身蒙

不潔、抱咎良多、自不禁衷情熱愛、傾慕主仁。噫、是何善表也。我於神工座下、在代天主位之司鐸臺前、亦宜有此超情痛悔。我若稍知其益、必將汲汲以求、無稍疎忽。因真全痛悔之益、能全救我一生諸罪、免我應受罪罰。加主寵愛、增我神勇、易敵三仇之誘、易勝修途之阻、其益誠非淺鮮。求主賜我能懷此情、特於告解時、黽勉圖之。

第三端 瑪達勒納得救 法利塞宴耶穌者、睹此行、意謂斯人果先知者、應

知此婦素行何如、而悉其罪戾也。耶穌謂西滿曰、爾詎不見斯婦、予入爾室、爾未備水以滌我足、斯乃淚以濯之、髮以拭之。爾未口親禮我、斯乃自我入室、脣親子足不已。爾未備油以沐我首、斯以香液傅予足。故予語汝、緣其愛多、蒙赦亦多。乃謂婦曰、汝罪今釋、爾信救爾、可安心去。同上默想至此、自思

己力柔弱、心神昏暗、獲罪甚多。欲逃主怒、欲償我債、似乎無所措手。然吾主已授良方、曰：愛多、蒙赦罪亦多。故我今可以一二語、屢發愛德之情。曰：主、爲爾無窮美善、愛爾於萬有之上、求爾全赦我罪。昔有神師謂人能如此、雖無上等痛悔之心、已成上等痛悔之功、可不勉哉。借瑪達勒納向主求救我罪。

祝言

二十八日 汚魔復返舊舍

定像 想見有宮殿、既逐仇人、又被強奪。

特求 求主賜我聖寵、能知邪魔詭計而逃避。

第一端 仇魔思返 經記吾主爲瑪達勒納嘗驅七魔。斯魔既去、瑪達勒納

再不開己心門，許之復入。惜世人多有不效此行，故魔既驅而重返，罪已赦而復犯，爲禍實非淺鮮。吾主欲人知所警戒，乃指破魔計曰：污魔出人，必遊燥地。猶言聖寵潤澤之區也。覓逸弗得，乃曰歸，再入我從出之舊舍。瑪竇十二篇試問我求存聖寵，求保熱心，果似邪魔之用心乎。纔辦神工，纔行避靜，而悔過之心，行善之志，已不知其何往。殊不知魔計最狡，一疎防衛，難保不來。於是前轍重蹈，主寵復失，良可慨已。若早能虛心防禦，虔行祈禱，則靈魂之累，亦何至於此。須常誦曰：於魔隱計，主救我等。

第二端 污魔復返 邪魔不特懷禍人之惡意，且行害人之奸謀，往往引己黨類，同來攻擊。吾主謂其歸時，視舍空明淨飾，往携七鬼，比己尤甚者。同上此言魔數愈多愈狡，百計誘人失陷也。凡人喜怒哀樂，好惡畏懼諸情，或倨

傲自恃，或灰心失望，無路不攻，無謀不用。探人心單弱之區，以圖進取。嗚呼，魔常偵伺吾人，覓害人靈。而人乃不知察其行動，以防禦之。魔尙求同惡相濟，而人反不求天主，及神師之相助。驕泰因循，無心奮振，何怪乎魔之蠢然思動，復來剽掠我靈也。自訟自認，時深戒慎。業已蹉跎於既往，尙其防檢於將來。

第三端 污魔得勝 人或因自恃，或因懈怠，或因懼怯，啟魔門路，彼將與其黨偕入居，伊人之終，比厥始愈劇。同上厥終之所以惡於厥始者，因其人復犯前失也。前失復犯，則惡惡之心愈淡，信德之光愈晦，神靈之力愈衰，漸漸流於罪過之惡習，而愈難挽救。諺曰：習慣成自然，可不懼乎。故人於巨細愆尤，慎無再犯。如疾痛在身，假令月長日久，病根必深而難治。若夫修道之人，

如或習於疎慵溫淡，則教理愈闡，負恩愈重。其復振之難，較俗人爲尤甚。昔聖伯爾納鐸謂，若人欲回心轉熱，事有奇於死者復生。誠至論也。捫心自問，知所慎修。求主賜我再不復罹魔網。祝言

二十九日 論順主者之於親族

定像 想見耶穌訓衆時，有人告以母與昆弟至。

特求 求主賜我脫卸依戀親族之情。

第一端 吾主之親族 耶穌語衆時，伊母及昆弟立門外，欲與之言。人告之曰，汝母及昆弟在門覓汝。耶穌語告者曰，疇爲我母，疇爲我兄弟。乃伸手指羣弟子曰，斯爲我母，斯爲我兄弟。蓋凡承行在天子父旨者，卽爲我兄弟我

姊妹及我母也。瑪竇十二篇吾主此言，訓人切意於榮主救人之業，宜忘情於世事。且有時亦宜抑制其顧憐親族之心，以盡順命事主之力。故修道者之規箴，謂愛父母兄弟姊妹之衷情，卽由本性正意而發者，亦宜舉易超性之神愛。今我於家人親友來往時，果能遵守吾主之訓，體會吾主之意乎。求主增我剛毅之心情，專務謹慎於本性之舉動。

第二端 孰爲吾主之昆弟姊妹 主言凡承行聖父旨者，卽爲我兄弟姊妹云云。卽謂承行主旨之人，與吾主意氣相投，心相愛，聲相和，不啻連枝之誼。且其人存主寵愛，爲天主義子，而與吾主同一聖父。故主嘗謂瑪達勒納曰，往告予昆弟，詣加理勒亞。瑪竇二十八篇是則吾主於宗徒之身，認爲昆弟也。然則我於百思言行，當何如忠誠，翕合主旨，謹順主心。不但多得神益，更

得爲主之昆弟姊妹，而生前死後，與主和樂。問我斯德修於何在，有何進境。須常誦曰：至義至上至愛哉！天主聖旨兮，諸事望茲承行，且頌揚於無窮之世。并於守規順命之間，不忘翕合主旨之心。

第三端 孰爲吾主之母 主云：凡承行聖父旨者，卽爲我母。夫曰主母，是較主昆弟姊妹之親，更爲尊貴，更爲奇妙奧蘊者焉。教宗額我畧以化導之工，生基利斯督於人靈，使人識主愛主，而懷主於心，其人卽爲主母。斯母之稱，雖爲妙喻，而其功其貴，實不遜於生身之母。卽無訓人之職，聽告之權者，亦可求爲主母之尊。何以言之，蓋盡我所有之能，扶持傳教諸事，獻誦經默禱，苦刻補贖，與祭領主諸功。望主賜外教者棄邪，異端者歸正，使基利斯督生於人心，長於人靈，普世之人，皆爲基利斯當是也。問我果否如是行之，求本

日聖女瑪爾大轉祈吾主。 祝言

三十日 播種之喻

定像 想見吾主坐舟宣講，衆人立岸以聽。瑪寶十三篇

特求 求主賜我聖寵，能明主斯喻所含之意。

第一端 種下道側 吾主講教時，每多取喻，動人聞聽。經載時民衆自諸邑集，從耶穌。主喻曰：出種厥種，種時或下道側，且踐，且鳥啄，或下礮礮，地勢無潤，旋生旋枯。路加八篇此段喻義，吾主旋自解之曰：種，乃天主之詞。下道側，爲來聽後，魔奪詞於乃心，使弗信，弗昇天。同上可知默想主言，體味主道之餘，阻我神靈獲益者有二。一、神情寬縱，任邪魔劫奪主所布之嘉種，所賜之

善願。二、心志枯槁，使天主之種，不得深入生根。今我捫心內省，恐心放神枯之病，亦時有所不免。當求天主恩佑，使我善行省察之工，斂我放心，益我熱心。

第二端 種下叢棘 或下叢棘，棘並生覆萎。主爲徒解曰：下叢棘，爲來聽亦欣納。第世務財賄，佚樂覆善詞，弗臻成實。同上奉教者，救靈敬主，不免濁世紛囂。是雖欲傾心盡力，納主言訓，而信德中既有荆榛蔽塞，何怪節外生枝，多般艱阻矣。設有人身既隔離塵垢，心志猶是紛紜，或戀無益之往來，或耽費時之誦閱，經心閒事，探聽新聞，志切於冠履衣衫，情縈於友朋親族。一如捨清幽，而好榛棘。雖有進德修成之嘉種，亦將爲茅塞而覆萎矣。今我果能盡免斯咎乎。求主賜我識徹魔計，而謹避分外之閒，是閒非。

第三端 種下良田 惟下膏地，稼一穡百。主又自釋其義曰：下膏地，爲來聽，蓄聖詞於良善心，且以含忍結實，或三十或六十或百。同上，又瑪爾谷四篇。聆吾主之言，孰不欲在此結實百倍者之數中。然依吾主，自有當行之事，宜存善良心志，遏制肉情之嗜，脫離物欲之偏。領納主詞，研求主訓，熱心切願，揣摹天主之旨，謹行天主之意。問我能如是乎。而今而後，知所勉旃。求主賜佑。 祝言

三十一日 聖依納爵瞻禮

定像 想見聖人受主榮冕，在天堂諸聖之中。

特求 求聖人轉祈天主，賜我善用主恩，不辜主寵。

第一端 天主聖寵奇於聖依納爵。天主於聖依納爵其恩其寵極爲奇特。蓋天主上智，自永遠選定聖人，創立修會，護衛聖教，攻斥異端，匡救羣靈。然聖人年已三十，身猶從事虛榮，及戰場受傷，幽房養疾。於是天主聖寵乃得措手，而肇其神妙之工。照其神靈，識破世榮虛幻，助其神勇，嚴行補贖苦功。潛居茫叻撒山洞，約期年之久，被魔鬼多端試誘，得天主無數殊恩，遂成精於內修之高標，諳於聖學之神師。著避靜奇書一函，爲人事主修靈之至範。然天主之意，猶欲其步武宗徒芳躅，繼行宗徒遺業，爲廣揚耶穌聖名之寶器，傳道淑人之矜式。於是寵牖其衷，使之奮志讀書，講求格物超性等學。賜以同志九人，皆學行兼優之士，與彼一心一德，同獻身靈於主，同誓精修之願，更矢順命教宗，遐方敷教。端基蒙養，訓迪後生，議定會規，進呈教宗。時教

皇保祿第三閱而歎曰。天主之指。其在斯乎。後聖人躬任總統。十六年治理新會。聖恩源源而來。會事蒸蒸日上。致忒理騰。大公會議。深爲褒嘉。沒後五十二年。卽得列入聖品。佑啟後人。此皆天主寵異聖人之明證也。余靈溯爾已往年歲。念爾聖召始終。亦蒙主逾格恩施。宜深感激恃怙之思。定志恒隨神光之導引。

第二端 聖依納爵。奇於善用主寵。聖寵之光。旣照依納爵之心靈。伊卽興苦刻神功。以補前失。以應主召。隱遁離家。挂劍於聖母臺前。終霄祈禱。哀懇轉求。換穿寡人衣履。棄俗甘貧。朝朝乞食。妄行總告後。所行補贖之功。誠有駭人聞聽者。旣淑己身。又熱救靈之火。故其講學讀書。精微考核。實爲人所難及。至於負笈從遊時。居心建樹修會。設立新營。以屏藩聖會。艱苦備嘗。筆

舌難罄。然聖人剛毅怙主之心，堅於金石。每於繕寫會規時，澄心齋禱，涕泣哀求，望賜於典律點畫，皆合主旨，以愈顯主榮爲務。而此愈顯主榮一語，筆之於會典，約有三百六十次。亦可想見聖人之善用主寵，惟思榮主，而心無他意焉。我可深心效法，時以主寵爲我疑之析，我憂之慰，我靈之勇，力務主榮於世，庶享主榮於天。向聖人虔祈轉求天主，賜以愈顯主榮爲務。祝言

聖人生於降生後一千四百九十一年，後於一千五百四十年，教宗保祿第三准定耶穌會修規，明年公舉聖人爲總統，一千五百五十六年逝世，一千六百九年初列聖品，後十三年正列聖品。

謹度首瞻禮六 七月

定像 想見吾主顯現於真福修女瑪加利大曰。汝視此心。如何愛人。

特求 求主賜我聖寵。能明首瞻禮六之終向。而務得其神益。

第一端 首瞻禮六之終向 聖教會欲其子民於每月首瞻禮六。加意虔誠者。正以涵養其恭敬聖心之熱誠。亦以崇聖心之敬禮。感聖心之恩德。且以引人獻聖心一月之始。得沾聖心一月之新恩。可見斯義斯向。實爲至美至正。我當以之縈於胸懷。日內善行敬禮諸工。更以聖心尊美。及其恩寵。置諸目前。庶倍我熱心。以愛慕耶穌。加我勇毅。以則效聖心也。求主賜我遵循斯義。定將屢向聖心曰。盡甘耶穌聖心。賜我愛爾日深。

第二端 首瞻禮六之神益 凡於首瞻禮六。分外熱心者。自能精進於善。以

獲主恩。多有聖工神業。本無必行之例者。亦能行之不倦。如告解。領主。拜聖體。望降福等皆是。專務修德者。有是熱心。尤知於是日。思慕耶穌。記憶自己。於吾主前所矢之志。并念吾主許於敬禮聖心者。種種殊恩。力務激發熱衷。以期霑渥。且知於是日。慨人世之無良。憐聖心之傷痛。將殫忠竭慮。思有以補贖之。安慰之。而日勉前修。故我於首瞻禮六。當思加倍熱心。且思引人同此熱誠。追溯居常道德。不見加修。神恩不能多得。非以視此首瞻禮六。一如他日。而不知專務懇摯以敬聖心乎。仰惟耶穌聖心。至謙至愛。願化我等之心。如爾聖心。并善行一日之工。無敢少懈。

第三端 首瞻禮六之功行 欲於此首瞻禮六。格外虔誠敬禮聖心。其當行之工。可舉者四。一、信友是日。概行敬禮諸工。尤務行之勤恪。二、沉靜心神。潛

思聖心傷悲，及其恩德，以圖酬報。三、益增神業，如敬拜聖體，及拜苦路等善工。四、預籌月內將修何善，以蓋前愆，以慰主心。以此諸條，逐一細思，堅定善志。求本名聖人，本月主保，與護守天神，轉達天主，賜我躬踐力行。 祝言

卷八 八月

月省之思 恒憶死期之訓 見卷十一初三日

首瞻禮六 敬禮聖心之意義 見卷五第二十題

初一日 熱心求天主光榮

定像 想見聖保祿宗徒訓人曰、凡爾所爲、皆當爲天主光榮。致哥林多人

前書十篇

特求 求主灼熱我心、切求天主光榮。

第一端 熱心榮主之義 天主性內之光榮、自無限量、不因人而增減。而其光榮之顯於外者、則在我等有靈之人。人若認其爲神形恩主、萬物真原、而欽崇之、讚頌之、全心全力以事奉之、則主榮之顯於外者增加。否則減少。故

熱心於天主光榮者，須殫精竭慮，讚揚天主，欽崇天主，事奉天主。且將此光榮天主之意，通傳於人，而充滿人心。夫熱心光榮天主，乃事理之至公至正者也。譬如達人子弟，其孝心所注，乃在榮顯其父母。今我之爲我，及我內外諸有，無一非天主恩賜。是天主爲我之大父，而我爲天主之子女。依至情至理而論，極宜求天主之光榮。我固如是否梅瑟。聖人謂主民曰：已忘造爾者天主。申命經三十二篇蓋聖人深怪人民之不榮顯天主，而明斥其忘主之罪，使速求天主光榮也。然則修德之人，苟心繫於一己之榮辱，而不思愈顯天主之光榮，不亦大可痛哉。今祈天主革除我自愛之偏情，凡念聖三光榮誦，定當加意虔誠。

第二端 熱心榮主之尊 上天下地之事，最尊最大者，莫如天主意中之事。

而天主意中之事，卽在萬物間，顯其光榮。經曰：予造斯人爲予。依撒義亞四十三篇卽爲予之光榮。保祿宗徒因此有言曰：或飲食，或作事，皆宜爲天主光榮。夫人以天主爲終向，而以光榮天主爲已事，則不但能光榮天主，且足顯其識見之卓越，心志之高超。故凡修道者，亟宜求顯天主光榮，更宜求顯天主愈大光榮。光榮天主於一己之身，乃獻我神形，隨事承行主旨。光榮天主於大衆之人，乃盡我心力，導人認識天主，欽崇讚頌而事奉之。在誦經默禱與祭領主之時，尤宜存斯善願。今我自思，果如是乎。求天主賜我爲榮顯主名之器，願時懷榮主之心。

第三端 熱心榮主之功 光榮天主之事，旣爲最貴，則知行其事，最爲有功。日後在天，最能增我榮福。經曰：人顯揚予，予將顯揚伊。衆王經一卷二篇我

苟思念及此，自當欣勤敏慎，熱我神火，不失榮主之機。是機也，隨地隨時，所在皆有。卽潛居一室，不出院門，亦未嘗無之。卽如於諸事，循規蹈矩，常以善言善行，感服同人，助同人進功修德，則榮主繕靈，淑已淑人之道，亦可謂盡於斯矣。聖依納爵恒圖益顯天主光榮者，聖沙勿畧丕揚耶穌聖名於遐陬者，爲我等祈，求爾轉達天主賜我亦能如是。 祝言

初二日 訓迪後生之務

定像 想見聖依納爵年逾三十，雜於童稚中就學。

特求 求主賜我智慧，又賜我熱心，能善訓誨所屬諸人，得皆爲天主之子。

第一端 訓迪後生之貴 前日行聖依納爵瞻禮，默想聖人行實，知聖人及

其同會士、除精修三願外、又發訓蒙之願。卽知訓蒙一事、至尊至要。我若有誨人之職、自當鄭重將事。蓋人品詣之善惡、德行之成敗、與夫靈魂永遠之禍福、皆賴少年時之教養、而以教誨爲根基。且國有明君、朝有良佐、校有名師、益友、家有孝子慈孫、在世爲端人正士、在天爲大聖高賢、無非童蒙時、得善教而造就之。故天下之事跡、雖有榮耀於訓蒙者、而勳勞實無貴於訓蒙也。思想及此、雖覺心煩志敗、亦能竭忠盡瘁、情甘於稚子叢中、以供厥職。今奉我身靈於天主、隨天主所欲、倘欲我終身訓蒙、亦所不辭。

第二端 教育宜行之德 訓學之責甚重、而其事甚難。欲勝其難而收其效、須切望天主降福、勤修當行之德。所最宜急修者、謹慎熱愛謙沖、及正心誠意數則。又宜勤於祈禱、庶得天主聖寵、扶掖我強、助我能革除頑童之梗性。

乖戾。在同堂同院中，更宜忠心聽命，以合長上之旨。和氣待人，以契僚友之情。如此，則行事之間，上下可無異致。至於當躬之操守，實爲童蒙進德之觀摩。尤宜形端表正，舉止動靜，皆循規矩。不求利己，惟求愛人。克己省身，無荒無怠。是則當務之急，凡訓蒙者不可不知也。問我於此，可無虧缺否。求主賜我恩佑，凡事能有益於後生者，不敢不行。

第三端 訓蒙當絕之弊 教誨後生子弟，有多可虞，而於年輕師長爲尤甚。是所亟宜謹慎隄防者，一、偏情之弊。逞未定之血氣，一堂之內，隨心愛惡，則意念多私。違犯規矩之行，恐將失之於不覺。二、分心之過。負方剛之氣，終日之間，任意見聞，則精神多擾。事主救靈之業，又將忽之於不知。三、失志之患。憑年輕之識見，小有挫折，乘勢頽靡，則操守多疎。曠職失召之險，更將伏於

無形。他若喜怒無常，寬猛過度，出言詬辱，行事乖違。種種愆尤，皆善於誨人者。當免之失也。日中可以此諸端，反躬自問，知所戒勉。聖依納爵爲孩提之訓誨，大啟後生仁智之奇人，求爲我轉求天主，賜我效法聖表。祝言

初三日 美種與莠稗之喻

定像 想見吾主取譬訓人，解喻誨徒。

特求 求主賜我聖寵，俾我明知主誨，有益於身靈。

第一端 喻言本意 天國比人布美種於田。役寐時，主之讐人來布莠稗於麥間而去。麥苗秀，成厥實，乃莠稗並興。役造厥主曰，主，弗嘗布美種於田，今曷有莠稗。曰，茲工我讐工哉。曰，主欲予往遽耨。曰，否，耨莠稗，莠麥或隨之。需

並長，以迄斂穫。乃命刈工，先刈莠稗，捆束置烈焚。爰收厥麥於我廩。旣而門徒請解喻意。耶穌曰：播嘉種者，人子。田者，人世。美種，係上國之子。莠稗，係惡神之子。布莠稗之讐，爲魔鬼。收穫，係世界之終。刈工者，天神。人子遣天神，將自其國，聚諸招人尤者，暨自爲惡者，投於火窖，有涕泣及切齒之所。時義人在其大父國，輝光如日。瑪竇十三篇按以上所言，我當感謝耶穌，布美種於我心。賜我聖寵，加我聖召，得免爲莠稗所蒙蔽，頹俗所沾染。然猶有大可慮者，須知此修德之途，讐魔每以怠忽之莠稗，暗播人心，以止其前進，敗其成功。故當時時勉勵己心，常以吾主所言世界之終，及審判以自惕。庶可望勤者之福，免惰者之殃也。求主賜我感情，及不自恃之心。并賜我宏量恒心。定志嚴戒世俗與邪魔之隱害。

第二端 喻言遺義 田者，亦譬如公堂修院。美種，卽向善勤修之士。莠稗，卽

冷淡失檢之徒。其性情乖戾，行事舛錯，每雜於善人之中，以不善之性情，惡劣之言行，煩擾善人，阻人進德。故吾儕觀於此，所宜慎思者三：一、爾或有司人之職，則見夫不善之種類，亟宜留心審察。切勿閉目不顧，任其滋長，害及善人。二、或爾無司人之職，苟見夫亂德之可惡，亦宜竭力勸懲。切勿出口相譏，致令人羞慚難受。又不可求主早爲挫削，以免煩擾。蓋主旣存之於世，則此生命未絕，仍有變遷之望。且安知非天主欲留之，以裨爾身修，卽成就爾含忍仁愛諸德也。三、求主光照爾明悟，反躬自審爾之所行，能弗爲莠稗之類乎。恐爾亦如主云，明覩爾兄細木附睫，而不見鉅樑橫爾目也。蓋自愛之偏，昏爾目眸，往往如是。觀於此，當知爾之心思行事，急宜修整者亦多。須臾

勉以圖於後。向布嘉種之家主，卽吾主耶穌，虔祈賜佑。 祝言

初四日 聖多明我瞻禮

定像 想見聖人跪在聖母前，虔誠祈禱，聖母以玫瑰經授之。

特求 求主賜我知聖人之德，效聖人之表。

第一端 棄俗甘貧 多明我聖人籍隸西班牙國，系出貴胄，學力聰明，出父師所望之外。并善於辭令，優於宣講之才，士民樂聞其訓。時法蘭西邊界，異端極盛。天主欲聖人作傳道之徒，廣化斯人。又欲其創立修會，教垂永久。爰召其離家棄俗，矢志精修。而聖人善承聖召，遂辭去榮華富厚，斷絕世俗塵緣。跣足徒行，素衣淡食，有時飲食不繼，沿途行乞。蓋聖人心知不脩苦刻，不

棄世物、不能活超性之生命、而爲天主之人。故其言行得力、德成大聖。立精修之會、培植後進。聖賢學士、相繼而起、大有功於聖教。實皆因其脫離世幻、以神貧輕世爲之基也。我欲希賢希聖、淑已淑人、而縈情世有、不亦難乎。求主賜我心死於世、死於已、而全活於主。屢思耶穌之言曰、凡欲隨我後者、宜棄絕自己。

第二端 克已苦身 聖人欲普救人靈、廣傳主訓、不特甘貧輕世、且深苦刻之功。保祿宗徒自謂云、吾主之傷痕、常印我身。耶穌之苦刻、週舉我身。多明我知其訓、法其表、故雖往來敷教、困憊異常、而持躬仍極嚴肅。膳不用肉、時守大齋。封齋內、惟用饅頭清水、以充饑渴。膚外常著襤衫、腰間不離鐵茨。每夜鞭苔已身、就地而眠、以石爲枕。余靈、爾不能如聖人之苦刻、然必能遏肉

體之偏私，行平常之補贖。更能戒爾五官，慎爾視聽，節爾口腹，恒以規矩束身。是亦苦身繕靈之一法也。求多明。我聖人，俾得苦身克己之善願，并屢以之自省。

第三端 寬仁熱愛 聖多明。我持已極嚴，待人極寬，極著其仁良憐愛於衆人。當時異端匪類，黨羽橫行，劫掠焚燒，勢不可遏。人雖百計圖謀，難消毒霧。卽以干戈從事，亦難遽息兇鋒。而聖人竟以意氣之溫良，語言之剴切，寬仁之雅度，惠愛之誠心，格化羣醜，返自迷途。若是者，何哉。因其心之熱愛，虔誠求主，勤修諸德，籲號聖母。故蒙聖母以玫瑰經授之，使人人得易於誦念，而獲益於無窮。爾欲得上天之福寵，以盡爾職司，成爾善功，須用聖人多明。我所用之法，成全爾之意願。 祝言

聖人生於一千一百七十年，後於一千二百十六年教宗奧諾畧第三位准定修會，聖人爲之總統，逝於一千二百二十一年，後十三年列入聖品。

初五日 芥種麩酵重寶之喻

定像 想像我身雜處人叢中，聽主講道。

特求 求主優錫寵光，俾我洞明聖訓，至於更善。

第一端 芥種喻 天國比之芥種，人以藝厥田。是種在萬種間，微渺之甚。惟長後，越踰諸蔬，成幹樹以棲戾天之鳥。瑪竇十三篇芥種，聖教會之像也。溯自吾主誕世，馴至聖神降臨之日，猶種之甚爲渺小。繼藉天主寵佑之恩，宗

徒布化之功，致命與傳教者血汗之膏，日增月盛，寰宇風行，如成大樹，蔭覆普世。不但愚夫愚婦，知所戾止，卽鴻才博學，厚祿高官，世上君王，無不翕然嚮化，倍切歸依。尋獲靈魂之平安，此世所不能與人者。夫此芥種，亦可取以喻修會。溯諸會祖創立之初，亦甚微細。嗣後賢聖挺生，駿德鴻功，相傳勿替。漸如樹之榦茂條達，令我蔭庇其間，以得安息。如是，我宜殫心竭力，續其遺緒，守其成規，以善禱善表，而保存之，一若嘉樹之勿翦勿伐。爾嘗思之否乎。問心可無愧乎。爾宜奇主仁善，欣喜感激。縈情於本院本會之昌大，以之託於天主聖母及護守天神。

第二端 麪酵喻 天國比發麪之肥，婦以之藏於三斗麪內，麪乃悉發動蓬起。同上麪有肥美之酵，以喻吾主聖體聖血。蓋吾主建立聖體聖事，一以爲

祭主之獻品，一以爲養人之神糧。我人領主後，屈留吾主在我懷內。其以超性德能，扶我本性柔弱。由是靈魂三司，肉身五官，及思言行動，皆得興超性之工。又使我神形契主，易於修德行善，以爲奉主之祭品。倘我善爲恭領，受此肥美之醑，則勳勞奮發，行見有蓬蓬勃勃之勢。神力則日見其強，神功則日見其進，不亦發越有光哉。思念至此，追悔我於領主時，諸凡怠忽，求主賜佑，助改前愆。復定我善志，恭行領主前後諸工，以得熱心大益。

第三端 重寶喻 天國擬重寶之藏於田者。或窺其端而覆藏之，不勝喜。必典已所有，以購此田也。同上吾主所謂藏寶之田，卽修道一途，藏諸德之珍奇，避衆人之賞鑒。若得聖寵光照，知其寶貴，而思購取，亦一大幸事也。回首曩時，購斯田，獲斯寶，卽入修會，誓聖願，如何神樂。然人世一日不離，卽躬修

一日宜勤。凡遇魔誘阻擾，及在聖召憂危之際，記憶前情，振作心神，勿致中途顛仆。但人力甚弱，有類水花風絮，浮蕩難持。宜向本月主保聖人，或護守天神，求賜恩佑。 祝言

初六日 美珠水族家主喻

定像 想見耶穌講道，衆人靜聽。

特求 求主賜我善聆聖訓，躬行力踐。

第一端 美珠喻 天國擬商人覓寶，偶見一美珠，必盡捐資市之。瑪竇十三

篇美珠爲品物之珍者，在金玉之上。夫寶中珠爲貴，德中愛爲先。愛爲諸德之王，獨可得天庭之寶。凡諸神聖，在天享福之多寡，皆準其愛德之淺深。愛

益深，靈益美，洵修飾靈魂之要德也。我於斯珠，既未勞力以採之，更未善價以市之。乃於領洗時，袖手得之。此誠事之幸，出望外者也。然亦知得之既易，失之非難。昔傲神失之，卽失天鄉。由是妒忌心深，遂日夜圖害我人。我人當如何戒慎，如何儆惕哉。今我明知斯珠之美，自宜加倍修此愛德。謝主賜我進教，得此愛德，宜屢發愛主之情。

第二端 水族喻 天國擬投網海中，聚水族各品。已滿，拽之岸側，坐而選之。嘉者納諸器，不嘉者棄之。世界終時，亦然。天神來別惡人於善人中，惡者投於火窰。同上夫網聖教會之像也。水族各品，係智愚賢否，上下君民之在聖教諸人也。又網爲修會修院之像，提綱挈領，羅致寰海士民。有志修身者，俱欣然樂入。然或有巧詐僞善之輩，不遵院中規例，不求精進善德，但欲任已。

私意。異日天主審判時，被天主廢棄，不大可惜哉。雖然，倘他人有過，聞諸耳者，不可言諸口。誠以外貌之好歹，不足定中心之善惡。汝或妄談人短，不將自陷非義，有傷愛德耶。經曰：爾何人斯，而判斷他人。雅各伯書四篇如是。思，自覺已德甚薄，警惕爲懷。求主賜我敬畏之恩，護我而憐我也。我今後當屢次自問曰：爲我良心之境，主將如何判我，我今如何度生。

第三端 家主喻 吾主既問徒等曾明悉諸喻否。對曰：唯。又欲訓徒當如何善宣己所明之道，謂之曰：在天國學士，如家主在厥寶藏中，發其新舊，以適子女之用，俾各得其宜。同上此吾主示人，凡有訓人之責者，不宜常用一事，常作一辭，令人聽之生厭。須溫其故而知其新，於妙本善書之內，探其精義，摘其名言。由是循循善誘，不憚唇焦舌敝，助人進修。凡有教育之責者，當隨

時尋求新法、使後生小子鼓勵振興。今我於斯、果何如乎。今日爲耶穌顯聖容瞻禮、當時宗徒伯多祿雅各伯若望見聖容光發如日、衣白如雪。今我求彼轉達、加恩賜佑。 祝言

初七日 鄉人異待吾主

定像 想見吾主在納匝勒公堂、訓誨鄉人。

特求 求主增加聖寵、賜我能獲主訓之益。

第一端 鄉人奇主 耶穌訓衆畢、返加理勒亞至納匝勒瞻禮日、入公堂、立誦先知依撒義亞經。既掩卷、講於衆人。在堂人衆、咸注目於彼、皆證其智慧、奇其嘉言彛行。曰、斯焉從何得此知識、誰與此智、奚得行此奇異。路加四篇。

瑪爾谷六篇、吾主離家敷教二年之後、乃復憶及家鄉、返納匝勒若干日、但非求親朋之會、博鄰里之榮、實爲顯己友愛之情、加恩於宗黨、使之心靈皆能得益。故凡修德者、無妨存故鄉之愛。而於鄉黨鄰里之中、施行聖事、訓誨同人。惟當念切救靈榮主、不縈心於戚友之酬酢、乃可告無罪耳。求主賜我救靈榮主、無往而不得準繩。吁、耶穌乎、使我隨處常求爾之光榮、及我神靈之生命。

第二端 鄉人侮主 納匝勒人始奇主行、而示尊崇。繼乃嫉妬主榮、而生侮慢。似以主之令聞美譽、爲己之損害。乃有謂之曰、斯詎非梓人若瑟子、母名瑪利亞乎。非雅各伯若瑟茹達及西滿之昆仲乎。今奚得如是、遂怪視之。同上又瑪竇十三篇、鄉人怪視之意、蓋謂吾主是何地位、乃竟妄自尊大、行學

士之行，而使當時欽敬之者，亦以學士相視。且謂吾主是何家聲，乃竟妄自稱奇，在伊等之前，講經論道。伊等心中，實有不能悅服。噫，納匝勒人如此，抑又何哉。誠以媚嫉之徒，必多傲慢。故見夫才學優長，事功卓著者，遂心存不悅。見夫身家無異於我，而聞譽乃過於我者，尤覺意氣難平。於是妒忌之餘，信口毀謗者，有之。忍心謀害者，有之。觀於納匝勒人之言，已見一斑。今我捫胸自問，其能免此沾染乎。求主賜我戒慎於此，不蹈此惡習也。

第三端 鄉人逐主 納匝勒人指吾主爲常人，而譏其家勢之衰，私臆其將大顯異能，多行奇蹟，以光耀於該鄉。奈因伊等存心不善，不應蒙主神恩。惟其然，耶穌曰：爾固將引諺，語子曰：醫，請自醫。聞爾曾賜大德於加法爾納翁。今可行於故土。主曰：我實語爾，從來先知者莫有榮於故鄉。在堂諸人聞之，

怒甚，遂起而逐諸城外。城建於山，携迨山巔，欲擠墮之。路加四篇觀此，可見人之私欲，有類火星之着，由小引大。若不早爲撲滅，將漸次殃及，勢必禍等燎原。返已自思，我平日修省，果能去私遏欲，杜漸防微乎。當以吾主所引之諺自語曰：醫請自醫。體味此言，如服藥石之苦，如忍鍼砭之痛，以治我心靈之疾。果能如是，庶幾怙主恩佑，萬不致病入膏肓，無藥可救也。 祝言

初八日 遣十二徒敷教

定像 想見十二宗徒環侍主前，主命往加理勒亞等處傳教。

特求 求主賜我聖寵，在此遣徒敷教之行，明其心意，裨益身靈。

第一端 主遣十二徒 吾主旣以神能，脫於納匝勒人之手，往布福音於鄉

邑。見民衆樂聞其訓，憫之。因其困苦流離，如羊無牧。謂徒曰：穡事多，傭工少，宜祈穡主，遣傭收之。旣而因其心切救靈，自集十二徒，耦遣之，令布天國福音。瑪竇十篇，路加九篇，此吾主遣徒誨人之事實。立後世修身敷教之型。凡我教士，忝從主徒之後，信主宜堅，愛人宜切，日夜以善言善行，講習陶鎔，灼熱我救靈神火，以爲修德之基。後宜存心濟世，講道勸人。又藉同人之助，行事有憑証，遇愛得慰藉，懷疑可剖析，到處有輔行。誠修士之要務，本性之急需。謝主聖智之恩，務於語言行止，皆足取證於人。

第二端 主訓十二徒 宗徒起行之前，吾主授之以權，能制羣魔，療諸疾病。後囑之曰：無聚金銀，無攜杖矛，無備行囊，無糗糧，無錢具，無兼衣。因工人應得其養資，爾徒手受之，亦徒手與之，凡入鄉邑，問其可主，則居之。無從此室，

入他室。人或弗納爾，則去其邑，且拂爾足履之塵，以証逆彼。同上此吾主訓人者四：一、倚主之誠，宜切也。因主既授人當行之事，必與人善行之法。二、利祿之心，宜忘也。蓋人能恃怙主慈，勤勞主事，主必助其困乏，不致衣食無資。三、當恒心苦克，毋出入無常，惟求肉身安樂。四、當取法善良，受人侮慢，不圖報復，惟宜耐心忍受。求主賜我明知主訓，而審慎於將來。

第三端 十二徒行止 徒等往游鄉里，隨處傳福音，驅多魔，以油傅多人而療厥病。及返，咸集就耶穌，備述其所行所誨。耶穌謂之曰：潛來僻處，少休路。加九篇、瑪爾谷六篇，此經所垂明訓，修道者可不言而喻。或因教務，或爲他事，奉命出門，歷時已久。比反，當謙恭謹慎，歷舉所言所行，復命於長上。繼遵吾主聖訓，幽居一室，恭默思道，以理心靈，自察寸衷，平居素行，果何如乎。求

主賜我舉止常契聖心。 祝言

初九日 吾主勗勉宗徒

定像 想見吾主在十二徒中、訓迪諄諄、堅其心志。

特求 求主賜我有宗徒之實情。

第一端 吾主預言 徒等奉耶穌命、數日間、遊行邊邑、宣傳主道、毫不見艱難侮辱。視其意、以爲傳教救靈、常得如是平安。是其識見之淺、而會悟之差也。可知。吾主欲早爲之防、乃預告以他日之艱難。謂之曰、予遣汝、如羣羊入豺狼中。瑪竇十篇宗徒聞主預言、乃知欲繼吾主傳道、欲爲吾主門弟、艱難險阻、有所難辭。我故於困厄之遭、亦當持以信德、而堅強不屈。蓋我旣繼續

主徒之任，自宜效法主徒之行。常思斯世之千辛萬苦，乃吾主十字架之小分。吾人七克之嘉會。正當甘心忍受，以增德立功。求主賜我愛苦之心，效法前人之表。昔有一修道會長，每日晨起，思日中有巨難將至，心恒忻悅。因身外之難，不若意中之難也。

第二端 若翰致命 時宗徒初出傳教，適有若翰致命之事。徒等聞之，後顧未來境遇，亦可逆料矣。蓋若翰畢生勤宣令德，事主救人，粹然絕詣。宗徒久已知之。吾主每在國人前，推賞若翰之嘉言懿行，宗徒亦共聞之。今因敬主之誠，被時王囚於囹圄。閱年半後，捨生致命，吾主竟無一言以阻。則是昔日吾主山中聖訓，有爲義而被窘難者，可得天上真福之一語，不啻爲若翰言之。而萬世致命者之心，亦可得所鼓勵。余靈思若翰致命，亦當振作心神，以

義爲利，以苦爲樂。人世之安危得失，漠不關心。如是，則舍生取義，殺身成仁。行見如若翰。聖人爲主，殉難於暫時，蒙主賜榮於永世。今我反己自省，畢生碌碌，果何爲耶。

第三端 吾主訓勉 主曰：爾首之髮，若非爾父之許，不落一莖。人能殺爾身，弗能喪爾靈。凡爲我而失厥生，將得之於永。又曰：世人旣已迫予，異日必亦迫汝。弟弗先於師，僕弗先於主，弟如師，僕如主，足矣。瑪竇十篇，路加二十二篇，慎思此言，我當以吾主常生永福之訓，銘刻在心。以宗徒剛毅忠貞之行，奉爲表式。庶幾自勉自勵，爲主佳弟，爲主忠僕，隨主共苦於生前，與主偕榮於死後。蓋主曾曰：吾父經營其國於予，予亦經營其國於爾。路加二十篇，向耶穌求賜我當時宗徒所有之情。 祝言

初十日 傳教人之居心

定像 想見聖保祿。宗徒曰：天主以吾儕爲新教之司，不以書而以神。致哥。

林。多。人後書三篇

特求 求主賜我凡行愛人救靈之工，須居心以德，而入得之神。

第一端 居心甘貧 上言吾主欲人繼宗徒，宜罹艱苦。今可思其訓人宜修何德，以繼宗徒之業，以成宗徒之功。須知從來修道人，最重之行，卽傳教者至急之務。聖經上真福有八端，而神貧推爲第一。故修道與傳教者，存心行事，總宜脫離世幻，不以利祿爲懷。主曰：爾徒手受之，亦徒手與之。瑪。寶。十篇

此訓人修神貧之德者，必易成救人之功。蓋人見我力行善事，毫無爲己之

心自然聞我訓言，易於悅服。試問爾於愛人諸工，或授聖洗於嬰孩，或報福音於貧苦，奉行聖事，能毫無利益之心乎。平居讀天主書，作天主事，果能於天主光榮外，別無所求乎。自思自省，慎無自欺。求主賜我淡泊自甘，惟以救靈榮主爲急務。

第二端 居心聽命 修道者不特宜棄利祿，且宜克除私意，惟長上之命是從。傳教者亦須如是。蓋教務原授自天主，天主藉長上之口，令人赴彼荷林。故適此適彼，所言所行，務須仰承長命，謹奉無違。然或有詐僞之徒，窺伺長上，曲意逢迎，外博虛名，內無實意，以求長上之歡悅。如是者，事多徒勞，端難望主福庇。臨終時，既不得如吾主曰：父，爾委予之工，予悉奉行。若望十七篇豈不愛無顏對主，而後悔莫追乎。求主賜我常存無欲之心，凡事惟從主旨。

卽遇有可以擅專之事，亦宜仰契主心。

第三端 居心克己 修道與傳教者，旣修聽命甘貧之德，尤宜立苦身克己之功。蓋不如是，則不能成愛人之事。如安慰憂苦，訓誨愚蒙，或連夜助終，或終朝問病，此等指引人靈之務，若非持躬嚴密，矢志精勤，豈不難哉。故人在修院肄業之時，早宜去私絕欲。雖於人不見不聞之處，亦常中矩中規。如是，則事主之誠，救靈之切，不待言而喻矣。且在主前，旣獨被寵光，人前復獨承教化，不亦大可幸哉。非然者，檢身不知苦刻，行事每多因循，安望能成己成人哉。試問余之素行何如。聖沙勿畧懷宗徒之志，效法宗徒之行。爾當念念不忘，并求之爲爾主保。

祝言

十一日 續想前題之義

定像 想見聖保祿。宗徒曰：神者致生活。致哥林多人前書三篇

特求 求主賜我以生活善工之神。

第一端 心清神潔 人於修道之工，愈致其力，則救人之效，愈易收穫。此昨與今兩日默想之旨也。然吾願有志淑人者，更進思之。而以行清神潔，神靈常契於主，爲當務之急。聖經紀主曰：爾宜爲聖，因子爲聖。勒未經十一篇又曰：人恒存聖寵，恒持聖愛，居於子，子居於彼，斯結多實焉。若望十五篇保祿宗徒曰：我雖通萬國方言，若無寵愛，不過如爲鳴金。致哥林多人前書十三篇猶言：惟可發聲，不可動人也。由是而言，我之心靈，宜常懷天主寵愛。自問平生，好善之心，何如誠。惡惡之心，何如切。懷清履潔，好自爲之。

第二端 仁愛溫良 凡爲主之弟子者，莫不以良善愛人爲先務。而此訓於傳教者，爲尤急。舉凡驕矜之氣，苛刻之心，務令克治維嚴，根株盡絕。聖史於斯記吾主之訓，隨在皆是。曰：予與爾新命，欲爾相愛，如予愛爾等。若望十三篇曰：法子，予性良善。瑪竇十一篇曰：加恩於憎爾者，祈爲窘難爾，詆誣爾者。五篇曰：予遣爾如羣羊於豺狼中，爾宜馴如鴿。十篇宗徒等聆吾主之訓，便能師法吾主之表。於是，雖豺狼成性者，亦得變爲羔羊。今我倘能以吾主之言行，朝夕奉爲準則，亦將見行化浹，人皆薰德善良。求主赦我暴戾之愆。凡當局卽有責人之分，亦須嚴以律己，寬以待人，心氣和平，藹然可近。

第三端 祈禱苦刻 祈禱與苦刻二者並重。一人若冷淡，疎於祈禱，而欲與主締交，立功修德，則難逾登天。欲化洽人心，助吾主救世之功，更非易易。蓋

救靈之事，苟非祈主助佑，則雖淬厲以圖，終覺徒勞罔效。故保祿宗徒曰：種
植者灌溉者無以成功，發育者惟天主。致哥林多人前書三篇二，聖賢曰：吾
主以寶血爲贖靈之價，此蓋謂吾主爲欲救人，故不惜捨己，首先立表，以作
千萬世傳教者救人之準。從可知非主聖血，固難救人靈，而非自苦刻，亦難
救人靈也。今我謂人心梗頑，不知向化，咎皆應歸於爾。何也，實爲爾祈禱與
苦刻，兼有所虧也。爾急宜虔誠懇切，祈主助我淑身覺世。 祝言

十二日 五餅二魚之異蹟

定像 想見宗徒在山，以餅魚分給衆人。

特求 求主賜我愛慕耶穌，益形純切。

第一端 異跡之機會 宗徒講教初歸，吾主携之曠野，欲彼少息。然不能禁

羣衆自四方追從。可知羣衆之樸誠受教，宜乎吾主見而憫之，誨以天國事
理。時人欣聞主訓，頓忘饑渴。薄暮，門徒前謂之曰：茲地荒寂，時已晚，請遣衆
往鄉邑市食。耶穌曰：不需往，爾輩可食之。瑪竇十四篇當思吾人之本分，宜
遵吾主之訓，先求天主國，天主義。瑪竇六篇外此衣食之需，身力之強，五官
之適，皆可不必要計。乃有心思念慮，日夜經營，一若謀生養命，實有急於事
主救靈者。噫，斯病也，不特庸常信友難免，卽身入修途者，亦有時難免也。惟
其然，我當於匱乏之時，存倚主之意。庶幾忘情世務，專志神功。

第二端 異跡之彰明 耶穌語斐理伯曰：何往市餅，可食茲衆。斐理伯對曰：

茲二十金市餅，散衆，每猶弗克獲一小分。時人衆，除婦孺，約有五千。徒中一

名安德肋者，卽西滿伯多祿之兄。曰：茲有小廝，携大麥餅五，魚二，此些微物，烏可給此衆。主曰：携來與我，又諭徒令衆人分隊坐草地，或百或五十。耶穌取五餅二魚，仰天祝謝天主，剖付宗徒，命給衆。衆旣食，且飫。徒拾餘零，盈十有二籃。瑪竇十四篇，若望瑪爾谷六篇，路加九篇。吾主以五餅二魚，飽飫男婦五千餘人。人謂此事，今日不能再見，每有願目覩斯奇之爲快者。然聖奧斯定曰：天主與人以播種之法，各處田疇，發生五穀，豈養普世兆民，爾豈不見乎。受此鴻恩，正宜感激稱頌。自今以始，飯前飯後，定志善誦經文。吃飯時，效法吾主常舉心目於天。

第三端 異跡之效驗 經記衆見耶穌奇行，曰：眞爲將降先知者聖。於是堅固其信，倍增其愛，無任忻喜依恃。耶穌知衆欲強爲王，獨身急步，再登於山。

若望六篇此餅魚之異跡，聖體聖事之像也。吾人或拜主於堂中，或領主於心內，亦當效法斯民之信，發歡欣愛慕諸情。今日係聖女嘉辣瞻禮，溯聖女在世時，倚天主之能，曾以半枚餅餌，饜餉五十修女。又敬拜聖體純切，曾捧所供聖體以退賊衆。此等異常奇跡，皆由熱心敬主所致。我宜求其轉達，賜我熱心敬主。祝言

十三日 餅魚異跡之夜

定像 想見宗徒深夜舟行，海中鼓棹。

特求 求主賜我於人世之艱，虔心倚主，安心忍受。

第一端 吾主昏暮之命 耶穌以五餅二魚飽飫多人。是日宗徒自晨至暮，

幾無甯晷。分食衆人，收拾餘零而後，將望夜靜人稀，少能安息。不知事有出人意料外者，經記耶穌迫門徒登舟，先渡，赴伯撒依大。馮爾谷六篇推聖經之旨，吾主不欲徒等俯從民意，尊已爲王。故先自躡步登山，獨行祈禱。吾主於此，正示人宜辛勤默禱，惟日不足，夜以繼之。另示修道者，一生恒多艱困，分當茹苦如甘。雖曰遇時不妨少休，而事有每難逆料。况復有時教事棘手，風塵跋涉，終日勤勞，雖至深夜，仍難就寢。彼冷淡者當此，憤恨之情，能無流露。卽或不然，亦必放其心思，縱其耳目，以求人世之安慰。彼熱心者則異是。蓋其平日存心，以苦爲樂。故值艱難當前，便思古昔聖賢，爲主曾忍多苦。今我所受，未能比擬其萬一。又思世俗諸人，塵世優游，似多可樂。乃或家庭拮据，或道路奔波，所有之苦，更難屈指。如是靜思，自克嗜苦如飴，堅心忍受。聖

方濟各沙勿畧每於困頓無聊之際呼號曰主尙願加焉求主賜我如彼雄心庶幾艱憂之際可法聖奧斯定自勉曰如畏辛勞而疑懼盍思此難由主賞錫卽踴躍前進矣。

第二端 宗徒星夜之勞 當夜宗徒泛舟係吾主顯命乃亦莫得浪靜波恬

之趣竟途遇狂風舟爲震撼雖極力支持終難赴伯撒依大埠吾主所示之區時耶穌見徒等以逆風故搖蕩海中鼓棹困甚瑪爾谷若望六篇瑪竇十

四篇吾主此行固陰庇宗徒使之得慶生全然不爲之止風平浪顯示保護何也聖若望金口解曰是蓋欲宗徒堅於信深於謙習於食苦諳於恃主且愈明於恩佑之需也今天主於我常有類於是者有時我奉上命實心實意竭志盡忠乃偏棘地荆天事多掣肘若此者惟當虔誠祈禱望主垂憐切勿

挫志灰心，自謂爲主所棄。更當平矜釋躁，守苦待時。庶主鑒此微忱，定必潛扶默助。蓋主所欲於我者，不在輝煌之業，而在忠懇之心。我能殫精竭力，勞於主事，鮮不獲主之歡心也。聖若望、伯爾各滿在世，恪守規矩，隨時隨事，翕合主旨。今日爲其瞻禮，求其轉達。 祝言

十四日 聖母升天前日

定像 想見宗徒環侍聖母榻前，恭送聖母去世。

特求 求主賜我聖寵，效法聖母，能得聖善之終。

第一端 聖母死無依戀 人之所以畏死者有三。其一，爲牽連世物之心。辨德經曰：人殫盡心力，多聚資財，滿望久享世福。而憶念死期在卽，中心酸楚。

異常。四十一篇聖母則不然。時方三歲，卽離父母親戚，世間萬有，早已棄之。卽已之身靈，亦全獻於主。一心別無動擾，惟願謝絕塵寰，得升天域。修道之人，自幼棄俗，拋親別友，專志救靈。倘能忠於聖召，行見去世時，亦一無眷戀，永得優游於安樂之鄉。豈不幸哉。今求天主，賜我神靈得如義人之死。數目經二十三篇復定我心，不牽纏於世上諸有。

第二端 聖母死無病苦 自原祖背命，而人始有死。死固世上至重之一罰，亦生前未了之一罰。惟其然，故將死之頃，五衷煩躁，痛苦難言。聖母一生，形清神潔，原本二罪，絲毫無染。故其死也，已屬分所不當。若死時之煩悶，又屬理所必無。經言聖母之死，無病無痛，一惟愛慕天主，斯誠確論也。余靈爾在生獲罪，將來臨終困苦，固知勢所難免。然果能立功修德，以補前愆，則死時

之疼痛亦不足患耳。再將每日思言行爲，奉獻聖母。向聖母曰，請求聖母於我死後，使我死之痛苦，盡變甘飴。噫，斯爲得矣。

第三端 聖母死無憂懼 知識經曰，人莫知己爲主愛，抑爲主惡。九篇聖伯

納弟諾曰，我體味斯言，每覺心寒股栗。蓋人於死後，不能謂必得永生。故於將死之時，心頭鹿撞，實多怖怯。聖母則異是，天庭寶座，早設於聖子之右。則其去世，卽所以升天，心中有何憂懼乎。余靈，天主雖未嘗示爾必得天堂，後顧茫茫，隱憂難免。然亦有可增爾望，壯爾心者。主曰，人爲子而棄其田宅，將享常生。聖教會諸聖大師咸曰，勤事聖母者，永不死。故當熱我衷情，致我禮意，以敬聖母。庶幾助我善生，佑我善死。一如聖達尼老。臨終時，聖母降臨，接其升天。今日爲聖母大慶前日，更宜倍切虔誠，以邀聖母恩寵。偕聖達尼老。

向聖母虔祈，得有升天之望。 祝言

十五日 聖母昇天瞻禮

定像 想見無數天神，護擁聖母，升天享福。

特求 求主賜我聖寵，能盡虔誠，行斯瞻禮。

第一端 聖母復活 聖母受天主福寵，極優極渥。肉軀死後，旋即復活，是爲格外大恩。據聖若望、達瑪塞諾所述，聖母將終時，耶穌顯大聖跡，使分行天下之宗徒，騰空悉返，羣來敬別。厥後聖身葬於熱色瑪倪山園，天神奏樂空中，三日而止。及撤，宗徒因多默之請，復啟塚開棺，則不見聖身，惟聞異香撲鼻。聖門諸徒，始恍然於聖母肉身復活，與靈魂同登天國。此端道理，雖非聖

教會定論、而聖教會未嘗不以是爲信。我宜偕天朝神聖、歌功頌德、以慶聖母復活之榮。吾儕之肉身復活、雖不能如聖母之卽在死後、然復活之說、萬無可疑。倘吾置身斯世、時謹躬修、則異日復活之榮、如操左券。由是以思、不將自深欣望哉。

第二端 聖母升天 安塞爾莫與伯爾納鐸二聖師摹寫聖母升天景象。謂

億兆天神、自天而降、整齊嚴肅、扈從聖母後、上出重霄。又有無數神聖、前來迎迓。見聖母光采奪目、不禁取古經之句、讚歎曰。娟娟如月、焯焯如日、威嚴整肅如蒞軍者、斯女爲誰。時聖子耶穌、亦在神聖間、恭賀聖母、引進天庭、登之寶座。衆神聖咸歌頌曰。榮哉福哉、聖母童貞瑪利亞、至尊天主之母。又曰、瑪利亞升天榻、其上衆王之王、坐於星宿座。余靈、當知爲母者之光榮、亦爲

子者之幸福也。聖母爲我等之母，我等見其光榮，自當舞蹈賡歌，大伸慶賀。更當思聖母如此榮福，所以超於諸神聖者，實因其謙卑耐苦，邁越於諸神聖也。吾儕凡遇神形艱困，一念天堂榮福，應知所以自勉。

第三端 聖母尊榮 聖母既升天國，天主聖三榮以冕旒，授以權力，定爲世人主保，立爲天地母皇。凡居涕泣之谷者，得哀憐之泉。可想斯時，普天神聖，同聲歡呼曰：亞·物·諸·天·母·皇·兮，亞·物·天·神·元·后·兮。申爾福，聖寵之母，仁慈之母，爾純美超越於衆兮。慶爾榮福獨隆兮，爾與爾子坐聖父之右，稱爾義也。爾王義也，諸德諸榮歸爾，永世之世，亞孟。我靈當奮我精神，會同在天神聖，盡我欽敬欣慕之情。再思聖母今得與主同榮，皆因昔曾與主同苦。故此日升天之后，卽前日致命之后也。爾宜細思體味，又聖母經之句義，而讚頌祈

求聖母。 祝言

十六日 天主寵愛之母

定像 想見聖母坐天堂至高之座，手執天庫寶鑰。

特求 求主賜我識聖母聖寵之富，而深敬慕倚恃之情。

第一端 天主聖寵充盈聖母 天神嘉俾厄爾朝拜聖母曰：亞物滿被額辣濟亞者。吾人欲知聖母聖寵之滿，宜卽其聖寵之階次思之。據博學士蘇亞來斯言，謂聖母始孕母胎時，所受之聖寵，卽遠勝極大聖人生前死後所有之聖寵。雖出類拔萃之聖人，生平積德累功，卒於捨生致命，其靈魂之寵光，猶不及始孕時之聖母，則聖母至德之基，實築於羣聖之巔。經云：厥基建於

衆聖山、聖詠八十六篇是也。至論聖母聖寵之增加、可觀其德行之純全、與功績之衆多、自可恍然。據蘇氏與諸超性學士之論、聖母受主聖寵、用之盡美盡善。每於愛情之發、倍益其功。蘇氏又謂、聖母功德之多、幾至無數。聖伯納弟諾謂聖母卽於寤寐時、靈魂仍向慕天主、增功益寵。故蘇氏又曰、聖母所有天主寵愛、統古今神聖而獨超其上。則是聖母聖寵之充盈、浩浩淵淵、誠非人所可測量者矣。賀聖母得主無窮寵愛。求聖母賜我緊要神恩。謹避得罪聖母之機、庶不塞其恩波之浩蕩。務行仰慰聖母之事、可恒沾其寵澤之汪洋。

第二端 人得主寵、皆由聖母。聖伯納弟諾曰、人得聖寵之序、出於天主措置之奇。而聖寵之所自出、則有三大源。天主聖父爲萬善萬美之宗、以已寵

錫盈於聖子之心。而聖子又以之盈於聖母之心。聖母乃隨意分己子女。蓋聖母既因聖神而生聖子。聖神自與以恩錫之權。凡我世人不由聖母。不能蒙主寵佑。不由聖母。不能救己靈魂。蓋欲救靈魂。須仗聖寵。而欲得聖寵。須賴聖母。以故聖教會稱聖母爲仁慈之母。上天之門。我等之生命。我等之望也。我等孝順聖母。正宜如人世子女。常向慈親而深孺慕。聖日爾。孟向聖母曰。童貞聖母。人不能無爾而救靈魂。亦不能無爾而免患難。聖安塞爾莫亦曰。聖母。從未有離棄於爾。而可免永死。亦未有人趨赴爾。蒙爾憐視。而不獲常生。噫。人欲繕靈修德。奈何不向聖母而求也。恭獻心身於聖母。求其恩佑。

祝言

十七日 耶穌步海詣徒

定像 想見吾主身現海濱，伯多祿踏波迎迓。

特求 求主賜我聖寵，識主益明，愛主益熱。

第一端 耶穌步海 徒舟浮中海，伊等以逆風故，鼓棹困甚。四更時，耶穌履海至。徒見其履海行，大驚曰：怪也。瑪爾谷六篇，瑪竇十四篇。宗徒於昏夜間，見耶穌步海前來，疑爲怪物，其謬雖大，其情可原。我以至訓視爲迂談，懿行不知取法，善惡不明，是非莫辨，實有類於是。而爲過愈甚，爲害愈深。雖有聖寵光照，天神啓迪，而心志紛惑，不知依從。甚至因明司之幻想，反以私欲之動，偏見之萌，爲聖神寵照之光，鉞方寸修德之念慮。此不僅視耶穌爲怪物，且直尊怪物爲耶穌矣。種種弊病，言之堪痛。試爲撫衷自審，豈得謂未嘗有

是保祿宗徒曰、沙殫變天神之貌、以愚人。致哥林多人後書十一篇求主賜我超見之明、虛心納受神師之訓。

第二端 耶穌慰徒 當深夜之際、徒等見有人自海面來、漸漸而近。於是驚惶殊甚、不禁巨聲呼譟。耶穌卽語之曰、安爾心、是予、勿懼。瑪爾谷六篇宗徒浮海、斯行實聽吾主之命。既聽主命、吾主自不忍捨棄、自必及時庇廕。從可知人若爲主行救靈愛人聽命諸工、遇有誘惑艱危、主必用其慈憫本情、前來申救、與當日之救宗徒無異。今求吾主以語諸徒之言、時語吾靈曰、安爾心、是予、勿懼。我乃定志、不畏艱難、勇行長命、任其差遣。

第三端 耶穌詣徒 伯多祿曰、如果主、命我步水造爾。主曰、來。伯多祿自舟下、步水、行詣耶穌。見風狂烈、懼、將溺。號曰、主救我。耶穌卽伸手授之曰、劣信

者。曷爲疑。甫登舟。風乃平息。更有奇者。忽見舟已抵岸。乃所欲往。瑪竇十四篇。若望六篇。此經垂訓吾人。其義有四。一。示伯多祿心愛耶穌。誠爲懇摯。故風波不畏。浮海願從。二。示爲伊信德活潑。主特顯奇跡。使之步海就巳。三。示無恒信者。有初鮮終。偶遇魔誘艱難。遂如伯多祿步海。由疑生懼。幾有陷溺之虞。四。示吾主聖心溫良。見人危急。卽援手以救。訓責交加。我靈於此。須求主增我信心。益我愛德。同宗徒敬拜吾主。 祝言

十八日 主臨熱內撒爾

定像 想見疾病諸人環繞吾主。爭捫其衣。

特求 求主賜我聖寵。則效斯人信德。

第一端 居民之信德 吾主與宗徒所乘小舟，清晨抵熱內撒爾海濱。昨日五餅二魚之異蹟，已有親身目覩之人，傳至其地。土人秉性誠實，聞耶穌至，四方咸來瞻依。聖瑪竇紀曰：居民知之。十四篇聖瑪爾谷紀曰：人皆認之。六篇猶言知其爲先知大聖，認其爲救世恩主。故不禁就日瞻雲，傾心向慕。爾當知聖殿之內，吾主居焉。彌撒之中，吾主降焉。在聖體聖事內，吾主更顯其至愛，惠我無疆焉。吾苟稍堅我信，定然必恭敬止，如聞主語，如接主容。經曰：苦難者，荷任者，俱來就予，予則苦者慰以甘，重者慰以輕。瑪竇十一篇此後入堂，定志欽崇尊主，感謝主慈。一若吾主在鑒，不敢稍形怠忽。

第二端 居民之愛德 聖保祿宗徒曰：信德據愛德而行。致加拉他人書五篇熱內撒爾人既信吾主，又能行愛情，願人共享福祉。經紀其遣人告四境，

且携諸病人至。瑪竇十四篇如斯忠愛，吾儕所宜效法。凡見人疾痛患難，當體天下一家之意，憐惜深之。且愛人之善事，實不止此。既宜勤顧人身，尤宜勤顧人靈。如憂者，慰之。愚者，誨之。沉於罪過者，量力勸之。怠於神功者，盡心勉之。此皆於天主臺前，大爲可嘉者也。嗟乎，我縱難修愛人之德，我豈難值愛人之機乎。宜自愧愛情之冷淡，悔已誤於既往，願加勉於將來。

第三端 信愛之酬報 聖史瑪爾谷紀曰，凡染疾病者，聞耶穌所在，巡行四境，昇榻以就。耶穌所入地方，無論城市鄉村，道旁病人，臥待主至。凡捫厥裳者，卽愈。六篇吾主於此示有二義。一、聾瞽癱瘓瘰疽跛蹙諸人，近吾主之身，捫吾主之衣，而吾主不形煩惱，不厭臭穢，一任其來親就，施以恩德，是乃吾主示其寬厚仁慈，溫和忍耐。吾儕當思何以效之。二、吾主加惠病人，欲人先

捫其裳。解經者申其旨曰：吾主之意，隱示人以聖體神效。蓋謂捫衣尙得愈疾，則凡恭領聖體，親主肌膚，更當如何可蒙寵愛，可益神形。今我受此宏恩，不知凡幾，當思何以報之。耶穌聖體爲痊諸神疴，預防諸罪之天藥，當誠心敬拜之。祝言

十九日 主論天降活糧

定像 想見吾主在加法爾納翁公堂，訓誨衆人。

特求 求主賜我聖寵，俾我易於受教，恒心附主。

第一端 貶責時人 耶穌以五餅二魚，飽飫數千人。次早，赴熱內撒爾，療人多病。後往加法爾納翁公堂，見民人雲集。其間半係昨日目覩餅魚之異跡，

而身受主惠者。其就主之殷。雖謂可嘉。而其存心。實有未能盡善。故吾主貶之曰。汝覓予。匪以見予異跡。特以食餅而飫。不勞不費而飽也。若望六篇吾主此言。勿僅爲時人責備。舉凡身在聖教。而心思偏曲。意念紛馳。非爲慕義。實爲謀利者。其衷懷。正猶是矣。另在修道者。或奉命遷調。或藉救人榮主之名。而內圖遊目騁懷之樂。其存心卑鄙。更與時人之競從吾主。謀食而不謀道者。直相等耳。設令吾主當前。又將貶責難寬矣。爾也靜驗寸衷。自知偏私未化。尙其愧悔深之。

第二端 預示天糧 主曰。勿務與時俱盡之糧。宜務留於永命之糧。卽人子將與爾者。予乃性命之糧。食之者永生。而予畀之食。卽予肉驅。爲世人生命而付者。如得亞。人曰。斯人何能與我食其肉。耶穌不但不改其言。且堅定其

訓曰。子實語爾。汝曹弗食人子肉。弗飲厥血。不得生活。子體真食。子血真飲。領子體。飲子血。伊懷子。子懷伊。爾父皆食瑪納。皆已死亡。領子弗爾。咸存生命。以迨無窮。若望六篇吾儕誦此經。聆此訓。所當思者有三。一。吾主以己體血。爲人飲食。卽盡其所有。昇於吾人。二。授人高厚淵微之理。至顯至明。令人無能疑議。三。賜我在聖而公會中。時受至重至大之恩。感激之餘。當何以酬之耶。

第三端 宗徒堅信 聖史若望紀門徒等曰。梗哉斯言。疇克聆之。乃多有離散。弗與主遊。耶穌因謂十二徒曰。爾輩亦欲去乎。西滿伯多祿曰。主有永生之訓。吾等將焉往。吾等信識爾。實乃基利斯督天主子。同上誦此聖經。當設身處地。如偕聖伯多祿。在主臺前。顯我信主之心。表我附主之情。尤當自認

本性柔弱、三仇狡猾。求主加我神力、增我善心、神與主遊、不離片刻。一心感激吾主、爲神飴之原。思仰答其無極寵恩。 祝言

耶穌傳教之三年

二十日 法利塞人之媚嫉

定像 想見吾主與法利塞暨明經士、共相晤談。

特求 求主賜我憎惡詐僞、誠求實德。

第一端 耶穌不往瞻禮 吾主於加法爾納翁教堂、預言聖體奧理。後遊加利勒亞、不欲往如德亞。以國人謀殺故。若望七篇按古教律、每年有赴京都瞻禮之舉、若有事阻可免。論吾主爲瞻禮之主、原不必往。然欲立守規之表、

故年年往焉。今所以不往者，因避人殺害故。此其行權之道也。於此訓吾長上措置各事，有時權宜當酌，本可不守成規。且其指麾屬人，有時變化應通，更可不拘定例。此際之裁度，爲長上者自不求知，而人亦無能知也。且於此訓吾遭逢艱險，切弗輕身嘗試，冀幸有功。蓋爲義致命之榮寵，天主非隨時隨地，得以予人也。求主賜我謹於守常，慎於處變。庶幾因應咸宜，推行盡善。

第二端 責人執迷 時人既不能肆其毒心，又不能死其禍心。據瑪爾谷紀云，法利塞暨明經士，自日路撒稜來，遣耶穌意欲窺探其行，以資詆誹。偶見徒中有不盥手而食者，乃謂主曰，爾徒曷違古人遺訓。七篇此等人言，不過爲詐僞嫉妬之故。蓋古經依撒義亞諭人洗滌，原在心靈之潔，行事之清也。吾主洞悉其隱，斥之曰，爾等拘於小節，偏以天主傳於爾祖之誠命，視爲具

文抗違不守。乃復警醒羣衆曰：聽且悟，非入口者污人，乃出口者污人。瑪竇十五篇聆主此言，當知法利塞等心勞作偽，實足漸染斯人。其輕而鄙之，不為所挽者，果屬甚多。然從而學之，致為所緇緇，染也。者，亦復不少。求主賜我卓然於流俗，潔身自持。

第三端 論人污潔 耶穌既離衆，伯多祿曰：請主明喻是義。耶穌曰：爾等猶無知識。不知凡自外入者，不得污人，蓋不入厥心。出諸口者，生諸心，斯惟污人。生諸心者，惡念、殘殺、姦淫、攘竊、妄證、詭詐、嫉視、驕傲、侮辱天主，是實污人。食不盥手，不污人也。瑪爾谷瑪竇同上。吾主於此訓人有三：一、諸善中，天主所最欲於我者，乃身心清潔。二、自外來者，誘感邪念，形形色色，苟秉心方正，拒而不納，終不能玷我神靈。三、當謹守五官，慎防三司，使方寸間，不容有一

惡念存焉。勿使隱微之地，容有一小私慾留焉。今日聖伯爾納鐸瞻禮，求其轉達。祝言

二十一日 愈加納搦亞之女

定像 想見一婦俯伏主前哀求。

特求 求主賜我效斯婦之信德恒心。

第一端 該婦信德之誠 耶穌至底樂暨西多境有加納搦亞婦籲曰主達未子垂憐我我女患魔劇甚瑪竇十五篇當思此婦係外方人其所行之可法可傳者有四一既得聖寵啟佑卽認識吾主爭先來求迫不稍緩二該婦曰主達未子是深信吾主有主性全能堅望吾主動人性之惻隱其衷情誠

摯，確是可嘉。三、該婦曰：垂憐我。則是認己卑微，謙恭自下。四、該婦述己女之苦況，片語單詞，言雖不多，而情實甚切。今我返己自維，試問向主祈求時，較此婦爲何如？又思我之祈求，所以寡效者，非皆以忱悃未至乎？求主增我信望，謙遜諸德，而於祈禱時，恒存該婦之德意焉。

第二端 該婦信德之恒 吾主欲試此婦之心，練此婦之德，不應一言，若不屑聽之者。門徒請曰：尙允其求，速之去。緣其啼號於我後。主曰：義撒。爾。亡。羊外，予未嘗受遣。是吾主却其請也。然斯婦仍不敗志，迨主入室，乃跪伏曰：主援助我。同上觀此，可知我人祈求天主，每見罔效，實緣德之無恒。試思或爲己身，或爲他人，求一恩寵，行九日敬禮。其始一二日，固見忠勤。其後六七日，日間能仍如此虔恪乎？我於求主，不責己之不誠，反憾主之不允。由是懊惱。

隨之，怨尤及之，誠斯婦之不若矣。

第三端 該婦救靈之表 加納搗亞婦人之信德恒心，已昭人目。然吾主未

肯卽遂其願，尙欲一試之。謂之曰：且容子兒充飫，不宜以稚子之餅飼犬。婦

對曰：唯。然犬亦食主席之餘。耶穌曰：吁，女人，大哉爾信。如乃願，成於爾。魔已

出離汝女。厥女卽愈。瑪竇十五篇，瑪爾谷七篇，據日羅尼莫聖師解曰：加納

搗亞之女，我人靈魂之像也。其母恩勤顧復，愛護維殷，我人救靈魂之表也。

夫我生有靈魂，旅居斯世，魔誘百端，實足爲患。彼加納搗亞婦人，因女患魔，

急求吾主施救。何我靈魂日獲罪愆，日受魔困，乃不速求吾主可憐。狂乎愚

乎。自知本力不足，當亟師此婦之俯伏哀求。望主賜我能識靈魂寶貴。而時

深珍愛也。 祝言

二十二日 吾人靈魂之價值

定像 想見吾主謂人曰、人有何物以易厥靈。瑪爾谷八篇

特求 求主賜我聖寵、明識靈魂之寶貴、而知珍重。

第一端 靈魂珍於普世 金口若望主教兼聖師曰、無物可比靈魂之貴、卽盡普天率土、亦不可與之平衡。意謂盡人間金玉珠寶、較之靈魂、其貴賤懸殊、不啻霄壤。蓋世物有形、皆能敗壞、靈魂神體、永不滅亡。且靈魂具有明司、能藉主超性之光明、識主無窮之美、永享主不盡之福。古今賢聖、咸謂天下萬寶可失、靈魂不可失、洵篤論也。無奈吾人私欲痼蔽、日蹈喪亡。曠觀斯世、不知凡幾。聖女德肋撒曰、吾見羣靈隕落多於樹葉、於是倍切祈求、勤行苦

功望主賜人改過救靈，熱心敬主。我今撫躬自問，知救靈之心，甚爲冷淡。速當謙卑愧悔，求主賜我救靈神火。不但情縈一己，亦且志在同人。

第二端 靈魂珍同聖血 原祖叛主，人靈已屬魔權。惟吾主降世受苦代贖，

乃恢復天堂之福。此恩何如其大，此事何如其難。聖奧斯定嘆曰：人乎人乎，觀吾主出何價以贖爾靈，便可知爾靈寶貴矣。又伯多祿宗徒曰：贖爾不以金銀，而以寶血。前書一篇：夫耶穌爲天主聖子，上智無窮，人物之重輕，一見便明，其行事必不過甚。乃必傾流已血，以贖人靈者，何哉？蓋深知欲贖人靈，非已寶血不爲功。故不惜性命，受苦至死。今我自視我靈，乃爲何物。我爲我靈，曾作何事。試思居處少爽塏，衣服無麗都，學業不精純，聲名被訾毀，則覺憂心沖沖，怒焉如擣。獨奈何愆尤叢集，身神污穢，乃竟優游自得，絕不知所

戒懼、哀哉悲哉。愧悔之餘，尙其加勉。此後宜思以何如待我身者，待我靈也。

第三端 靈魂珍同天主 聖人謂人靈之寶貴，同乎天主。其言之至於斯極

者，厥有四故。一、據聖經記載，靈魂爲天主吹噓。曰：主噓生氣於面，乃得靈魂

而爲活人。創世經二篇二、人爲天主肖像。創世經一篇三、永遠無窮之天主

子，爲人靈魂降世，捐棄身命。保祿宗徒曰：愛子而爲子捨命。致加拉他人書

二篇四、天主自爲我靈魂之賞報。曰：予爲爾酬。創世經十五篇緣此往哲前

賢，深知靈魂鄭重，故皆立功修德，汲汲於身復永圖。今我怠惰苟安，因循自

悞，何也。亟宜審所貴賤，勤修罔懈。庶於臨終時，靈魂歸還天主，怡然曰：吾主，

我神付於爾手。向護守天神求護我靈。 祝言

二十三日 耶穌撫愈聾瘖

定像 想見主前有一聾瘖者，跪求醫治。

特求 求主免我於靈魂之聾啞。

第一端 耶穌返加理勒亞。聖瑪爾谷紀耶穌愈加納搗亞女後，抵底樂境，過西多，至加理勒亞海，德加薄境。七篇吾主於此間，風塵僕僕，未聞別行何事，別化何人。惟於一婦，因其信德真誠，優加福寵，愈其女疾。此蓋示人戮力救人，雖祇裨益一靈，亦當不辭勞瘁。卽如司病者，雖曰病人無多，亦當不惜精力。訓蒙者，雖曰蒙童無幾，亦當不吝栽培。傳教者，雖曰教友寡少，亦當矢勤矢慎，盡悴鞠躬。地無論瘠饒，事無論難易，人無論貧富，功無論多寡，惟有刻意聽命，竭力從公而已。非然者，視欸待之盛衰，較居處之美惡，用情行事。

因有厚薄之分。此豈吾主之訓哉。我當愧悔之餘，定志於萬事，惟主榮是務。

第二端 耶穌愈聾啞之疾 維時衆獻一聾瘖者，求主撫治。主携往僻處，潛離羣衆。旋即以指點耳，以唾抹舌，仰嘅而謂病者曰：厄拂大。譯言開，病者應命，耳即聰，舌結解而朗語。瑪爾谷七篇吾主此行，其遺我神訓也甚多。觀衆人親炙吾主，如何勤懇。知我於聖堂聖體，當思往拜也。觀吾主接待衆人，如何溫恭。知我於浮躁驕矜，宜行克治也。觀聾瘖者，不聞不語，惟昂首結舌，乞主垂憐。知我於吾主苦像，亦當舉目翹首，心向心慕，而冀主回視也。又思吾主將聾瘖者携往僻處，示人虛名宜避也。點耳抹舌，仰嘅之而後愈之，示人靈魂聾啞，當多行善功，虔行祈禱，以療愈之也。注想之餘，自當有所動情，知所定志。

第三端 衆人頌主行之全 衆人向聞吾主行多異跡，今見其療愈聾啞，不禁愕訝讚歎曰：其行全。同上猶言其行爲盡善，廣施恩德於人也。吁嗟，余靈若能修德行善，惟日不足，而人亦以斯言譽我，豈不幸哉。夫所謂行全者，卽神業精勤，心靈清潔，行分內事，從長上命，無不中矩中規，各臻美備也。求主補我虧缺，助我不逮。此後砥行飭躬，自強不息。 祝言

二十四日 七餅飫四千人之異蹟

定像 想見數千人分坐平原，羣向主前待舖。

特求 求主賜我信愛倚主之情。

第一端 聖跡之事 數月前吾主有五餅二魚之異跡，今復有七餅數魚之

奇行。其事大同。其旨小異。據聖瑪爾谷記。維時隨從耶穌者甚衆。乏飲食。主召徒謂之曰。吾憐若衆。自從我迄今。閱三日。皆無食。或命枵腹而歸。必乏途中。矧有遠來幾許。徒等答曰。此地空寂。誰能餉之。主問曰。爾有麪餅幾何。曰。七。耶穌命衆席地。取七餅。祝謝天主。剖付宗徒。命給衆。另有小魚數尾。主亦祝福。命置席間。憑衆欲充給。徒收餘。滿貯七筐。席衆幾四千人。主乃謝衆。命返。入篇體味經言。大爲吾人慰藉。一曰我憐若衆。是吾主心慈。人有艱苦。未嘗不代爲留意。而動其憫惻也。二曰從我迄今。閱三日。是吾主細心。凡人事主之年歲時月。無不歷歷在念。三曰矧有遠來幾許。是吾主不但計人力役之歲時。抑且審人劬勞之深淺。卽以準來日之賞酬。四曰或命枵腹而歸。必乏途中。是吾主眷顧吾人。先事圖維。舉凡後來所有之困頓。所需之恩佑。早

已寓諸目，而留諸心。故雖盤殮市遠，覓食無從，卽行奇跡，以果人之腹。如此洪恩，我能不驚駭讚揚，感激怙恃，而思有以體聖心之仁乎。

第二端 聖跡之旨 有解經者謂兩次餅魚異跡，彼此稍有區別。吾主欲於其間，隱示古教與新教之不同。在彼席食者五千，以徵梅瑟所定古教法律，有古經五卷。在此席食者四千，以符吾主所定新教規範。有聖史四書。在彼係時人覓主，特因得餅餌以充饑，貪不勞不費而飽飫。若望六篇在此乃吾主憐人，自沛恩膏，而賜食。於以知新教之人，尤爲主所眷顧，尤宜忘情於肉身之事。且在彼所食者麥餅。同上爲僕役之食。在此所食者麩餅，乃子女之餼。又在彼所餘盈十二筐，遙應古聖祖十二支之數。在此所餘得七筐，適合聖神七恩，聖事七件之目。我觀斯事，當奇主於古新教律，措施悉當，斟酌咸

宜。我在新教中，得此寵恩，宜如何盡瘁竭忠，以鳴謝悃。昔如德亞人望主降生，惟食瑪納。而我已領主體血，懷我心中，我之沾恩，不更厚哉。然而恩愈厚者，責愈重。毋忘吾主有言，汝義弗勝解經師之義，弗克入天國。瑪竇五篇今日聖巴爾多祿茂瞻禮，求其轉達，俾能增我熱愛，深我倚望，報主洪恩。祝言

二十五日 聖母聖心 此默想題，用於瞻禮日，其餘可按日依次續用，定像 想見聖母指心謂我曰，予爲愛德之本母。

特求 求主賜我聖寵，識聖母聖心之德，而力圖效法。

第一端 聖母聖心與耶穌聖心，同心同聖，聖母聖心與耶穌聖心相同之

處可概之以四。曰德、曰名、曰榮、曰恩。一、耶穌聖德，造夫無窮。聖母之德，雖有限止，然實遠超神聖，亘古莫能幾及。故耶穌聖心至謙至良至仁至愛，而聖母聖心亦謙良仁愛，茂以復加。卽其餘諸德，亦無不肖似主心，此其德之同也。二、耶穌爲萬王之王，天國之帝，其聖心爲君父之心。由是聖心於我，爲我生命，爲我仰望。而聖母爲天國皇后，衆人之母，其聖心於我，亦爲我等生命，爲我等仰望，是其名之同也。三、耶穌爲天主聖子，本性不能獲罪，死後復活，升天，宰制萬有，尊崇莫比。而聖母爲天主之母，賴主聖寵，身靈無染，死後復活，靈魂肉身同登福域。且天國之寶藏，在其掌握，故敬耶穌，必敬聖母。有耶穌聖心瞻禮，亦有聖母聖心瞻禮，此其榮之同也。四、耶穌爲聖寵之泉源，天國之麗日，登天之正路，救世之恩主。而聖母爲聖寵之母，娟娟明月，上天之

門、救世之輔、此其恩之同也。然聖母聖心、與耶穌聖心、所以相同者、以其往來親密也。我與耶穌聖母、有亦昆弟之誼、母子之親、自當仿效聖母、庶得與耶穌聖心深相結契。返已自思、我何如始可與聖心相合。當向聖母曰、仰惟聖母瑪利亞、至仁至愛、至潔至謙、願將我等之心、合於耶穌之心。

第二端 聖母聖心、爲天主全德聖容之明鏡、萬物皆形主美、而人爲天主肖像、尤著其德色。吾人愈聖、則天主之德輝愈見。聖母之福德、遠超神聖、故爲天主全德聖容之明鏡也。可知天主保全聖母、絲毫無玷、潤以聖德、滿以聖神、授以天國之富、寵以母后之榮、畀其至良善心、事事與天主之心相合。由是天主所有之含忍良善諸德、無不於斯鏡鑑之。天主所有德之莫可形容者、亦無不於斯鏡照之。天主之無窮無盡、見於聖母聖心之寬宏。天主之

無變無易。見於聖母聖心之恒德。天主處事之奇。造物之妙。見於聖母聖心。措置之適當。智慮之周詳。我爲天主之像。且爲天主之子。故天主之德。亦宜輝映於我身。我亦爲天主之一小鏡也。主曰。汝當爲全人。如在天聖父爲全美。瑪竇五篇。且天主欲我易於取法。故以全德先映於己身。次映於聖母。再次映於先聖先賢。我既有修德之分。又多聖德之鑑。而顧不知窺鏡自治也。哀哉。求聖母助我法其心德。 祝言

二十六日 主赴達努達

定像 想見吾主與法利塞暨撒杜責二黨言談。

特求 求吾主賜我聖寵。俾語言行事。常持忠誠。

第一端 耶穌至瑪日當 吾主於七餅聖跡後，欲避人榮譽，卽謝衆命返，偕徒登舟，赴瑪日當境，或名達努達。瑪爾谷八篇，瑪竇十五篇，據解經者謂吾主行止，志在巡行義撒厄爾城邑，俾舉國人民共被恩光，以走永生之路，初不在一己之令聞廣譽也。乃吾人作事，竟有與吾主大相刺謬者。凡居一地，籌辦一事，克奏微功，則私心竊喜，以爲可得美名。如未見成效，致被嗤笑，則滿懷弗悅，恨不能卽時去此他往。是豈吾主之心哉。求主榮譽毋畀吾等，惟歸主之聖名。聖詠一百十三篇，定志此後，不以人間榮辱，繫於心懷。

第二端 吾主棄置異黨 吾主於瑪日當，聖史不記其行何奇跡，惟載法利塞與撒杜責二黨立教傳道，雖各相忌，而於妬害吾主，甚爲同心。日者偕來，與耶穌辯詰，欲試之，請顯異徵於天。耶穌憫其頑痼，長慨曰：惡逆暨姦邪輩

求徵。誠語汝，無他徵以與，惟有若納徵，遂去之。瑪竇十六篇，瑪爾谷八篇，當思彼爲惡之人，羣攻吾主，尙知捨己從人，同心合意。可知人欲爲善，當如何公而忘私，顧全大局。凡與同僚共事，雖性情不同，嗜好各別，語言動作，容有冰炭之分，而崇正闢邪，救靈榮主，自當同心戮力，爾我無分。求主助我拔除爲己之心，痛絕疾人之念。

第三端 吾主訓責徒蒙 吾主登舟渡海，徒等忘携餽糧，舟中惟有一餅。耶穌諭之曰：慎防法利塞暨撒杜責之酵。徒等互忖：身旣罔携餽糧，而主猶有此禁，殊難處置。耶穌洞灼彼衷，謂之曰：劣信者，曷慮罔持糗糧。詎不憶五餅一餅，五千人，乃拾遺幾筐，七餅一餅，四千人，乃拾遺幾籃。何猶無知無識，而心思闇營。予言宜防法利塞暨撒杜責之酵者，非語汝麪餅也。門徒始覺主言，乃

戒法利塞暨撒杜責人之學也。同上當思我自棄俗修身以來，蒙主逾格殊恩，亦多矣。乃倚望之情不切，聖賢之學不精，默想誦經，淡然無味。撫躬自問，抱愧實深。天主乃不加譴責，待我進修。我當體味主言，求主啟迪。 祝言

二十七日 救伯撒依達之瞽人

定像 想見吾主手撫瞽人之目。

特求 求聖神寵光，明我心目，寵恩潤我心靈。

第一端 吾主聽瞽人之求 耶穌與門徒渡海，至伯撒依達人携瞽者求撫。

耶穌執其手，引出市外，取口液傅其目，撫之，問奚見。伊瞻視曰：見人行若樹。
瑪爾谷八篇 據解經士白達言：口液表聖神恩寵。吾主引瞽出市，取液傅目。

蓋訓人欲得主澤，開明神目，必須遠避囂塵，約束心志。是以有志繕靈者，必年年有避靜之舉。縱此身旅居斯世，不能常此杜門謝客，辭絕往來。而出入周旋，總宜靜慮澄心，恒存避靜之意。何吾於靈魂之事，迄今時覺昏聩，茫無把握，豈非大可憾乎。思省之餘，尙其定志將來，潛修爾室。

第二端 吾主愈瞽之等次 聖瑪爾谷紀耶穌再撫瞽者，乃明視而愈，瞭然能覩庶物。同上綜觀四聖史所述耶穌奇蹟，惟斯瞽之目，漸漸得明。解經者推言其故，謂以人之信德，始浮終實，先淺後深也。又謂以主欲示人聖寵入心，所見功效，循次依序，非遽爾能窺其全也。從可知天主賜恩之層級，卽吾人進德之程途。若領聖事，而寵光猶是甚微，寵佑依然甚渺，以致功修罔進，德業無增者，必其心志迷蒙，有以阻塞之也。更可知吾人積日累月，崇德修

慝。苟無進境，勿廢中途。蓋天主聖旨，施恩賜寵，本有一定之時。在我者惟有孳孳不倦，日進無疆而已。求主賜我志專情篤，無怠無荒。

第三端 吾主命瞽人返歸 耶穌遣之曰：歸。若入市，慎勿語人。瑪爾谷八篇
命之歸者，不欲其閒游騁目，以放其心。庶幾潛思主恩，感深肺腑。令其勿語市人者，因時人見主行奇，不能善用主恩，而還辜負主心也。聖瑪竇嘗紀主歎惜曰：禍哉爾哥羅撒。因禍哉爾伯撒。依大於汝。攸行奇跡，若行於底樂。暨西多。彼早已披麻蒙灰，力行悔改矣。十一篇故吾人得主恩寵，自當鏤骨銘心，力求報效，而率德改行也。求聖母加恩賜佑。 祝言

二十八日 聖伯多祿認主

定像 想見耶穌指伯多祿曰於斯石上將立予聖教宮殿。

特求 求主賜我忠愛聖教之心。

第一端 伯多祿認耶穌天主性 耶穌獨行祈禱後往責撒勒亞境途中問

曰國人擬予如何對曰或曰師乃若翰保弟斯大或曰乃阨理亞或曰乃日

勒米亞或曰乃已亡先知聖人之一耶穌次問曰爾輩擬予如何伯多祿曰

師實乃基利斯督生活天主聖父之子耶穌曰西滿若納子實乃真福血肉

弗示汝第在天子父默牖路加九篇瑪竇十六篇瑪爾谷八篇吾主前簡十

二宗徒先行祈禱今定聖教基趾亦先行求主其旨一也問徒輿論何如是

欲以天主性示於宗徒以試伯多祿之信德也吾之於人亦每欲知其擬我

若何論我若何然試問意中果爲欲人告我過乎抑爲欲人稱吾善乎求主

賜我自見之明，俾惟思已於主前，爲若何人。毋慮已於人前，爲若何人也。

第二端 主定伯多祿爲聖教基 伯多祿既揚主爲天主子，而著已信德。主

亦嘉其德，賜以崇榮。謂之曰：予亦語汝，汝稱伯多祿。譯言大石。石上將立

予聖教宮殿，地獄之門，雖力攻，不至頽圯。瑪竇十六篇吾主於斯，明示聖教

直至世終，雖多窘迫，然得天主默祐，永無潰敗之虞。其言之應驗已千有九

百餘年於茲矣。吾等信民，雖聞教皇被難，時事多艱，自可深信切望，倚恃主

言，待其朝暮昇平，廣揚聖教是已。至爲聖教士卒者，尤宜協力同心，勤勞主

事，虔誠禱主，使聖教宗主化洽萬方。如是，庶幾夙夜匪懈，無愧爲聖會良臣。

第三端 主付伯多祿天國鑰匙 吾主於伯多祿不但尊崇其位，統御戰爭

之聖教會。且賜以神權，其力及於凱旋之聖教會。曰：又將畀付汝天門鑰匙。

凡爾在地或繫或釋，予同在天繫釋。同上吾主此言，授伯多祿及後來繼位者之權，不但超軼世間諸王，抑且邁越門下諸徒。蓋領受聖神，凡人之罪，其赦則赦，其留則留。若望二十篇吾主斯言，雖同堂共聞，而天門管鑰，惟伯多祿一人掌之。我既爲伯多祿賀，尤當爲一己賀。因聖人受斯權，掌斯鑰，非爲自用，實爲我衆用也。當虔心誠意向伯多祿祈求。 祝言

二十九日 耶穌預言受難

定像 想見吾主荷十字架，先我而行。

特求 求主賜我克己之心，與愛慕十字架之情。

第一端 預言苦難 宗徒信吾主爲天主子，而望其榮顯於世，復興本國，心

志未免虛浮。主欲醫其疾，除其弊，遂示門徒，將往日路撒稜受多窘辱，且見殺於老長明經士撒責首，惟第三日復活。瑪竇十六篇瑪爾谷尾其語曰，厥言甚顯。八篇伯多祿熱衷愛主，未明主旨，諫之曰。佛哉，主，罔罹茲。吾主憤其沮己降世之業，不識己身受苦之旨，斥之曰。沙。殫去，爾爲我礙。蓋爾罔味天主事，惟喻世情。瑪竇十六篇以上數言，吾主可以之責我者，亦多矣。蓋我於空幻榮華，虛浮佚樂，留心致意，時覺惓惓不忘。於風塵烟景，世俗文章，遊目騁懷，常覺依依不捨。他若講經論道，謙遜克己諸務，則付之度外，漠不相關。豈非與伯多祿阻主受難，情真相同乎。求主賜我深自愧悔，專精聖學，以飭吾靈。

第二端 諭人克己 吾主以其死而復活，救人永生，昇人永生。故人欲免永

死而得永生，必須步吾主後塵，而先行其苦路。是以吾主曾集衆人及門徒，而謂之曰：人欲爲我徒，須克己。瑪爾谷八篇所謂克己者，遏絕諸敬主修靈之阻也。卽肉身性命，亦在其中。故主又曰：人不盡我子弟之職，而欲保厥生命者，必失之。爲我及爲福音而失之，則保之。同上蓋言人真實之性命，不在此生，而在後世。又曰：人不顧事我之宜，而求偷生於世者，乃失之於永。甯捨生致命，盡忠於我者，是得常生。人得天下，而失厥靈，奚裨。抑有何物以易厥靈。同上聆以上諸言，謝主賜我得知其理，甘心棄世。更求天主賜我日死於物欲之私。

第三端 令負十字 吾主旣宣克己之諭，又曰：日荷己十字架而從我。路加九篇此令雖反人私欲之偏，然其行實較前命爲稍易。蓋吾主不令人荷伊

重且大之十字架，乃令人負已小而輕之十字架，則雖難，而尙非難也。況十字架之宜荷，不特出於主命，亦實處世者之定分。若我安心聽命，荷之以償主義，以法主表，以示我忠貞愛主之情。則人以十字架爲重而苦者，我以十字架爲輕而飴也。昔吾主在前，二盜在後，皆負十字架而行。祇緣其志各殊，故其功迥異。審於此，凡世之居艱處困者，可不慎哉。今日聖若翰致命瞻禮，求其轉達。 祝言

三十日 謙遜克己三級

定像 想見聖母挺立耶穌十字架旁。

特求 求主賜聖寵，愛慕苦辛，爲主甘受侮辱。

第一端 謙克首級 吾主嚴訓人遏抑私慾、脫離世有、其間等次共分三級。首級誠能謙克者、志切救靈、情願失財貨聲名、世間諸有、及本身性命、而歷受萬苦、不願干犯主命、獲一重罪。是級也、凡爲信友、皆宜有此。否則其念愛德誦及悔罪經、皆爲虛言、欺天主、而更欺己。修德之人、得主寵錫、似已久登此級、然未可卽謂無虞。蓋三仇常在、本性未移。人若安於斯級、不求上進、則其德之操守、自無成功之日。所謂修成者、亦祇虛名耳。極當戒慎、毋自恃。趨求主佑、謹避罪機。

第二端 謙克次級 情願失天下萬福、罹天下萬苦、不願故意犯一微罪。是謙克第二級、修道者皆當至於斯境。捫心自問、若德詣未能及此、則可憂者多矣。一、憂不能保其恆在首級。蓋經曰、不慎小過、漸陷大咎。辨德經十九篇

二、愛不能酬其修成素志。蓋細罪反於修成也。三、愛不能得中心之和平。經亦曰：誰拒主而得平和乎。若伯九篇四：愛不能契合主心，行拯世淑人洪業。間嘗聞大德之士，如特邦德佩拉爾米等，矢願於主，不犯故意小罪，皆能實心實事，躬踐力行。我若深惡罪愆，切願修靈，行詣亦能登於斯級。惟恨我志氣疎慵，行之無恒耳。求主賜我深恨諸罪，時勤自省，而日進於修治。

第三端 謙克三級 竊願捨人間榮祿，世上歡愉，與貧乏之耶穌，同其貧乏。與被釘之耶穌，共釘架上。與受侮受辱之耶穌，偕受窘辱。惟望能肖似耶穌，忠愛耶穌，此謙克之第三高級。其行詣之卓越，固非盡人能之，然勿謂遂無人可及也。試觀諸宗徒及諸聖致命，爲主被人欺凌詬罵，而無任權忻。且有王孫公子，生長於尊榮安富之中，棄俗離家，甘貧苦克以終身者，不知凡幾。

此皆其明證也。若能勉力步趨，修臻此詣，自不愧爲吾主高朋，聖門佳弟。身雖受苦，心則常甘。在世承主眷，死後更享主榮，慰何如也。我也年年舉行避靜，多定善志。然試問實際工夫，究何在也。須激發衷情，以後實行是務。聖母於吾主苦辱，與分最多，求其轉達。 祝言

三十一日 耶穌山上顯容

定像 想見耶穌在大玻爾山頭，大顯光榮。

特求 求主賜我聖寵，明此奧義，獲其神益。

第一端 顯容之奧 耶穌携伯多祿暨雅各伯暨若望厥弟，引之潛上峻山，變貌伊前，面發光如日，衣皓白如雪。是時梅瑟氏暨厄里亞氏倏現，偕耶穌

談伯多祿告耶穌曰、主我等在此樂甚。倘許我等肯構三居、主一、梅瑟一、厄里亞一。言未已、光雲廕彼。有聲自雲間出曰、斯乃我攸親、攸樂我心者子、爾者聽之。徒聞、偃仆甚怖。耶穌近挈之曰、勿怯。徒仰、祇見耶穌。瑪竇十七篇右經備書吾主顯容之異。我於斯、可將其人其語其事、逐一思之、自能多蒙神益。卽將我默想全功、盡用於此顯容一端、亦不爲已甚。偕達未。聖王向主曰、主、何可愛哉爾居。在主墀一日、勝處世千年。我寧爲主宮之末、不欲居罪人之居。聖咏八十三章

第二端 顯容之緣 八日前、吾主預言已將受難釘死、嚴訓人勤苦刻、荷十字架、得爲其忠徒。以人情而論、宗徒聞之、未勉憂疑、信德有動搖之險。吾主欲撥去彼愁思、壯大彼志氣、以忍受後日之艱難。於是顯露其主性之光榮、

賜徒等稍嘗天堂樂境。此其顯聖容之本意也。蓋天主慈惠待人，每於我見難畏，憇心神摧敗之時。或以益友規箴，或以神師指引，或以天堂榮福之思，或以吾主苦難之念，透其聖寵一線之光，照我暗冥，慰我憂鬱，事固往往有如是者。求主宥我灰心之失，定志常存心志和平。

第三端 顯容之效 伯多祿見吾主榮光奪目，世間無可比擬，殊覺無任喜

愉。謂主曰：吾儕可構三居。聖瑪爾谷記彼不知所語。九篇卽謂彼不明吾主顯容之意。然彼當時所不知者，厥後知之甚明，每於艱苦時，憶主顯容之異，毅己心志。且於己致信友後書一篇，細述己偕主在山時，所見所聞，勸勉時人，以固時人之信德。吾靈於此，當體吾主聖心，及記憶大宗徒之遺訓，殫精竭力，日進無疆。思徒等見主瞬息之榮，已覺心醉神移，盡忘世有。則我將來

得享主面，永共無窮之福，更當何如喜悅哉。保祿宗徒曰：此世之苦，不足準異日之榮。致羅瑪人書八篇信夫。向二位宗徒祈求，轉禱於主，俾遇苦辱時，記憶吾主顯容之奧。 祝言

卷九 九月

月省之思 事主宜有熱心見卷七十三日

首瞻禮六 聖心之順命見卷五第二十四題

初一日 下山有人懇主驅魔

定像 想見一人伏主足下，懇愈其子之狂病。

特求 求主增我信德，益我神火，能憐憫罪人之禍。

第一端 宗徒無力驅魔 翌日下山，詣諸徒。見羣衆環繞，明經士與之辯詰。

論者謂彼相議徒等驅魔，何不見效。耶穌曰：爾等爭辯何事。有人俯伏其前曰：主垂憐吾子，病狂酷甚，乃患魔而瘖者，隨處拘之，輒偃仆，流涎切齒，致成枯槁。曾請爾徒，罔克驅之。瑪竇十七篇，瑪爾谷路加九篇，須知斯魔，既得天

主之許，附於其人。卽隨處隨時，肆行荼毒。其暴虐殘酷，亦可概見。乃有奉教之人，不避重罪，甘以己之身靈，屬魔鬼權下。亦有修德者，隨魔鬼之詭計，聽其唆使。每干名好譽，妬忌驕盈，隨從肉情之嗜好。不自約束，不守範圍，是誠不可解者矣。須常誦曰：於魔陰計，主救我等。

第二端 主申斥惡逆輩 不信及惡逆輩，我與爾偕逮何時，我含忍爾逮何時。同上解經者謂吾主斯言，極爲嚴厲，不但責學士輩之怙惡，亦責宗徒等之劣信，以致無力驅此強魔。蓋人旣爲天主鍾愛，而其行事，不知堅信怙恃天主，是天主所大不悅者也。我靈，天主慈愛我，施我恩德，亦大逾於凡衆。我固當以謙遜之心，敬承主惠。然惑於僞謙之念，以爲不應得主俯允。因而祈禱時，無倚望之心，遂至所求不獲。是亦差謬之至，天主所痛惡者也。主云，求

則得尋則獲。瑪竇七篇聖訓甚明，何復懷疑。我今求主，恕我向日怙恃之不誠。定志將來誠信堅望。

第三端 徒等劣信之緣 諸徒無力拯斯負魔之人，其故聖經已言之鑿鑿。當時門徒近耶穌問曰：我輩曷弗克驅此魔。主曰：爲爾無信。誠語汝，若有信如介種，語此山曰：去此適彼，將應命去，而無有莫能行者。惟此種類，非祈禱持齋不得去也。瑪竇十七篇吾主於此訓人者三事：一、有救人之職者，欲驅罪魔出自人心，須有更大之信德，出乎庸常信友之上。二、須有活信，信德愈活，則愈能行大事，以彰天主光榮，以拯人靈禍患。三、吾人之信德，宜有時輔以苦刻之工。吾主所謂持齋者，非徒謂飲食之菲薄也。吾於斯三者，恐不能篤信力行，而當受天主譴責者實多。求主赦宥我過，增益我信。 祝言

初二日 耶穌驅魔治癩

定像 想見吾主命污魔離去幼童。

特求 求主賜我躬修加密，凡事能引魔入我心者，深知遠避。

第一端 命携孩來前。教宗聖良有言曰：天主本性良善，今觀吾主於驅魔

治癩之行，而益信。蓋吾主方申貶責之言，旋動仁慈之念。謂病童之父曰：携

爾子來前。遂引至。既見耶穌，魔即暴橫投地，輾轉流沫。路加瑪爾谷九篇觀

此可知天主怒於後世者永，怒於今世者暫。且其聖怒之發，每為其慈惠之

端。故先知亞罷古曰：主，爾既怒，即憶念爾慈。三篇若伯曰：雖殄我命，我將望

於彼。十三篇聆此二聖之言，我雖覺天主有時懲做我，且有時離棄我，我終

不宜減我仰望依恃之心。况邪魔之性，每於人奮志自新之候，益肆其暴橫，令人敗興。故惟精於繕靈者，方知有以避其計。須借達未。聖王向主曰：我籍主永不負屈。當愛患之時，須不忘聖奧斯定之言。聖人曰：爾懼天主乎？投厥懷也可矣。

第二端 命污魔離去 耶穌見病者投地，輾轉流沫。問其父曰：爾子遭此，時日幾何矣？曰：自幼，屢被魔投諸水火，以冀斃之。倘爾能有所爲，乞憐救我。耶穌曰：倘爾能信，信者罔弗克。伊人知己淺信，爲主加恩之阻，卽墮淚悲號曰：主，吾固信，懇助我信之未誠。瑪爾谷九篇。夫此人所爲，實爲吾人之表準。蓋吾儕行事，當先行在吾者，然後求主補我不及，賜我全心實信，如我所宜。如是，主乃允我所望，而所欲者無不遂矣。斯理斯意，聖奧斯定訓之，得理登公。

會議定之。第六支十一篇其言曰：天主不以事之莫能行者命人，其命人也。訓人行所能行，求所不及行，且助人能行向所不能行。問我平素，果否能遵斯訓乎。或徒事祈求，不行在我所宜乎。抑徒恃己力，不思賴主之能乎。須向主曰：我信，賴信德與祈禱，無事不可成。求主助我信之未誠，日中可以斯言爲誦句。

第三端 愈病孩歸父 主斥污魔曰：聾啞之邪魔，予命汝去，勿再入此人。魔呼號，且多作虐而去。稚子若死然，人多謂其已死。耶穌携其手，舉之，乃療而起，付厥父。衆駭天主大能，奇耶穌諸行。瑪爾谷路加九篇此魔迫於主命，勉強離人，其騷動咆哮，有如此者。凡染重罪之靈，屬魔權下，或淡心修德，久患頹靡。一旦欲振作精神，回心歸主，彼地獄之魔，能不攪擾之哉。我當深信

此理、堅持主能、庶幾有以自持、而扶掖他人也。 祝言

初三日 主復預言受難

定像 想見吾主與宗徒偕行、途中互談。

特求 求主賜我忠勤、樂於德業之修、日能精進。

第一端 吾主預言受難 吾主初出講道、首於加理勒亞。其傳教之三年秋

八月、將赴如德亞前、自大玻爾山、復往加法爾納翁。據瑪爾谷聖史所載、吾

主此行、不欲人知、爲欲與門徒談論受苦贖人大事。謂之曰、可以斯語蓄爾

心、人子將付於人手、見殺、死後第三日復活。瑪爾谷路加九篇吾主以已受

難、預示門人、適在事業輝煌、聲名赫奕之時、含有深訓。其訓維何、蓋示人時

逢得意境遇從心，不可驕盈自滿，志氣虛浮，宜思已爲無用之僕。路加十七篇且思已不知爲主所寵愛，抑爲主所憎惡。辨德經九篇以此諸念，自謙自下。且吾主復告門徒已將受難者，亦訓人茹苦嘗辛，安心聽命，不忘勉力增益其功也。吾當欽崇讚美吾可愛之耶穌，日中每感其受難洪恩。

第二段 門徒弗達主言 經紀斯言隱闕於彼，而莫之悟。吾主見付見殺之語，徒等雖聞於耳，然因事拂厥心，莫明其義。且不忍推求，亦莫敢問，惟增憂鬱而已。路加九篇，瑪竇十七篇，噫，吾之居心，與主徒相似者多矣。平日神師益友，恒有善言規誨，而我以爲晦而不明，不解其意，非真不明不解，實因逆我偏私，故藉詞推諉耳。如曰不守耳目，不謹口舌，爲爾多犯罪過之緣。或曰，不斷私愛，不絕密締，乃爾難得神清之故。或曰，性情偏僻，行事乖違，乃爾失

已和平，招人怨恨之端。此非皆我聞於耳，而莫悟於心之言乎。且有時不敢就正神師，恐其訓我克己切實之修，亂我順心虛偽之安。是亦如宗徒之懼主有言，而弗敢問也。求主啓我心思，益我明悟，增我力量，勉改前愆。

第三端 吾主預言復活 人之將付於人手，而被殺。死後第三日復活。見上默想於此，所當分外留意者，卽吾主凡預言己之受難釘死，必繼言己之榮光復活。其所以然者，欲增人剛毅，訓人與三仇神戰。當苦身克己之時，不忘日後復活之光榮，與天堂之福樂。庶幾有以自勉，益勵神修也。吾主曾爲瑪烏二徒曰：基利斯督，詎非先須受難，後享光榮。路加二十四篇基利斯督尊爲天主之子，尙宜如此，况吾人乎。求主賜我神力神勇，更願受苦。 祝言

初四日 耶穌納丁稅銀

定像 想見聖伯多祿垂釣海濱，自魚口取銀納稅。

特求 求主賜我聖寵，明識聖伯多祿誠樸聽命諸德，時能仰法。

第一端 耶穌無納稅職 吾主在加法爾納翁末次勾留，經史別無所言，惟載有人征丁稅，以供聖殿經費。日向伯多祿曰：爾師納稅否？曰：然。抵舍，耶穌先詢曰：西滿，爾意云何？世王徵貢稅，徵支子乎？抑徵外人乎？對曰：徵外人曰：然則爲人子者可蠲免。瑪竇十七篇吾主爲天地大君，惟一聖子，無納稅殿中之職。其蠲免之緣，出於情理之至正。乃吾人每自擬免守規矩，免服勞役，免行補贖，苦刻諸工，種種託故推辭，果何謂哉？如或以年高，或以力弱，或以職守繁冗，或以賢勞多著爲名。然試問其中，果無自欺自愛，懈怠冷淡諸弊。

乎。內省之餘，求主賜我愛慕公規，而恪爲遵守。

第二端 耶穌仍納稅銀 吾主無納稅之分，今亦公然納之，何也。誠以身爲天主聖子，時人未甚明識，故不欲以一已蠲稅，致興物議，招衆效尤。然其納稅之情形，實有足證其爲天主子者。蓋主行一新奇之跡，謂伯多祿曰：往海濱垂釣，取首獲之魚，啓其口，得銀錢一。同上吾主欲完稅，必若是語。伯多祿者，亦以試其聽命之德何如。而伯多祿果以忠信行之，此所以蒙主酬報，而見主異跡也。吾於斯，當知取法者二：一、效法吾主，免人疑怪，隨地隨時，可盡己心力，無違地方之善舉，慎守堂院之公規。二、效法伯多祿之誠樸聽順。既不問命之緣由，復不慮事之成敗，求主賜我聖寵，常遵吾主之訓，效法聖人之表。

第三端 爲伯多祿納稅 吾主旣示伯多祿垂釣、自首獲魚口、將得銀錢。又謂之曰、取之、爲我兼爲爾納稅。同上人征丁稅、惟征耶穌一人、因其爲諸徒之主、無異爲一家之長、故吾主自爲納之、可也。乃必兼爲伯多祿納之者、何故。解經者謂主旣定伯多祿爲宗徒之長、今重申其命、以尊伯多祿之高位。又謂吾主於斯、榮寵伯多祿甚於他徒者、所以報其信德之誠、聽命之謹也。我也亦當加倍躬修、以邀吾主寵眷。賀聖伯多祿品位之貴、更慶自身福分之多。蓋有品位至尊之伯多祿、及其後來繼續之人、令普天下聖教會得道一風同、而信識真主。且令我於生前得心中之真慰、死後獲天上之永樂。感謝吾主選定宗教之恩。 祝言

初五日 門人途中爭長

定像 想見吾主謂徒曰、欲爲首者宜爲衆末、暨衆役。

特求 求主賜我謙遜之心、恒能卑以自牧。

第一端 諸徒貪位 徒等見耶穌寵異伯多祿、甚於及門諸人、心中各懷不

悅。始而忌、繼而議、終乃爭其間、孰爲尊大。故聖史載赴加法爾納翁、既抵舍、

耶穌問之曰、途中相談何事。徒等默然。瑪爾谷九篇觀此經紀、鮮有不艷然

於宗徒之行者。緣彼羣聞吾主預言將受難釘死、曾幾何時、乃紛紛爭長。足

見彼自愛與貪位之心、未能盡忘。然默想者於此、勿徒謂宗徒可責。蓋我自

身有過、恐亦多類乎是。有時靜思吾主苦難之表、謹憶吾主謙遜之訓、一轉

念間、旋生驕矜忿怒之心。有時虔行告解之功、勃發痛悔之情、一旋踵後、卽

蹈冷淡怠惰之習。如是者，非皆心志之浮，意念之私乎。務宜愧悔已非，抑伏偏情，勿令潛滋暗長，可也。

第二端 主訓謙遜 世人多私，每事巧詐，善於自飾。至好高爭長之心，亦未嘗不然。故宗徒不詢吾主謂己黨中孰大，乃借端發問曰：主，擬天國中孰大乎。瑪竇十八篇耶穌洞燭彼等隱念，並不深加斥責。惟語之曰：欲爲首者，宜爲衆末，暨衆役。路加瑪爾谷九篇吾人無不欲大在天主之前，大在天國之上。抑知吾主授人秘訣，別有所在。其訣維何，曰：自謙自卑，自視爲衆人之末，是也。余靈，爾欲知曾否臻斯德詣，須問在被人遺棄，及受人輕賤時，果能淡忘於心乎。又長上用人授職，任爾以微賤之事，加爾以煩苛之役，如吾主所謂爲衆人之末，爾更能欣然於懷念乎。自省自思之下，求主賜我謙克之功。

務於受人耻辱時，恒不失和悅之心。

第三端 人變爲孩 諸徒心求高位，志在尊榮，將吾主謙克之訓，幾至淡焉。

若忘。主欲彼明悉已意，並欲彼耳聞者加以目覩，乃携孩置其間，懷抱之。語徒曰：確與爾云，弗變而爲若孩，天國靡入。卑小若孩者，則大於天國。瑪爾谷。

九篇、瑪竇。十八篇。觀於吾主之言，可知欲樂主心，欲邀主愛，非變爲孩不爲功。蓋孩提之德，有出於本性者，如無辜、淳樸、謙遜、馴良、順命，皆是。我當黽勉以效之。然此功甚非易易，若不誠求主佑，何由能變。耶穌爲萬王之王，爲我人之故，生於寒郊，隱於下邑。旣示我修德之表，又遺我升天之訓。求其赦我驕妄，賜我寵佑，獻我善志。 祝言

初六日 耶穌戒人招尤

定像 想見耶穌語徒曰、招尤之人、良可憐惜。

特求 求主賜我聖寵、深惡招尤之惡、亦賜我不爲人相招於尤。

第一端 世途招尤 吾主珍愛孩童所秉之性真、欲以孩童爲諸徒之法式。

第念世俗澆漓、人多招人於尤、引人陷落、以致貽害斯童。是則吾主所深惡、而痛絕之者。爰懲儆曰、若誘信予孩童之一、陷於罪尤、宜繫磨石厥頸、沉諸海。嗟嗟世態、人弗能弗招人尤、良可憐惜斯人。瑪竇十八篇吾儕若明招尤

之惡、必將與主同其憤恨。聖賢恒謂各等之罪雖重、皆如疾病、祇敗本人之身。惟招尤之罪、若毒廣延、害及多人。又謂招人尤者、實爲邪魔之手足腹心、亦爲邪魔轉世、其誘人犯罪、最易見效。更如假基利斯督、圖滅耶穌救贖之功。今我默念生平、豈無招尤於人、人豈無招尤於我哉。天主旣拔我於塵世、

脫我於罪機，正當深心感激。求主爲諸惡表之害者，更當恒修我行，務期有以矜式他人。

第二端 修途招尤 吾主嗟歎世態，不徒傷世道之頽靡，且亦慨修途之敗壞。何則，人自獲原罪之後，性真敗壞，不論居何境地，恒覺爲善難而爲惡易。於是雖在修途，亦難免有不善之表，致開招尤之端。蓋不善之表旣著，卽或本無招尤之心，而招尤之事已成，招尤之惡已驗。據聖多瑪斯之論，凡人所言所行所缺，有予人以效尤之漸者，皆可謂之招尤。故爲上者，倘因循怠忽，或志氣柔懦，見在下違犯規格，不知懲創，以致禍害蔓延，此招尤也。倘品望爲人推重，而行止有違典則，致後生小子，漸踰防閑，弛其繕靈事主之心，此招尤也。爲下者，好行詆毀，隨事譏評，使人輕視師長，有方上命，此招尤也。若

善於戲謔，將謙遜苦刻補贖諸功，亦加嘲笑，令人怠於神修，此招尤也。撫躬自問，我曾染其惡乎？有，則當求天主寬赦，力補前愆。尤宜慎者，勿陷於他人所招之尤。效法聖若望、伯爾各滿，見人行不善，自反砥礪曰：我不欲改作他人，更不欲有類他人。求護守天神，助我避惡從善，勤修善德。 祝言

初七日 責善宥過之訓

定像 想見宗徒環繞耶穌，聆其教誨。

特求 求主賜我超見之明，及仁愛之德。

第一端 責善 吾主自加法爾納翁，往日路撒稜一路訓迪宗徒，極言致人陷落之罪。又恐其以爲招尤之人，可從心憎惡。於是授以責善之規，本仁愛

之德、垂爲訓言。謂人雖貽害他人、或得罪於我、總不當恚恨之、惟宜憐憫之、助其改遷。曰、昆弟獲罪於爾、可往私規其過。若聽、則爾獲一弟兄。若弗聽、可邀一二人偕往勸迪、俾諸言得徵於二三人之口。又弗聽、則告於教堂。又弗聽、乃可視爲教外與稅吏。瑪竇十八篇聖教牧伯及修會長上、規誨屬人、因其怙惡不悛、終而迸絕之爲異端。其先後舉動、無不悉遵吾主遺訓、於今已千有九百餘年矣。此亦可見天主教上智之妙、與聖教至一之奇。然試問我之於人、有時見其行爲不善、或貽禍弟昆者、能悉依吾主訓言、諄諄善導乎。不聽之後、能據愛德之情、訴諸師長乎。恐任性縱情、因他人之過、而反自獲其咎也。何則、我有責善之分、有時見人有過、不思力爲救援、而惟任意輕鄙、是爲不仁。人有過、原當告之長上、乃不之告、而惟與旁人無力挽回其失者、互

相譏議，是爲不知。有時縱知告於長上，而告時過形人失，或參以私意，是爲不公。在我卽或身有職司，宜戒飭權下所屬。然無端傷其體面於衆人之前，或無故逞我貶責於人後，是爲不義。凡此皆非吾主之訓，而有違吾主聖心者也。吾當自省，有無一失致陷於斯乎。求主賜我超見上智仁愛諸德。凡行責善輔仁之事，先求護守天神指引。

第二端 宥過 伯多祿問耶穌曰：主，昆弟獲罪於我，可宥幾次，限止七乎。耶

穌曰：不云爾七，然七十乘七，且不限定數，皆宜真心寬恕。瑪竇十八篇觀吾

主訓人寬宥次數，及寬宥情形，可知我之待我昆仲，宜如吾主待我於神工座上。我獲罪雖多，每赴主前告解，苟有慘悔謙抑之心，吾主未嘗不赦。且赦之甚全，終不責我已往之過。思吾主待我之情，自當稱揚其仁良含忍寬宏

諸德。而愧我念人舊惡，矜已前惠，及凡器小鄙吝之行。定志日後，忠於主訓。求至仁至恕之耶穌，賜我聖寵，能實踐善志。 祝言

初八日 聖母聖誕瞻禮

定像 想見羣天神圍繞聖母之居，歡欣歌頌。

特求 求主賜寵，增益我愛慕事奉聖母之情。

第一端 聖母聖誕爲我樂之緣 聖母聖誕，爲往古來今一大慶期。因天主昔許原祖之女，將有足躡魔頂，而爲後世萬民之望者，厥惟聖母。此聖母實爲四千年中所待降生救世主之母。有斯聖誕，斯天主將霽怒於斯民，降以寵恩，錫以福祉。故聖教會令其子民，皇皇然，欣欣然，慶賀斯辰。日課讚美經

且有斯聖誕，斯上天歡慶，靈薄鼓舞，世人欣樂。蓋是日誕生者，乃天上母皇，救世之母，衆人之母也。故曰，聖母聖誕，報普世歡欣。日課申正經，吾人欲按聖教之意，欣然度斯慶日，得以悅樂聖母慈心，當行者有三。一、視聖母之生，如曉明之星，見於天國麗日之先。思有以隨其光照，而爲其忠臣孝子。二、賀聖母誕時，卽蒙主本性超性殊恩，爲古今神聖所不及。三、獻我身心，以代賀儀，稱揚其恩德，更效其潔清聖善之行。謂之曰，我樂之緣，爲我等祈。日中依斯理義，著我事奉之勤。

第二端 聖母聖誕爲我望之資 爲臣下者，當母皇壽誕，多沾逾格洪恩，而慰其夙望。然世之王后國母，其恩德終爲有限，究不能滿盡人願。獨聖母爲聖寵之母，手執天府之鑰。聖子無窮聖血恩功，在其掌握。取之不竭，施之不

盡。且其愛人之心，勝於慈母之愛子，甚願人朝夕依附，而蒙其嘉惠。既如是，吾人當如何仰望之，而倚賴之哉。今宜盡我孺慕之誠，虔求聖母。經曰：求則得，求之愈切愈恒，則得之愈豐愈盛。求爲本身，求爲他人，求爲本院，求爲所屬之人，更求爲普天下億兆人民，使能同歸一教，同聲傳揚聖母光榮。夫聖母爲大能之母，吾人聞之熟矣。然殊恩異寵，不能多見。下覃者，豈聖母之無力哉。實求之，不以其道，或行之有違聖母心耳。試觀聖母端莊厚重，朝乾夕惕，而我舉止輕浮，恒形放縱。聖母含忍謙和，神清志潔，而我性情梗戾，內外荒蕪。如是行爲，無怪乎難得聖母之歡。倘能師法聖母聖德，爲聖母佳兒，而謂聖母拂其請，虛其望者，吾不信也。向聖母玩索，又聖母經之意。 祝言

初九日 王責臣負之喻

定像 想見吾主立喻訓徒。

特求 求主賜我寬以待人，一如主之寬以待我。

第一端 王之寬仁大度 吾主訓徒赦免人罪過，言已甚明。然欲彼透達斯理，故更設一喻以曉之。曰：天國如王責臣負，王責一臣負金六兆，乃莫償。王命鬻其身及其孥，及其家資以償。臣跪求哀懇，賜寬厥期乃償。王憐釋之，且悉貸。瑪竇十八篇王者何，天主也。臣者何，吾人也。王責臣負者，天主於吾人不備時，收召靈魂，計算帳目也。臣欠金至六百萬者，吾人平生罪債甚多，不思勤儉以償，而又怠忽以重之也。王心極仁，見臣哀懇，憐而悉貸者，天主慈惠無窮，見吾人涕泣痛告，大施赦宥也。噫，主至寬仁，凡有所求，從無不允，思

及於此，我猶不知顛號，以期動主憐憫也。豈不愚哉。動情定志，須常憶吾主至仁之心。

第二端 臣之鄙吝苛刻 臣出適逢同侶，負渠十金，拘追扼項，令償。同侶跪乞，請寬厥期，乃償。弗許，置之獄中。曰：償竟乃出。同上。吾主於此，隱爲世之不肯恕人者，寫一小照。蓋人不思天主赦已之恩，而惟念人負我之怨，其心抑何不良。其情抑何鄙薄。夫世固有受人屈抑，被人嗤笑，常覺耿耿於心，忌與之見，惡與之言者。亦有欲人原其過失，隨其心意，從其所請，而已則分毫不肯讓人者。如是，則恕道何存。問我能無愧於斯乎。自謙自卑，求主赦宥。自今以後，務當體主待我何如，我亦以之待人也。

第三端 吾主訓人忠恕 王旣知臣之不良，召之曰：惡僕，緣汝乞我，我免。蓋

憐汝友，猶我憐汝。震怒付獄吏，待償全乃釋。倘爾弗真心恕爾兄，在天吾父弗恕爾輩。同上聆主此言，亦可知遺我恕人真訓矣。蓋我日求主曰：爾免我債，如我亦免負我債者。夫主之免我也，甚多甚重。而我之免人也，極少極輕。倘多且重者，主既慈以救我。彼少且輕者，我乃吝於救人也，豈理也哉。吾主借喻之後，續云：倘爾弗真心恕爾兄，在天吾父弗恕爾輩。斯語斯訓，當銘於五內，行於終身。庶至忿恨不平，及思復仇報怨之時，得怡己心，和己氣。則惡僕之刑，亦可免矣。謝耶穌啟我恩赦之門，賜我獲赦之方。更求賜我體主寬仁，法主溫良。 祝言

初十日 耶穌途中事跡

定像 想見吾主與諸弟子偕行。

特求 求主賜我聖寵，明識主心，則效主德。

第一端 昆季促主赴京 吾主自加法爾納翁。至日路撒稜，遲遲其行，作數

日程途。聖史載伊行際，遇伊昆季，促主與彼偕往，冀於瞻禮首日。即九月十

五日得赴京，顯行奇跡，已亦與有榮光。因謂之曰，可顯爾於世，俾爾徒見爾

攸行。耶穌曰，爾可往瞻禮，予猶弗往，因予時未至。若望七篇吾主所以不欲

即日赴京者，緣國人有謀殺之心，故暫避其鋒也。須知顯爾於世一語，古今

來不知敗壞幾何功德。因傲病入人肺腑，鮮有不染其毒者。如喜與顯者往

來，惡與貧人交際。樂行榮耀之功，畏服卑微之役。喜與文人講論，無心爲小

子提撕。是皆顯爾於世一語，爲之肇其端，而開其釁也。捫心深省，慎勿自欺。

須不忘事之悅樂。主心者爲大，彼人以爲巍巍者，每爲天主所惡也。路加十

六篇

第二端 邑人不納吾主 耶穌道經撒瑪利亞，遣人先爲備理館舍，邑人不納。雅各伯若望二徒睹此，乃曰：主，容我喚火降自天，以燬斯民。耶穌回首責之曰：爾不識應存何心。人子匪來喪人，乃來救人。路加九篇人有自以爲志切主榮，心熱神火，情似出正經大義，實則蘊苛刻私忿者，是爲吾主所不取。故吾人見有黨惡，窘難善人，切勿望主速降之罰，加以應得之禍。蓋此皆非吾主降來人世之本心。昔聖伯多祿宗徒謂信友曰：吾主於我人，含忍寬容，不欲有人淪喪，而欲衆人回心悔改。後書三篇求主賜諸冷淡者熱心，犯罪者感化，而脫卸我一切憤恨之情。

第三端 主與門徒他往 居民既不納，吾主與門徒遂往他邑。同上吾主嘗謂爲其名飲人以杯水者，亦不失其報。瑪竇十篇今他邑之人，何幸肯爲吾主授館勸餐。其膺受主寵，荷蒙主錫也，可不言而喻。然此猶與主相離，而未與主相合者也。我若能虔誠致敬，領主於懷，則所得之榮寵，較邑人何止萬倍。求主常居我心，須臾不離，以驗昔日主與宗徒之言。曰：愛予，必守予令，予父亦愛之，予等偕來居其內。若望十四篇今我專心冀願，向吾主祈求。 祝言

十一日 療淨癩者十人

定像 想見吾主謂十人曰，往詣司教。

特求 求主保存我心靈之淨，免染罪惡之癩。

第一端 癩者祈主 耶穌往日路撒稜，適入小村，癩者十人，皆逐，自遠竚。大聲哀呼曰：救世者師，憐視我輩。路加十七篇觀此癩人之求，其可法者有四。一、謙恭。身染惡疾，自以爲不堪近主，而遙望之。二、倚望。知身雖與主離隔，亦可得療治之恩。三、誠懇。哀求時呼主二名，曰救世者，曰師。四、公愛。不爲己一人求，而爲衆人求。曰：憐視我輩。吾人祈求時，若能如是，必將悅樂主心，而見俯允。然吾人祈主，每不能如是者，豈吾無斯癩者之急需主恩乎。不知罪惡之癩，染我身靈，其醜惡之在主前，較斯癩者爲尤甚。求主賜我能求能禱，勉行善功。

第二端 癩者聽命 主視而謂之曰：往詣撒責。同上吾主斯言，意爲爾等未

至撒責之先，身癩得治。然未嘗與之明語。以常情論，癩者於此，必將難於遵行。先欲問明其義。乃竟聽命如瞽，決然前往，宜吾主如其請而滿其願也。蓋經曰：行際身潔。同上於此可見聽命如瞽者，其功最盛，其效最神。蓋不計長上德詣之高下，出命之緣由，行事之難易，而惟長命自從。若是者，世俗每以爲癡愚，而天主正視爲珍重。蓋此順命之行，屈抑已之識見，而以之全獻於主。故天主每以特恩酬之。且有時亦施行奇跡，以榮其德。在斯癩者之潔淨，可畧見一斑。試問我於聽命，果何如乎。求主賜我聽命之全，務在長上之身，勿視爲與我同類，而視爲代主之位者，斯爲得矣。

第三端 癩者無情 其一覺體潔，亟還揚聲，不顯天主，伏叩頌恩，斯乃撒瑪利大人。耶穌曰：潔者蓋十人，其九安在。第斯一異方人，歸而頌恩，乃謂曰：起

往爾信療治爾病。同上可知吾人受主恩德，而不知感激，吾主聖心深爲不
愜。宜遵保祿宗徒之訓曰：恒謝主恩。致厄弗所人書五篇：夫人求醫疾病，及
疾病旣痊，固宜感謝主恩。然身強力健，久無疾痛，其所受之恩，較病愈之恩
更重，乃竟忘歸於主。且有人求免患難，及患難旣除，竟不思申謝。更有朝夕
念感謝吾主天主，及隨時誦飯後祝文，竟有口無心，不知意於何注。噫，是皆
增主心憂戚者，可不慎歟。向耶穌聖心，認罪求恩。 祝言

十二日 告解先後事宜

定像 想見耶穌謂癩者曰：往詣撒責。路加十七篇

特求 求主賜我聖寵，恒能善用告解之恩。

第一端 告解前 昨日所述癩病，聖師概謂爲罪惡之象，沾染之者，主前不勝醜惡。吾主令彼往詣撒責，示人當赴司鐸，行告解神工，乃可復得神魂清潔。既思主行淨癩奇跡，可記憶吾主所定告解聖事，并想我若何行此告解神工。一、在告解之前，固宜精詳預備，然亦不可太過。若行告解，焦心苦志，極力深思，致省察痛悔之餘，恒憂未能妥善，如是者失之太過。若因慣行告解，而草率從事，視省察爲瑣務，以痛悔爲易事，不思求主助佑，亦不自知勉力，如是者失之不及。我若欲善行告解，可預定時日，屆期即於默想及與祭之間，先行省察，早發痛悔，俾臨時之預備，自覺易易，而聖事之益，不致空虛。求主助我遵守斯訓，庶於告解前，克善行其事。

第二端 告解時 二、告解時宜謙遜誠直。而修道人之誠直，有時較難於庸

常信友者，以不能任意，選擇聽告司鐸也。然當知司鐸素諳人性劣弱，故聽人告罪，不論如何重大，終無藐視之心。循思此理，自可去羞恥之念，而免冒瀆之危。再者，有人欲勤行告解，以求心靈清潔。然欲此清潔，甯可告其緊要之端，而實心悔改。多言重複，則志意既浮，痛悔不切。吾恐告解之後，不久仍蹈故轍。爲此之故，告解時所宜行者，一、啓口先陳較重之罪，恐歷言微失於始，反默大過於終。二、告諸緊要之過，定志特改其一，此乃逐漸改除之良法。三、以一二語復告曩日所犯大罪，緣是勉發真心痛悔，一如初次告解，致能實獲罪赦之益。動情定志，宜仿首端。

第三端 告解後 三、欲得勤告神益，宜在告解後，一、堅增信德，不疑聖事之效。二、重定善志，圖改前非。求主寵佑，忠於所定之志。故神功之後，可謂主曰：

吾主耶穌、我以此聖事、得爾至珍寶血、流溢我靈、重爲滌潔、復爲整飾。今謝爾洪恩、新我善志、以後再不敢犯、特改我某過。求爾增我神力、使能滿所冀願。感謝吾主定此聖事。求赦我聖事中慢忽之罪、賜我恒能善用斯恩。祝言

十三日 主詣日路撒稜。

定像 想見吾主在堂、宣講於大衆之前。

特求 求主賜我聖寵、俾效法主之神火含忍。

第一端 時人議耶穌 吾主遲遲其行、比至日路撒稜、已是瞻禮之第三日、仍避人耳目。時人自瞻禮首日、卽羣議主行經紀如德亞人覓之曰、斯人何

在。衆紛然疑議，有曰：斯乃善人，有曰：否，斯人惑衆。若望七篇噫，人言難據，何獨於吾主爲然。每見人鞠躬盡力，榮主救靈，有識其忠誠者，亦有加以指摘者。卽好善之徒，有時亦騰其口說，任意譏評。故爾見師長昆仲，在爾語言行止，不能同情欣洽，切勿駭異而縈懷。爾當以謙遜之心，與自識之明，將轉訝推許爾行，而覺抱漸自愧。求主賜我聖寵，俾我常爲謙謙弟子。不忘主訓曰：既行主命，尙須曰：吾乃無益之僕，惟行所當行。路加十七篇

第二端 衆人奇耶穌 瞻禮既半，卽第四日，耶穌升堂宣訓。如德亞人奇曰：斯人未讀書，何深學問。耶穌乘機語衆曰：予訓匪由我，乃由遣予者。人言由己，求自榮。人求遣之者之榮，斯乃真實而無不義。若望七篇吾主此言，示吾講道論德，胥宜圖顯主榮。吾或公談，或私論，其道非由吾，實由遣吾之主。故

宣講之前，當細心體味，宣講之時，當留意敷陳，務期不掩真理，不參私意，不圖娛人聞聽，不求炫已才能。惟望有益人靈，克邀主寵。蓋論道而蔽真實，是爲不誠。意在自榮，是爲不義。以上二過，我能無所犯乎。善自省之。求主賜我能言主語，以啓人心，動人情，勸人善。凡傳天主之言，聽者雖甚寡，喻者雖無多，皆須鄭重其事，而無心於一己之聞譽。

第三端 巨室恨耶穌 法利塞與明經士等惡吾主聲名，掩其聞望，思圖殺之爲快。此庶民不知，而主實知之。因責之曰：爾謀殺予，曷故。其人欲掩飾已過，借服從之衆，怨恨主言。遂曰：爾乃負魔人，誰謀殺爾。同上嗚呼，今日者左道橫行，異端充斥，惑於邪妄，錮於偏私，忘教主救靈之職，攻敵聖教，凌蔑教宗，窘難善人。事之可慨，與當日法利塞等無異。然亦不必多慮，宜效法吾主

仁善、不怨人詬詈、不懟人欺侮。依舊諄諄宣訓、以醒人迷、以救人靈。事功雖無、目前之效、究不虛身後之報。盡我心、奉我職、可耳。向敷教靡息之耶穌。求賜克師主表。 祝言

十四日 耶穌公堂訓衆

定像 想見身在衆人中、聆主宣講。

特求 求主賜我聖寵、不聾於主訓。

第一端 耶穌呼渴者就已 瞻禮末日係大慶之期、吾主再於公堂講教。國人飲西落[○]阨[○]池水、汲送司教、灌溉祭臺、求主膏澤土田、蕃滋穀菓。耶穌乘機訓衆、立而舉聲曰、渴者就予飲。猶言愛誠實、慕義德者、親來附吾。信望吾者、

可得永生之本。道學淵源，將自心腹溢活水之江河。若望七篇吾儕聆此聖訓，須求主佑，賜我永活之泉，灌沃心靈，得爲主寵之人。蓋主寵之人，隨地隨時，有以潤斯心田，而發結德行之花菓。并求天主爲諸遠近敷教之昆仲會友，使稼於涕泣者，終能穡於懽樂。聖咏一百二十五章動情定志，專務所行之事，與主心相契，永不離諸德之泉源。

第二端 耶穌移吏役之心 法利塞會同民長遣吏役執耶穌。伊人聞耶穌訓言，動聽移情，無忍下手。吏役還司教暨法利塞詰之曰：胡不擒。對曰：從未。有講論若斯人者。若望七篇吾主雖明知有人欲執而圖害，然仍赴堂宣講，不斷其仁愛之工。此訓我當毅勇果敢，忠於傳道淑人之職。卽有時人欲羈我於獄，殄絕我生命，然亦不必憂懼。聖經云：莫人措手，緣厥時未至。同上細

想此言。可知人欲不利於我，若非其時，及無主命，亦莫敢誰何。雖然，亦不可冒昧從事，而不自謹慎隄防。蓋吾主啓行至日路撒稜，亦不與人知。至瞻禮之三日，始抵京都，在聖殿現於大眾。此中皆含有深意焉。求主賜我活潑之信，行事常依天主上智，安定心志，并去無益之憂慮。

第三端 耶穌爲宦臣廻護 司教暨法利塞等恨所謀不遂，復議何以處耶穌。時有倪閣得睦嘗夜訪耶穌者，亦在其間。向衆曰：未聞其訴，未審其行，依國律曷克懸斷。是言出自至情至理，奈司教等憎於忌嫉，遂忿詈曰：爾亦爲加理勒亞人，而欲廻護之耳。細閱經書，知罔有先知者起於加理勒亞，乃各散歸家。同上觀司教等所言所行，殊堪痛惡。然弗徒謂司教等爲可惡也，世有妄議人者，未審人行，卽斷曲直，是亦彼司教等之流亞也。求主憐憫賜佑。

慎防此失。祝言

十五日 耶穌寬赦罪婦

定像 想見吾主在殿謂淫婦曰、去、勿復犯。

特求 求主賜我寵佑、能明吾主之心、益深愛慕。

第一端 異學士請斷罪婦 耶穌往阿理瓦山、翌晨返聖殿、民人咸集、伊安坐訓衆。解經司暨明經士獲婦人淫行、引至耶穌前、置衆間、謂之曰。師、此婦行淫被執、依梅瑟律、命若人被石擊死、爾意云何。斯人言此、蓋欲試吾主、以與譴責也。若望八篇以常情而論、吾主此際、不論何言、終難脫斯人之計。若曰、不理其事、則所謂天主遣者、及衆人之師之稱、皆屬空虛、而人將咸加輕

賤。若曰，必理其事，亦有兩難之勢。蓋赦之，則人將責其違誠。罰之，又將指其不仁。且適以見其語言之矛盾。因主嘗言，已來非喪人，乃救人。吾主於此，將何以對。不知主竟以片言隻語，既答仇難，復增仇恥。洵所謂無有智慧謀猷，可攻敵主者。喻經二十一篇我靈，宜驚奇主智，而讚美之。自今以始，內外諸事，聽天主上智之措施也可。

第二端 異學士羞赧自退 耶穌不答，俯躬以指書地。衆促耶穌斷。主乃挺身向衆曰，爾輩中自負無罪者，可首擊之。後復俯而書地。衆聞主言，自老宿始，一一相繼而去。惟耶穌獨存，婦人乃中立。若望八篇據解經者，多謂耶穌書於地者，皆異學士等相類之罪。吾儕聆主之言，可以銘刻於心，曰，無罪者可投石擊人。若謂無負於主，無愧於心者，可評論人，貶責人，否則不可。思念

及此，能不嚴於持已，寬以待人，增修忠恕之道，與謙仁之德哉。愧悔之餘，須憶保祿宗徒之言曰：爾鞠訊他人者，適以自判。因爾所鞠訊者，亦自犯之。致

羅瑪人書二篇

第三端 犯罪婦得主寬赦 訟婦罪者既皆去。耶穌直躬曰：女人，愬爾者安

在，莫定汝罪否。曰：主，莫定我罪。耶穌曰：予亦弗定汝罪，去，勿再犯。若望八篇

主言若此，是救其肉身之死，亦給其靈魂之生。當時斯婦宜何如欣幸，何如感激。其稱頌愛慕救生之恩主，可不言而喻。我也追溯生平，念主脫我諸危，赦我諸罪。我若有心，我之動情感德，亦不宜遜於斯婦。今日爲聖母聖誕後

第八日瞻禮，求聖母轉達。 祝言

十六日 主爲世光之義

定像 想見吾主謂衆曰。予爲世光。

特求 求主寵光。光耀我心。佑我常隨主表。

第一端 主曰。予爲世光。若望八篇耶穌三次講道。始以是語示人。欲知吾主

如何爲世光。須識世無吾主。如何昏暗。試思普天之下。千有四百餘兆人民。其間奉木偶土人者居其大半。餘如敬日月星辰爲主宰。奉鳥獸草木爲神明。殺人以代牲。殘忍之風。目不忍視。將無作有。荒唐之說。耳不堪聞。種種異端。何可枚舉。嗟我中國。概猶居於幽谷。未能盡覩救世眞光。吾人先沾信德。洪恩。知生自何來。死向何往。在世敬主修己。當憂患時。能知自勉。處安樂時。能知自守。起居行止。常在光天化日。識所從違。此非吾主恩寵之光乎。我當

感激情深。求主照牖。凡居暗處。及於死影者。路加一篇。

第二端 從予。罔履冥崎。同上。吾主此言。謂隨從吾主者。不行歧路。不由罪惡之途。天下不崇正教之邦。自是不少。聆主訓之後。多革面洗心。知所向化。而且行超凡俗。德臻賢聖者。皆證吾主從予。罔履冥崎之一語。如回教者。縈情利祿。專志威強。凶悍驕淫。幾同蠻野。拆教者。叛逆教宗。順從時君。規矩紛更。朝三暮四。凡諸異端。此疆彼界。論說各歧。盈萬累千。莫衷一是。是皆捨明光而履冥崎者也。我幸生於奉教父母。或自幼得入教特恩。不誠如聖伯多祿。所謂自暗暝。而喚於光明乎。前書二篇。稱謝天主之餘。更求主賜助。俾能識主益明。愛主益熱。而從主益勤也。

第三端 恒享神生真光。同上。吾主此言。謂從主者。非但不行幽暗。且常得聖

寵之光。以活靈魂之命。身後享永福之生。獲覩吾主聖容之光也。凡人靈存主聖寵。免干重咎。是神生末級。身無故犯之微罪。是神生中級。脫卸物情之累。遏抑嗜欲之私。是神生上級。陞是級者。在世多獲主恩。多蒙主愛。死後更得承主厚報。愈見主光。思念及此。能不歆慕而益加勤勉。余靈願爾惟日孳孳。進修罔懈。因耶穌業已喚爾。更多方助爾。登進此上級。若善用此方。且謹爾謙遜倚望恒久之修。行見主將報效爾勤。多獲神光之耀。向耶穌照靈性之光。虔誠懇禱。 祝言

十七日 耶穌在堂續訓

定像 想見法。利塞暨明經士探聽吾主訓言。

特求 求主賜我心氣和平，慎弗任意違忤他人。

第一端 異學士與主辯論 吾主言已爲世光，法利塞等聞之，不待主言竟，卽謂之曰：爾自證，爾證非真。耶穌曰：縱予自證，予證實真。緣予非孤立，予實同遣予者父。彼曰：爾父安在。耶穌曰：爾如識予，或識予父。後謂如德亞人之信者曰：爾能存予言，實爲我徒。爾亦將識真實。真實者將贖爾等。衆曰：吾儕乃亞巴耶後裔，未嘗爲人奴，曷言贖我。耶穌曰：誠實語爾，人犯罪，成爲罪奴。若望八篇斯人以吾主才知德能，遠過伊等。故與主齟齬，互相論辯。若是者，何哉。因彼等自驕傲而生妬忌，因妬忌而出詬誶，終至違忤他人。此等情景，誠千古之通病。今我自問，我能脫免此乎。察我心思言行，毋許驕傲之翳，掩障我目。求主賜佑，力改我好與人相反之過。

第二端 耶穌含忍愛人 法利塞等存心雖壞，究不能灰吾主仁善之心。故復謂之曰，倘爾爲亞巴耶子，可行亞巴耶行。爾欲殺予，豈亞巴耶所爲乎。爾輩以魔爲父，欲行爾父願。彼自始嗜殺人，又罔存真實。予言真實，曷弗信予。天主人，納天主詞。爾等弗納，固非天主人。或有人懷予言，永生不死。衆答曰，吾儕嘗言爾爲負魔人，所言詎非當理。亞巴耶有死，先知亦然。汝乃曰懷予言，永生弗死，爾自以爾爲誰。同上我等聆此諸言，當奇吾主神火之熱，與忍耐之堅，而思效法之。凡行愛人之工，有時反見人情乖戾，抗違我訓，不可因此敗志。因在天主前，必不失其功。昔方濟各、撒肋爵及聖味增爵等，皆以仁良含忍，感化梗頑多人。求主將彼聖人之心，交付於我。而勉符保祿宗徒之言曰，毋敗於惡，而勝惡以善。致羅瑪人書十二篇

第三端 異學士執迷不悟 吾主猶欲挽回異學士之心，而示已爲天主聖子，卽先知預言萬民之望。曰：若予自揚，予揚或虛，爾等主，予父揚予。亞巴郎。汝曹之父，願視予，視且喜。如德亞人曰：齡未艾，五十歲謂之艾，何得見亞巴郎。耶穌曰：予確與爾云，予實在亞巴郎前遠遠。衆聞，取石謀擊。耶穌回身出殿。同上明經士等諸人，原係執經傳道之人，乃因妄用主恩，違背主訓，終至瞽於神目，怙惡不悛。真如吾主所謂死於其罪矣。同上求主賜我易於受教，謹避驕傲嫉妬諸病。 祝言

十八日 胎瞽得明之異蹟

定像 想見吾主以唾液和土，抹瞽人目。

特求 求主賜我珍重如瞽之聽命，時能勉勵謹行。

第一端 胎瞽之緣 耶穌出堂，欲諸違忤已者，識已含天主性，而爲天主子。因又顯一特奇之跡。據若望聖史紀主於行次，見一胎瞽。門徒問曰：何人獲罪，致斯人生而瞽。斯人與抑其父母與。耶穌曰：非斯人罪，亦非伊父母罪。第天主事，將於彼榮顯。九篇吾主答門徒之間，言非斯人罪者，非謂斯人未嘗獲罪，乃謂斯人之瞽，非斯人罪過之罰。可知人有艱難憂苦，未必盡緣人之本罪。因天主加人以苦患，每欲磨勵其德，愈顯天主光榮。如若伯及多俾亞諸聖，皆爲明證。是故吾人居患難時，不但宜灰敗吾心，且宜堅強吾志，而深欣悅。卽見惡人受苦，亦不宜擅稱天主顯罰。蓋其能以善人之困厄，相反我所言也。求主賜我神勇，俾能毅然忍受世苦，欣然樂受世艱。更務行斯祈

求在患難叢集之時。

第二端 胎瞽之愈 耶穌言畢，唾地，以液和土，抹其目。命之曰：往洗於西落。西落，譯言奉遣者。池。瞽如命往洗，目豁然明。同上。吾主如是行之，以試瞽人之信德與順命。瞽人信德之誠，順命之敏，亦甚可嘉。蓋聞吾主之言，雖覺無謂。然不質一言，不問一難，忻然前往，一若事固宜如是行之者。是皆存有至義，含有深訓焉。我若能堅我信心，萬事安於天主上智之措施，效法斯瞽人之順命，將見我行之悅樂。主心而蒙主賜我恩佑，遠勝瞽人多多焉。求主增益我信順之德，每與聖奧斯定向主曰：我知主乃愛我者，願主任意處置我，可也。

第三端 衆人奇異 隣人向見斯人行乞，僉曰：斯豈非嘗坐而乞者。有曰然。

有曰否，乃似彼者耳。乞者曰：是予。衆問曰：爾曰奚啟。曰：一人名耶穌，泥塗予目。謂予往洗西落阨池，予往洗，今得視。同上吾觀斯瞽人之應對，見其稟性誠懇，令人知其目之所由明，惟賴吾主神能，通於泥土池水之間以療之。我可仿效其行，承認我之神形所有，及一切善事，悉出自天主恩佑。若非主錫，分毫皆非我有。如是存心用意，不但遏絕我自滿自榮之念，且日增我得新寵之一善法也。常宜認己貧乏，謝主寵恩，并求主賜我善承主訓，善聆主命。

祝言

十九日 胎瞽得明之訓

定像 想見瞽人立於法利塞等集議之所，及衆人之前。

特求 求主賜我識斯瞽人之忠直果毅，知所取法。

第一端 瞽人恥辱異端 法利塞等聞主療愈胎瞽，不勝忿嫉。欲掩蔽其靈跡之榮，卽喚瞽人及其父母至。先後鞠訊，冀人疑議其事，貶責吾主於瞻禮日。有此作爲。詎料瞽人父母，明認瞽人爲子，聲言其爲胎瞽。後瞽人又復歷述耶穌以泥塗目，及命往洗於西落陔水等情。於是聖跡之事，再無可疑。法利塞等不悅，遂於瞽人前，忤吾主之天主性，而毀之曰：斯人不守瞻禮，非由天主。猶言其所行諸異，惟倚魔鬼之能，且欲瞽人阿附其意。瞽人弗肯，拒之曰：從未聞有人啓胎瞽者之目。若不繇天主，罔克行斯。法利塞等被無知乞人所駁，不知所答。怒曰：爾自生來，渾身罪戾，乃欲誨我。遂呵之出。若望九篇奇哉此種情形，天主聖神默牖聖史，筆告後世，增法利塞等之恥辱，遺其臭。

於萬世。亦正訓我當如何謹避妬忌之惡。有時被人憎惡。訓我不宜畏怯。自古有云。事修謗興。德高毀來。耶穌天主之性。尙被人疑議。然因斯人冒嫉而益彰。我若能整身修行。何患乎人之嫉妬哉。保祿宗徒曰。卅間萬事。皆有益於愛主之人。嗚呼。信然矣。求主賜我心志誠直。遏絕偏私。凡見他人之善。務必稱揚讚頌主名。

第二端 瞽人敬拜吾主 瞽人既以其誠直。光榮吾主於衆人之前。卽得吾主異常之報。經紀耶穌聞衆人斥此瞽人。遇之曰。爾信天主子乎。瞽者答曰。孰爲天主子。俾我信之。耶穌曰。爾已目覩。茲與爾言者是。曰。吾主。我信。卽跪而伏拜焉。同上瞽人既得吾主開其肉目。又得吾主開其神目。賜以聖寵之光。信德之恩。相傳斯人以後追隨吾主。而爲七十二徒之一。後偕辣匝。祿瑪。

爾大瑪達勒納等被如德亞人置於一敝舟。無楫。無舵。無帆。亦無舟子。任其飄浮於海。乃因天主洪佑。行抵法蘭西邊境。勸化多人信主。聖伯多祿有言曰。主拒驕傲者。寵錫謙遜者。前書五篇觀於斯。而益信。想瞽人當時跪伏主前。如何謙卑感激。我可借之伏主足下。謝主啓我目。迪我心。賜我多恩。俾早得信識事奉真主。以後尤宜圖盡心力。引人稱揚主美。感頌主名。求主寵佑。

祝言

二十日 主遣七十二徒

定像 想見七十二徒環聆主訓。

特求 求主賜我明主訓徒之意。效法徒等受教之誠。

第一端 選遣七十二徒 吾主於傳教三年之九月杪，出日路撒稜，往如德亞諸邑，宣布福音。其傳教之工甚大，而其時已促，至受難日期，相去不過半載。吾主欲傳教之事，更爲便速，卽欲培植傳教之人。乃選七十二徒，耦遣之，往將詣諸邑地。路加十篇斯七十二徒，得於億萬人中，被主簡選，作十二宗徒之副。先詣主將往之城邑，預備人心，以領吾主救贖洪恩。今我思念及此，能不欣羨其福，企慕其功。然我旣亦爲主徒，有志淑人，斯功斯福，已爲我分中之事。卽或身無傳教之職，而能修愛德於家庭，則所行亦爲宗徒之副，而在主前亦不減其賞報。權忻自慶之餘，求主賜我無廢聖召之尊。出入不忘有伴侶之規，以符吾主耦遣之訓。

第二端 訓誨七十二徒 主訓七十二新傳教士，與數月前誨十二徒相似。

謂之曰。予遣爾如羔羊入豺狼中。勿携囊橐。途次勿拜禮何人。入人家。首曰。和平於此家。駐彼家。勿擅徙居。入郡邑。容爾。則享其所供。入郡邑。不容爾。則出其衢。曰。爾邑塵埃。沾我屣上者。亦拂於爾。但須知天主國已近。同上吾主。以上所言。我可以之銘刻於心。庶得及時體用。其大畧之義。謂宜存良善。忘貨利。真心和愛。一意沉靜。加以剛毅勇果。及懇切引人悔改。今我求主寵光。使我能識於愛人之事。有何缺乏。更思何者可樂主心。可益人靈。日中恒以榮主救靈爲向。

第三端 詛咒不信諸城 可憐與可畏者。諸不受教之城邑。主曰。禍哉爾哥。羅撒因。禍哉爾伯撒。依大於爾。攸行奇異。若行於底樂。暨西多。彼已披麻蒙灰而悔改矣。故底樂。暨西多。審判時。將見寬貸於爾。加法爾納翁。汝自舉於

天汝將沉於獄。同上吾儕默思吾主斯言，如是嚴厲，當深自驚惕。蓋吾得主殊恩奇寵，不讓於以上諸城邑。若不知忠誠受教，對答主恩之深厚。他日將何顏見主，何以當主判之嚴乎。求主赦我辜恩之罪，賜我善承主訓，善用主恩，再不負主聖心仁愛。祝言

二十一日 七十二徒反命

定像 想見七十二徒欣然返，各以所行報耶穌。

特求 求主賜我心神喜悅，一如主訓。

第一端 吾主節制徒悅 七十二徒敷教各方，獲多神效，則其行事，悉符主訓可知。蓋經云，順命之人，將言得勝也。喻經二十一篇聖史路加紀徒等欣

然返。謂耶穌曰。主。仗爾名。羣魔服我。徒等之悅。固出於正理。然吾主嫌其心存自足。語之曰。予見沙。彈如閃電。隕於天。十篇若曰。戒之哉。慎勿自滿。因自滿。引人驕傲。驕傲致人陷落。路。濟。弗。爾。可作前車之鑒。於此。吾當留意者有二。一。行事悉按長上之指引。庶可望一旦收其神效。二。及其成功。尤宜謹絕驕盈自滿之念。免致害靈而損德報。求主賜我敬畏之心。與超見之明。不爲狡魔所惑。不聽傲魔所誘。惟時向主曰。吾主。吾天主。垂憐我。我未忘我之卑微。

第二端 吾主改徒喜悅 諸徒之悅。出於其行事之功效。而吾主欲人知行事之功效。其權不由我操。其事不加我德。其於主前。未必膺受厚報。乃告其徒。且告吾人以真正喜悅之緣。曰。勿以魔服爾爲喜。可以爾名錄天冊爲喜。

同上吾人在天主臺前，奮行善事，皆求可以奏功，可以收效。有其功而喜，無其效而憂，總宜心志誠正，惟求主名之光榮，人靈之裨益。彼以事無功效，而過於愛戚，以至心灰志敗者，殊無謂也。因天主所責於我者，非事之功效也。我苟忠勤從事，則事雖不成，主前亦不減賞報。若必經營於功效之外跡，見事無成，而卽愴惶失措。是蓋縈情於一己之聲譽，惟求一己之昭耀矣。當思脫卸自愛之私，求已名書於天冊。不避辛勞，務盡職分，實心實意，順聽主命，如是可耳。

第三端 吾主與徒喜悅 吾主慈愛已徒，見徒欣悅，且知徒之欣悅，實緣於天主聖父洪恩，不禁與之同悅。經紀當時耶穌心神踴躍，曰：父，天地真主，今予揚爾，因爾閉斯於世之哲者，而開於世之小者。父，爾欲如是，悉繇爾莫測。

之意。同上吾人見有功業崇廣，才名遠播，德化風行，亦可效吾主歡忭於心，頌榮天主。切勿勢不相下，心懷妬忌。果能如是，亦可見其居心大公，愛主懇摯矣。向耶穌聖心求賜謹憶此意，勤修此行。 祝言

二十二日 耶穌仁善之呼喚

定像 想見耶穌謂我曰：就予，承予軛，法予心謙。

特求 求主賜我聖寵，體味聖心，忠應聖心之召。

第一端 喚人親就於已 吾主既眷顧已徒，復不忍忘斯黎庶，亟欲以一已之慈愛，推於衆人。且欲假手於宗徒，及諸弟子，施之於天下萬世。更欲徒等體味已心，代行已事。乃在彼前呼號曰：苦難者，荷重者，俱來就予。予慰且輕

之。瑪竇十一篇吁，吾主之度量，大矣哉。知愚滅否，無不在其胸懷。而於艱難困苦之徒，尤爲關念。此乃訓我於所屬之人，老少愚魯，俱宜撫字。而於熒獨無告者，尤當憫憐。如是而行，方爲效法主心於行事，克肖主像於厥躬。吁嗟余靈，勿辭勞悴，勿避苦辛。爾所仰慕之耶穌，卽全能之天主。伊將加爾聖寵，潤澤爾心，賜爾得勝諸艱。可同保祿宗徒曰，頌謝天主，俾我奏捷於耶穌基督。利斯督。致哥林多人後書二篇，求主賜我仁愛之德，當艱愛之時，速赴吾主之懷。

第二端 喚人承已之軛 世人多陷入魔網，畢世勤勞，生前旣逢百憂，死後更受萬苦。仁慈吾主憐之，喚之曰，爾伏項，承予軛，法予良善心謙，爾神乃得康甯。予軛飭，予任輕。同上吾儕得主呼喚，追隨厥後，固爲心身幸事。但恐未

免先承魔軛，亦爲恨事。雖然，亦可因此而知主軛之飴，倍我熱愛之心也。主曰：爾神乃得康甯，卽言將獲神靈之慰，心內之安。此中滋味，固爲天堂福樂之先嘗，世俗人何得而知之。今我謝主聖召之恩，求主赦我怠忽之過，以後毅然事主，非爲圖主予我以甘飴，惟思悅樂於天主。

第三端 喚人效法已心 主曰：法予良善心謙，爾神乃得康甯。見上恭聆吾主以上數言，可知人欲得內心之安慰，神靈之快樂，宜常賴天主之聖寵，效法主心之謙良。因能如是者，斯能忍受人世之欺凌侮辱。凡遇艱苦，認爲已罪應當之罰，遭怨讟，反增修德立功之切願。如是隨處得心安意舒，是行也。原係反人本性，我當勉勵行之。常以吾主之表存於心，而體於身，如是可耳。求至仁至愛之耶穌變化我心。 祝言

二十三日 學士佯問主訓

定像 想見一明經士在衆人中，問救靈愛主之理。

特求 求主賜我聖寵，俾能虔誠真切，愛主愛人。

第一端 何以救靈 吾主公堂訓衆，有明經士突然出立，試主曰：師，我何修而得享常生。路加十篇夫斯士之間，原非有心求教，不過欲試探主言，以開駁論之門。當此之景，主若置之不理，其人亦無可怨。而吾主仍與之言，欲在旁聽講之衆，皆能獲益。吾儕每遇狡黠之徒，究問聖教奧理。若卽信以爲真，而與之細論，適以取其嗤笑。蓋明道辨疑，原屬美事。然必有榮於聖教，有益於人靈，斯可行之，切不可鹵莽從事。經曰：予將與爾口及智，凡爾仇敵，弗克

抗且對。路加二十一。篇此蓋爲宗徒言之，而非爲衆人言之也。由是以思，倘或身非司鐸，或明於超性之學，甯闕疑迴避，勿致誤言，以辱教名。求主賜我馴如鴿，智如蛇，而慎於語言。

第二端 何如愛主 耶穌欲人識明經士之間，非真出於不知，并非誠心求教。於是反詰之曰，經載若何。士曰，以全心全靈全力全意，愛慕天主，又愛邇爾者猶已。主曰，善哉爾答，爾行若是，始入常生之域。同上我當以此愛主之令，逐語玩索，以便恪守。一曰，全心。謂所愛無物等於天主，亦所愛無物非爲天主。居心恒願受世間之萬苦，不願違離於主。物有引我近主者，好之。物有誘我遠主者，惡之。二曰，全靈。時常整備身靈，甯可爲主捨生，捐棄世有，總不肯失落寵愛。舉凡偏情私意，不合主旨，不悅主心者，一概克除盡淨。三曰，全

力。言不避辛勞，以從主事。獻我時日，用我才學，盡我力量，及一切神形諸有，以求主榮。四曰，全意。言專務識主美善，明主心意，盡我智能，無論讀書力作，志向皆歸於主。今我自問，我於此等道義，固何如乎。求主賜我愛主，一如天主愛我。定志常如是求焉。

第三端 何如愛人 明經士慙愧已之詐偽，明露衆人之前。乃欲僞飾己善，令人謂爲虔心講求主誠，以全遵守。復曰，邇予者疇人。同上明經士此問，非惟無以掩羞，且適以增辱。因吾主所答，及撒瑪利大諾之喻，益彰其人及其同儕之倨傲自愛諸弊。故人旣獲一咎，不知心謙悔改，而反求曲說浮詞，以文其過。是正重其過，而爲斯明經士之徒也。我宜自深戒慎。向吾主耶穌切求此恩。 祝言

二十四日 撒瑪利大諾之比喻

定像 想見一路人，爲盜罄切砍傷，旁有一人援助之。

特求 求主賜我惻隱之心，加修愛德，仰法吾主聖心。

第一端 撒責肋未達之薄德 據如德亞學士偏見，解邇已者惟爲本國人，

又本國人中，惟爲義人之名，以爲於已最稱。吾主欲斥其非，謂明經士曰，有人自日路撒稜下日里，各路遇寇盜，罄切砍傷，幾斃。適有撒責偶下是路，視而去。肋未達繼過，視亦然。路加十篇觀吾主之言，當時如德亞之教士，愛德甚淺。今日者，聖教會所建善舉，如義塾、嬰所、老院、醫局、病院等，棋布星羅。愛者獲慰，苦者獲安，困窮者，孱弱者，得援助。此皆司鐸等與諸善士愛德之功。

亦有信男修女，不惜資財，不辭勞悴，甚至梯山航海，以愛人爲事。嗚呼耶穌，倘非爾聖訓至表，何以致此。我當讚揚稱謝，慎弗習視人困，而無哀憐拯救之心。

第二端 撒瑪利大諾之愛德 吾主旣諷撒責等，惟知自愛，不知愛人。繼曰，撒瑪利大諾後過，視之心惻，近其側，用酒洗，油傅，裹其傷，脫乘馬以載，抵館厚款。次日捐資二錢，昇館主曰，醫餌。且有他費，悉返補。同上吾主於此喻訓人者三：一、汎愛衆人，雖非我族類，不與我同道，如撒瑪利亞人之於如德亞人，亦宜推誠施愛。二、愛人實德，當徵之於行事。三、樸實之徒，心靈誠直，每於分內之事，明於多才倨傲之人。卽如撒瑪利大諾一異教人，世俗人耳，而其愛德，則過於主民如德亞人，且優於撒責與肋未達教士。凡我修德之人，宜

奮行愛德之功，不讓庸常信友，獨擅其美，更當推愛於素不相投之人。

第三端 明經之士自言真理 吾主既講畢前喻，問明經士曰：三者之中，孰爲遇寇者之邇人？曰：哀矜者是。其人既迫於言此，顯已素行之不德。耶穌乃語之曰：往行若茲。同上主言往行若茲者，明訓人欲修愛德，宜效法撒瑪利大諾之殷勤大度。我欲修此愛人之德，須不惜自身之快適，不顧一己之安閒，分少絕甘，解衣推食。若爲救人靈於永火，卽捐軀隕命，亦所不辭。問我固有若斯之情意乎？今日爲聖母贖擄瞻禮，念其悲惻之心，望賜我慈祥之德。

祝言

二十五日 申明前喻之寓意

定像 想見撒瑪利大諾撫慰被傷於寇盜之人。

特求 求主賜我聖寵，增我仁愛之心。

第一端 路人被盜劫，爲罪人之像。按聖師之論，吾主所喻被劫之路人，卽指吾人傷於原罪之本性。幸賴吾主救贖之恩，得全永生之命。今以事之當躬者言之，行人途遇仇寇，被劫受傷，謂人獲重罪，陷落魔手，所有潔淨之明衣，聖寵之華美，及諸超性恩寵，皆被劫掠一空。而靈魂滿受瘡痍，在主前不堪醜惡。寵愛全失，只存信心，真不啻瀕死之人，一息奄奄，惟待斃而已。迴溯生平，雖只獲一重罪，爲禍已若是之甚。旣遭是禍，而又久延時日，愚孰甚焉。設當時天主卽收我靈魂，今當何在。茲之所幸尙存者，天主拯救之恩也。夫此路人之所以遇盜被劫者，因其離日路撒稜而下日里各也。我之靈魂所

以若死。幾無生理者。因遠離天主。忘情四末。求塵世之虛浮。肉身之快適也。修道者未嘗免三仇之窺伺。未必無顛蹶之機會。尙其情殷惕厲。防禦無疎。求主賜我常深敬畏。不敢自恃。日中行事。恒避放心肆志。不致冒失陷之危。

第二端 撒瑪利大諾爲救世之像 受傷幾斃之如德亞人。實爲撒瑪利大諾之外人。彼此不相交際。若望四篇如是。則傷者自傷。而行者自行。宜若兩不相干。誰知撒瑪利大諾一見如德亞人。被盜情形。卽動惻隱之心。下乘馬。近前調濟。吾主之於吾人。正如是也。吾人獲罪。身靈污穢。不得與主親近。主乃憐憫之。願自天降世。行救人匡世之功。觀撒瑪利大諾之愛德。乃知吾主之加於我者。正不止百千萬倍。洗我以痛心慘悔之酒。傅我以聖寵潤澤之油。飫我聖血珍寶之膏。不惟脫乘馬以載。且如善牧之負我於肩。路加十五

篇如慈父之懷我於胸。不但寄我於旅館，而且置我於堂院，囑館主醫餌。凡我神形所急需，有長上與昆仲料理，迨他日復來召我於天庭。夫撒瑪利大諾之行爲，已足令人感其高誼，而動遐思。況吾主待我勝撒瑪利大諾，不更當動我感情，涕泣懷恩，而圖報效於萬一耶。今而後，宜加倍熱心，勤修愛德。尤於疾病困窮苦難諸人，殷勤致意，以體吾主哀憐之心。諸聖中善體吾主哀憐之心者，厥惟聖母。故求聖母聖心，爲慈憫矜憐之府庫，爲我轉達。

祝言

二十六日 昆弟和愛之緣由

定像 想見聖伯多祿。謂人曰：萬事之先，恒宜彼此和愛。前書四篇

特求 求主賜我超卓於和愛之德。

第一端 和愛之命 昨日默思撒瑪利大諾之行爲，今故不能忘情於昆弟和愛之德。至和愛一端，實爲修途中一大關鍵。吾主與宗徒話別，再三致意曰：斯乃予詔令，欲爾相愛，如予愛爾等。若望十五篇且欲人以相愛之德，爲其弟子之憑証。曰：爾相愛，繇此衆將知爾爲予徒。若望十三篇吾儕修道之人，謝絕世上父母，同一在天聖父，同守一會修規，最當有連枝之誼。卽諸信人，同一聖會，猶如一身，亦當有血脈相通之理。慎思此義，自應謹承主命，擴我度量。不但有時犯而不校，且有時曲意原諒，善爲人辭。故每聞有人曰：我不願與某交往，以免憤恨之機。亦有人曰：我固樂善與人同，然逢人觸忤，必隱言譏諷，引其遷改。抑知斯非仁愛之行。當自謙自愧，常以愛德內外功過。

作自己省察之目。

第二端 和愛之表 和愛雖係吾主之命，實亦吾主之表。蓋吾主一生，無非著其和愛之德。既不煩促他人，復常恕宥他人。如僕僕風塵，施恩分惠，憐諸人疾困，爲之療治。任我人罪過，代行補贖。卒被人毒刑釘死，猶曰：父寬宥彼，彼實弗識所爲。路加二十三篇噫！吾主之表，誠我所當師法者也。師法之如何，不顧己身之利便，不惜己力之疲乏，以裨益同人。卽不然，至少戒慎相反和愛之弊，以免人厭憎。如知此行不愜昆弟者，則抑制之。或知此行悅樂昆弟者，則勉爲之。有時心神勞倦，或節候失宜，易顯怨懟之形，則加意防閑。此類諸行，似乎瑣碎，實和愛精細之功。問我生平，有一於斯乎？求主賜我聖寵，勤修愛德。日中屢憶保祿宗徒之言曰：我於衆人，已爲衆物。猶言能適衆人。

之願、合衆人之心也。

第三端 和愛之報 吾主於末日、審判公案前、向諸右者曰、予父聖福者、偕來享天國。予饑、爾食我。予渴、爾飲我。蓋爾所施於斯、予昆弟中、至小者之一、卽施於我也。向諸左者曰、爾輩凶禍、離迷我、入永火。予饑、爾不我食。渴、不我飲。蓋爾不待斯小者之一、卽不我待也。瑪竇二十五篇從可知和愛之德、人宜急修。在與人交接之中、宜常著和氣之象、發愛德之輝。舉凡自愛之偏、及諸相反愛德之行、如倨傲妬忌、矜誇忿恨等、皆當除絕。耶穌聖心爲仁愛無涯之泉源、宜向之祈求。 祝言

二十七日 昆弟宜和愛

定像 想見吾主曰爾宜相愛、如予愛爾等。若望十三篇

特求 求主賜我於萬事、慎修和愛之德。

第一端 和愛宜超性而公 吾主命人相愛、如已愛我人。夫吾主之愛人、超性而公。試思傳教時、無論罪人淫婦、異教外方、無不施以赦宥、賜以寵恩。此其心、誠有超越吾人本性者。吾人愛人、亦當如是。據信德之理、爲天主而愛我昆弟、愛之、爲其爲天主之肖像、耶穌之肢體。且愛之、如愛耶穌於其身、以符經訓曰、爾施於昆弟、卽施於我。見上如此愛人、視衆人爲天主之子、耶穌之弟。則其向爲超性、而其心乃大公。倘有人焉、平素心同水淡、情如冰冷。及見人勢力可倚、才學堪取、言貌足重、或性情相若、意氣相投、輒殷勤款待、曲意周旋、私心竊喜、以爲克修愛德、謬矣。恐其爲愛利益、愛血肉、愛私情。所謂

真正愛德者，不在是。問爾於斯愛德之工，能無誤謬乎。倘爾自欺，須深媿悔。自後汎愛衆人，尤愛與己本性相反之人。斯之謂爲天主而愛人，超性而大公。

第二端 和愛當先有實行 吾主愛人，不但愛之於口，愛之於心，實能愛之於行事。且每先人意願，周人急困，施人德澤。吾人亦宜如是愛之，慰人勞，助人困，分人恩惠，當有實行。又宜如我力之所能，滿人願望。倘爾欲施德於人，先須人卑躬哀懇，非愛也。見昆弟職事紛煩，辛勞疲乏，惟咨嗟嘆息，不思一舉手以輕其仔肩，非愛也。有時奉命助人乏困，畧露怨懟煩惱之形，亦非愛也。求主賜我活信，凡行愛德之工，先有實行。

第三端 和愛當慷慨不吝 吾主愛人慷慨不吝，非惟周人肉身之急，且亦

救人靈魂之苦。職是之故。情甘捨生致命。受極刑慘死。此其愛情之慷慨。愛德之超奇也。且嘗有言曰。愛莫甚於爲友而捨命。若望十五篇愛人若是。洵造夫其極。蔑以加矣。我欲師法吾主之表。亦當如是。古來賢聖。爲昆季身靈之益。多有不顧己身。捨生致命者。我能無奮勉而不思仰止哉。然立大德之功。其機難逢。而行之便而常遇者。含忍昆弟之煩絮。或慰其憂。或代其勞。語以善言。感以善行。爲之代求天主。另爲同居同院者。誦經祈主。賜以神形兼佑。德業日增。問我歷來行之何如。今日爲葛斯默達米。盜瞻禮。彼爲兄弟。能共睦一心。同臻聖域。求二聖轉達。 祝言

二十八日 姊妹延主得訓

定像 想見瑪利亞瑪達勒納坐主足下，聆主訓言。

特求 求主賜我操作與默禱兩途，兼修並行。

第一端 姊妹延主 吾主自去加法爾納翁後，棲遲靡定。每有好善之家，延留授館，以作信宿之區。一日，耶穌入白大尼亞小郡，有女瑪爾大者，館之家。厥妹名瑪利亞，坐伏吾主足前聆訓。瑪爾大急迫治席，路加十篇姊妹兩人，性格不同，動靜相反。一急於爲主服勞，一勤於聆主講訓。而彼此和睦，皆能見愛於主。正示人顯隱兩途可兼修，而俗務與神功不妨並行。然此兼修之功，非徒在賢勞主事之餘，能行數刻祈禱。更宜於行事之間，卽在塵囂之際，能誠心忠悃，與主締交。求聖神啟迪，賜能兼此兩途修美。日中習念誦句，爲與主結契之助。

第二端 何爲急須 瑪利亞沉靜無言，恭聆主訓。瑪爾大忙迫治席，不勝勤勞。乃向吾主曰：妹留我獨勞，主無顧耶？請命起以佐我。主曰：瑪爾大，瑪爾大，太迫諸衆，所須者一而已。同上旨哉吾主之言，除俗人而外，雖熱心求道之人，亦碌碌於分外之事。有時卽勤分內之工，而心煩慮亂，不知所思。或憂事業之無成，或憂聲名之有玷。噫，何其太迫諸衆也。夫所須者一而已，地無論安危，時無論久暫，職任無論鉅細，所當念茲在茲，無可荒怠者，惟靈魂之救，德業之修。求主賜我玩主之言，明主言之意，庶能於斯朝乾夕惕，思言行止，皆謹慎於斯。

第三端 何爲美務 主又謂瑪爾大曰：瑪利亞攸選，迺至極美務，無可奪之於彼。同上吾主以瑪利亞之務，美於瑪爾大之行，誠以注禱之工，重於行事。

之勞。其故何歟。一、因日後萬行盡息，而注禱之工，獨延之於永。注視天主本性之美善，而愛慕稱揚之於無窮。二、因人以默存注禱，得明天主奧理，而行事愈能超特。試觀毅然從主於加爾瓦畧山，徘徊於十字架下者，非瑪爾大乃瑪利亞也。此非注禱之效而何。然惟貪默禱之幽閒，而畏行事之勞悴，以致失任曠職，是亦修途之大弊。經曰：萬事皆有其時。釋虛經三篇多默更比曰：有時當爲主而捨主，卽爲行愛人救靈之事，而捨默想誦禱之工。要之事雖紛煩冗雜，而動作之間，總宜澄心滌慮，翁合主心。此卽吾主所諭恒禱勿輟之義也。路加十八篇宜求二位聖女轉達，賜能兼具兩途之美。 祝言

二十九日 戒人貪吝之喻

定像 想見吾主謂時人曰、慎之、戒諸貪吝。

特求 求主賜我珍愛神貧、切意虔修。

第一端 貨財不增人福 一日吾主宣講時、有人謂之曰、師、請命我兄與我析產。耶穌曰、友、孰推予爲判吏、而析汝產耶。遂謂衆曰、慎之、戒諸貪吝、人生不在物之豐裕。路加十二篇此人求主爲之析產、而吾主不肯干與。其所以訓吾人者二。一、毋管人家俗事、專務自己神業。二、乘人爭利之時、當示人以世有之虛暫。因其不能增人年壽、免人患苦。且今日富饒、翌日貧困、世間常事。若將此類真情實理、浸潤人心、挽彼求財好貨之徒、使之積功累德、誠甚幸之事、我可不留神加意乎。求主上智之恩、俾我於言語間、能啓迪人心、常以聖奧斯定之言、謂溺於貨利者曰、事非永遠、皆無而已矣。

第二端 貨財反致人憂 吾主欲人明世富之幻，喻曰：一富人秋穫大穰，自擬無處藏厥穀實，將奚爲。俄曰：知所爲矣，撤舊廩而崇廣之，可盡藏所產殖。遂自忖曰：我今多畜財貨，可歷年宴安飲食，醉飽爲歡。天主語之曰：狂人，今夕將索汝命，爾所藏畜爲誰有。人自聚財貨，而不知富於天主者類是。同上。吾主此言，可爲千古入富金鑑。試思富人持籌握算，旦夕焦愁，不避跋涉艱辛，不畏風霜勞頓，未得患得，既得患失，形骸困苦，寢食不安。家資愈多，煩慮愈甚。及諸事如願，思樂享餘年，而死期忽至，千倉萬箱，已不知爲誰有。嗚呼，謝主置我於斯地位，免患得患失之憂。表我謝悃，當倍我事主之誠。

第三端 貨財遺人永禍 財貨不但致人憂慮，且遺人永禍。所謂遺禍者，非謂財貨本爲不善，有之者必將下墮。乃謂人懦柔，一有財貨，遂足開其淪喪。

之端。始而冷淡怠惰，繼而饕餮奢侈，終至邪淫放縱。種種愆尤，不知伊於何底。主故曰：有財貝者難進天國。路加十八篇究其所以，卽聖保祿宗徒所謂：凡欲爲殷富者，投魔羅網。致弟莫德前書六篇吾儕修道之人，矢願甘貧，脫免一切牽纏，固堪自慶，亦堪自喜。但所以妥救已靈，厚望主報者，非善願之發，乃善行之修。尙其懍然於此修途規格，以自加勉。 祝言

三十日 預防猝死之義

定像 想見吾主曰：爾輩宜備爾不意時，人子將來。

特求 求主賜我善生安死之恩。

第一端 無備而猝死 吾主前言富人猝死之喻，足令聞者心驚肉跳。然欲

乘機訓人，時防猝死，故又謂衆曰：爾輩宜備爾不意時，人子將來。路加十二篇。宇宙間猝然死者，屢有所聞。然未可概謂爲不測之禍，因有時實爲天主特寵之恩。古來聖賢，每願死於猝然，以免仇魔之攻敵，以脫死候之艱難。故猝死之可畏，非畏死之猝然，實畏無備而死，且更畏負重罪而死。聖會禱文中云：於猝然死，主救我等。其原文曰：於無備猝然而死，主救我等。觀此可知聖教之意，欲人虔求天主，俾能懋修厥德，心神恒潔，不染重罪，萬不幸而獲罪於主，速卽求救。非然者，自冒下墮之險。有信德者，不得不爲之寒心。謝主至今，免我死於罪惡。求主賜我恒存主寵，庶幾猝死亦不爲我虞。

第二端 有備而猝死 信人善士，畢世熱心修德，一旦忽然去世，而入常生之域。實有似胎瞽之忽焉得視，猝然見天地之高廣，日月之光明，萬物之美。

麗其歡欣忭舞，有愕然不可言語者。蓋善靈逝世，一如吾主所謂自死渡生。若望五篇見天主本性之福德無窮，可愛無比，滿其所願，如其所望。蓋斯天主，既已一生事奉，且暮呼求，時憂違其意，拂其心，而爲之克已苦身，謙卑忍辱，輕世絕財，以之爲心思行事之歸宿，而恒願覩其聖面，享其榮福。一旦召之曰：來來，可愛之靈魂，以受榮冠。又曰：入爾主之樂。瑪竇二十五篇斯靈若是，尙有驚愁疑懼之情乎？猶不踴躍而奮飛於主乎？必歡然向主曰：予靈渴，惟活天主，何時至，見天主臺前。聖咏四十一篇我靈，凡死候欲爲者，今當速爲之。庶死候臨身，無憂無慮，一味愛慕天主也。

第三端 不猝死而備 以常情而論，肉身將死，先染疾病，畧延時日。由是而知臥床寂靜時，尤當忍耐含容。蓋一堂一字之中，各人皆有職司。雖殷勤願

慰力行愛德者有人。究未免猶覺孤房幽寂，或憾湯藥之不周。况肉身疾病，每致神靈厭煩。其一種暴躁懊惱之形，有不期然而然者。故當強健之時，習慣幽靜，善與天主及神聖交好，不憾人忘情於我，不懟人無禮於我。和順既積於平日，德輝自著於病時。庶有以感悅長上，激勵同人，尙其勉旃。求聖若瑟。善終主保，轉求安死之恩。 祝言

24
212214

